

LUK

Jiysis Krays Minim Tep Luk Tikak Minim Nind Niņep

Baybol buk day “Luk” apun biy, bi Jiwda mer bap tikak. Yimb nuk ak Luk. Nuk dokta ak pen; Pol yip tanġiy, Jiysis nup tikey yomb giy, yerer gindand apiy kumiy tikjak Nop ker amnak ak, kesim dey niņrep gak rek, biynimb nuk Jiwda mer Jiysis nup gosimb niņyak gok kuyip tikak.

Nuk Jiysis Yisrel biynimb kuyip nep mer, Jiwda mer gok kuyip kunep Gor ker dining awak minim ak anġrep gak (Luk 2:32, 3:6, 24:47).

Bi kun ak nep Baybol buk day “Apasol” apun ak kunep tikak.

Minim Ar Keykey Mindip Rek:

Minim nind anġak ak mindip, chapta 1:1-4.

Jon bi niņg pikñemb ak yip Jiysis yip kuyip tikiyak minim ak mindip, chapta 1:5–2:52.

Jon bi niņg pikñemb ak woņg kiñiņ gi gak minim ak mindip, chapta 3:1-20.

Jon Jiysis nup niņg pikñak ak sek, Seytan Jiysis nup tom gak minim ak sek mindip, chapta 3:21–4:13.

Jiysis miñmon Galiyliy woņg kiñiņ gi gak minim ak mindip, chapta 4:14–9:50.

Jiysis Galiyliy nimb woņg gindand Jerusalem amnak minim ak mindip, chapta 9:51–19:27.

Jiysis niņ nuk ak maņ giy wiyk nokom bap mindakniņ, Jerusalem sek, yep maņ kun okok sek

angñirangek minim ak mindip, chapta 19:28–23:56.

Jiysis kumiy tikjakek biynimb kunaynep nup misen ninyak ak sek, arachak Nop ker amnak minim ak sek mindip, chapta 24:1-53.

Luk Biyomb Tiyopiylas Nup Minj Tikak

¹⁻² Biyomb Tiyopiylas. Krays nup namb chinup biy tikey yomb giy, gak gak rek, bi gunap windin ninjy angñeyak, bi gunap ninjy, kesim nokom kun ak nep ar keykey tikyak. ³ Pen biyomb ninan: Jiysis nind gek owak rek, yand per kiñinj piyowninj tep gipiyn ak mey, kunep tikning gispiyn. ⁴ Kun giy tiken mey, minim nip angey ninban ak, ninjind yimb nep apay anjy niñningamban.

Jon Bi Ñing Pikñemb Ak Tikningamb Angak

⁵ Nind Herot Jiwdiya propens kond mindyngip ñin ak, binak Sekaraya, Gor nup simbonjep wong ak gi mindyngip. Bi layn nuk yip wong jimñiy giyngipay gok kuyip, Abayja Layn angyngipay. Pen bi Sekaraya kun ak biynuk yimb ak Eliysabet. Nup kunep bi Gor nup tap simbonjep Eron kiñinj ak tik dand amiy tikyak.

⁶ Kiykber Gor minim ar ak manjiysek kisen giy minder; Gor niñek minim bap ma mindek. ⁷ Pen Sekaraya biynuk Eliysabet ñapan wom ak mey; ñapan bap tikiy mer, pisnep yimb tokiy ayrik.

⁸⁻⁹ Ñin bap Sekaraya binuk yip wong jimñiy giyngipay gok, ap Gor nup simbonjep wong ak tip gining angyak, “Wong giningambun kun ak, bi chin an rek biyomb angayon chinup gunap kond mindeningamb anjy,” sandiw rek ak giy mey,

Sekaraya nuk wiyn giy, kuyip kond mindyngip. Tap kuyrep apyngip gok Gor angnep korip mingan ak amiy, dangiyngip. ¹⁰ Pen ñin bap, tap kuyrep dangiyep won ak apek, biynimb kunaynep ap mis biyan nan-giy lotiw mindyakniñ, Sekaraya nuk tap kuyrep wak kun ak dangiyngip, korip ñiluk mingan ak amniñ sandak. ¹¹ Amjakakniñ, enjol bap ap tap kuyrep wip dangiy ayngipay ñin yipund kind okok ken misen gak. ¹²⁻¹³ Sekaraya niñiy jiwdiy pirikek, enjol ak nup angak, “Ma piriknimin! Gor nup minim angnibnan ak niñimb. Biynak Eliysabet ñi bap tikniñgamb. Tikek yimb nup Jon angnimin. ¹⁴⁻¹⁵ Nuk Gor nup wong gek; Gor nup tep giy, nip key tep giy, biynimb gok kuyip tep giy giniñgamb. Nonim nup tikek, Gor Kawnan ak yip nep mindeniñgamb ak mey; ñiñg wayn akan, ñiñg kilis gunap ma ñiñnimun. ¹⁶ Kisen Yisrel biynimb Gor nup kirpay gok kunaynep angrep gek, Gor nup Biyomb chin angiy diniñgambay. ¹⁷ Pen ñi nand kun ak, Gor Yilayja nup kilis ñiyngip rek ñakniñ, nop sikop kuyip diy, ñapan nuk sikop kuyip diy di jimñiy ayniñgamb. Biynimb Gor nup alemb alemb ñimbay gok ang tep gek; biynimb nup gosimb niñiy sun-tep mind-pay gok yip mind tep giyng, Biyomb anup kond mindyakniñ winiñgamb angak.”

¹⁸ Enjol ak kun angak, Sekaraya angak, “Chir tokiy yimb aypur ak, yergiy ñapan tikniñgambur? Kun ak yergey niñiy, niñind yimb apan angnigayn angak.” ¹⁹ Angak, enjol ak Sekaraya nup angak, “Yand Gebriyel, Gor windin yirik ar ak minden yip yokek, minim tep kun ak

dand opiyn. ²⁰ Pen niñind aᅅgip aᅅgiy ma niñban rek, joñimb nip ak miker gek, minim aᅅgyiᅅg ma mindeniᅅgamban. Yikop nep mind mind, ñi ak tikiy nep, tip ak minim aᅅgniᅅgamban aᅅgak.”

²¹ Pen biynimb mis biyaᅅ mindeyak gok, Sekaraya Gor aᅅgniᅅep korip ñiluk miᅅgan ak am tapin yimb mindek niᅅiy, gos kuᅅay yimb nep niᅅyak. ²² Kisen nuk mis apiy, yip kun kun gip aᅅgiy, ñin anep yomek; korip miᅅgan biyaᅅ am mindiy, tap bap key niᅅiy wip aᅅgiy niᅅyak.

²³ Pen Sekaraya Gor aᅅgniᅅep korip woᅅg ak gi mindek, ñin nuk ak day jiwakniᅅ, bi gunap ap tip nup ak diyakniᅅ, nuk andkind korip amnak.

²⁴⁻²⁵ Mind dand amiy, biynuk Eliysabet ñapan koᅅgiy mindiy aᅅgak, “Biyn ñapan wom minden yip nambiᅅ gak ak pen, miñiy Biyomb ak yip simb niᅅiy kond mindek, ñapan koᅅgiy mindpiyn ak; yip tep gip rek, nambiᅅ ma giniᅅgamb aᅅgak.” Kun aᅅgiy, takin onep mamind ak, kapkap korip miᅅgan okok nep mindyiᅅgip.

Jiysis Nup Tikniᅅgamb Aᅅgak

²⁶ Takin kaᅅgol ak, Gor enjol Gebriyel nup aᅅgyokek, pañ Mariya nup niᅅniᅅ miñmon sikoy Nasaret amnak. ²⁷ Pañ kun ak, binak Josep nup diniᅅgamb aᅅgiy minim aᅅgyak. Bi Josep kun ak, kiᅅ Depiyt tikek, tik dand amiy tikyak. ²⁸ Enjol Gebriyel pañ Mariya mindek ak amjakiy aᅅgak, “Mariya mindpan? Gor nip direp gip. Nuk yip mindpiyr aᅅgak.”

²⁹ Kun aᅅgek, Mariya minim kun ak niᅅiy, yip yenen kun asap aᅅgiy gos kuᅅay niᅅek, ³⁰ enjol ak nup aᅅgak, “Ma pirikninin! Gor nip direp

yimb gip. ³¹ Nand ñapan koŋgiy mindiy, ñi bap tikningamban. Tikiy yimb nup Jiysis aŋninin. ³² Pen nuk biyomb yimb mindek, Gor Ñinuk aŋningambay. Gor gek, nusind yes Depiyt, kiŋ yomb mindyŋgip rek mindiy, ³³ nimbip Jekop tikek tikey mindpim gok maŋgiysek, perper yimb kond mindeningamb aŋgak.”

³⁴ Enjol ak kun aŋgek, Mariya aŋgak, “Yand bi bap yip ma mindpur ak, yergiy ñapan kun ak tikningayn?”

³⁵ Aŋgek, enjol ak nup aŋgak, “Gor Kawnan ak nep gek, ñapan suŋ-tep yimb ak tikningamban ak mey, nup Gor Ñinuk aŋningambay.

³⁶ “Niŋan! Namind Eliysabet nup biyn ñapan wom aŋgyiŋgipay ak pen; miñiy tokiy yimb ay, ñapan koŋgiy mindip. Takin omiŋal omiŋal mindiy, ñi bap tikningamb. ³⁷ Gor tap ma ginimuŋ rek bap ma mindip; tap okok maŋgiysek ginimuŋ rek anep mindip aŋgak.”

³⁸ Kun aŋgek, Mariya aŋgak, “Yand Gor nup woŋg giñemb pañ bap ak, aspan rek nep yip ginimuŋ aŋgak.” Kun aŋgakniŋ, enjol ak nup kirgiy amnak.

Mariya Am Numind Eliysabet Nup Niŋak

³⁹⁻⁴⁰ Pen Mariya kasek amniyn aŋgiy, Jiwdiya propens yirik okok kinjeŋ par ak am am, Sekaraya korip ak amjakak. Amjakiy, numind Eliysabet nup aŋgak, “Nand mindpan?” ⁴¹ Aŋgek, numind Eliysabet ñapan mindek ak kawin ayak. Pen Gor Kawnan ak Eliysabet nup gek, ⁴² meŋg miŋgan dand araniy Mariya nup aŋgak, “Gor biyn gunap kuyip kond mindip ak pen; nip key

yimb direp gip. Ñapan koŋgiy mindpan kayan ak kunep kond mindip. ⁴³ Yergiy rek minden, Gor yip direp giyiŋ, Biyomb chin nonim ak yip ker apek niŋsiyŋ? ⁴⁴ Nand ap yip ‘Mindpan?’ aŋgey, ñapan koŋgiy mindpiyŋ ak, tep gakniŋ kawin ayip. ⁴⁵ Pen Gor nip aŋgip rek giniŋgamb aŋgiy niŋban ak, tep yimb gipan aŋgak.”

Mariya Kamep Rek Aŋgyiŋ, Gor Nup Yimb Ak Dand Aranak

⁴⁶ Eliysabet kun aŋgek, Mariya Gor nup gosimb niŋyiŋ, tep gakniŋ aŋgak:

⁴⁷⁻⁴⁸ “Yand pisnep kumemb rek mindenik, Gor yip simb niŋiy tungasik dak ak, nup niŋen yip tep gip. Yand yikop pañ nup wong giñimbiyŋ ak pen; yip sakiy ma gip. Kun gip ak, miñiy tikiy, biynimb gok maŋgiysek, Gor biyŋ kun ak nup direp yimb gak aŋginiŋgambay.

⁴⁹ “Gor Biyomb tap okok maŋgiysek gip ak, yip direp yimb gip. Nuk bi suŋ-tep kun ak key yimb mindip. ⁵⁰ Biynimb minim nup niŋiy ñawil diy, kisen giniŋgambay gok, kuyip simb niŋiy diniŋgamb. Ñapan kiy tikeniniŋgambay tikey amniŋgamb gok, kunep giniŋgamb. ⁵¹ Nuk bi ñin paryomb yimb. Biynimb chin key biynimb yomb mindpun apay gok kuyip, yuk yokip.

⁵² “Kun ak, biynimb yimb mindip gok keykey amey, biynimb yimb ma mindip gok tip kuyip ak dipay. ⁵³ Pen biynimb yiwan gip gok kuyip niŋiy, tap ñimb; biynimb tap

kunꞑay mindip gok ninꞑiy, yikop anꞑyokek ambay.

54 “Apis basind yes chin gok kuyip minim anꞑak ak sakiy ma giy, chinup Yisrel biynimb per simb ninꞑiy kond mindrep gip.

55 “Basind Ebrahim sek, basind chin gunap sek ñapan tikeningambay tikey amningamb gok, kuyip kond mindeningayn anꝼiy anꝼak rek chinup gip anꝼak.”

56 Mariya minim kun ak anꝼiy, numind Eliysabet yip takin ominꝼal nokom mindiy, andkind korip nuk amnak.

Eliysabet Ñinuk Jon Bi Ñing Pikñemb Anup Tikak

57 Mind dand amiy, Eliysabet ñi won ak tikak.

58 Gor nup kond mindek, tokiy yimb ay ñapan tikak kun ak; biynimb nuk gok ninꝼiy, nuk yip miñmiñ yimb giyak.

59 Pen ñi ak tikiy ñin onep ar ak mindiy, ñin jiy ak kumbak nup ak tikiy anꝼyak, “Ñi kun biy, nop Sekaraya yimb ak tinꝼiy yinj gep anꝼyak.”

60 Anꝼey, nonim anꝼak, “Mer. Yimb nup Jon anꝼep anꝼak.” 61 Anꝼek, biynimb nuk gok anꝼyak, “Binuk gok, Jon yimb bap ma mindip anꝼyak.”

62 Kun anꝼiy, nop Sekaraya nup ñin anep yomiy anꝼnꝼeyak, 63 nuk ñin anep yomiy anꝼak, “Yip tap pisband bap sek, kil tikep tap par bap sek dowim anꝼak.” Anꝼek, dand apey, ar kun ak yimb tikiy, enjol ak nind anꝼak rek, “Yimb nup ak Jon anꝼak.” Kun giy tikek ninꝼiy, kiyk gos kunꝼay yimb ninꝼyak. 64 Pen Sekaraya jonꝼimb miker gak kun ak awan amnakniꝼ, day minim anꝼyiniꝼ,

Gor nup yimb ak dand aranak. ⁶⁵ Biynimb mindeyak gok, gak kun ak niñiy, minim kun ak ying dand miñmon Jiwdiya yirik okok mangiysek yimb amniyak. ⁶⁶ Biynimb gok minim kun ak niñiy angyak, “Gor gek ñapan kun giy tikip ak, kisen yergiy rek mindeniñgamb angyak.”

Sekaraya Gor Nup Kamep Rek Angak

⁶⁷ Jon nop Sekaraya, Gor Kawnan ak bak ayek, Gor nup minim tep gunap kamep rek angyiy angak:

⁶⁸ “Chin Yisrel biynimb, Bapiy Gor nup yimb ak dand aranjun.

“Chinup pisnep kirgiyn angyiy gos ak ma niñimb; simb niñiy diniñgamb.

⁶⁹⁻⁷⁰ “Kun ak bi minim nup anjep gok wosrey angyak rek, Biyomb bap yokek apiy, chinup kond mindek, kim amniñgambun.

“Biyomb kun ak, basind Depiyt Gor nup wong giñiyiñgip bi ak ñapan tikek; kiy pen tik dand amiy apiy giy, nup tikniñg gispay.

⁷¹ “Gor angak, ‘Yand mindpiyn rek, nimbip miluk niñiy, timey giniñgiy rek ma ayniñgamb angak.’

⁷² “Nuk chinup simb niñiy direp gip kun ak, basind sikop kuyip sakiy ma giy, giniñgayn angyiy angyayak rek nep gip.

⁷³ “Nuk basind Ebrahim nup minim angyay angak, ⁷⁴⁻⁷⁵ ‘Nimbip kond minden biynimb miluk niñbay gok, nimbip timey giniñgiy rek ma ayniñgamb. Ma pirikniñgambim; gos yip ak niñiy, wong yip ak giy, biynimb tep yand

gok nep mindiy, mind tep giningambim angak.’

76 “Pen ñi yand. Nand wong giningamban rek niñiy, angningambay, Gor Biyomb yimb ak, bi minim anjep nuk angningambay. Yenen, nand nind amiy, biynimb gok kuyip anjep gey, Biyomb anup kond mindyakniñ, nuk winingamb. ⁷⁷ Nand kuyip anjep gey, Biyomb ak apiy, tap siy tap timey gipay gach ak wiykyokiy, kuyip diningamb.

78-79 “Gor bi tep biynimb simb niñimb ak, melik tep semb biyon nimb ak chinup yokeningamb mey; kisyimnamb okok tanjiy, gi dam pikiy, kumemb rek ayip ak kirgiy, kinjen tep ar ak tanjeningambun angak.”

⁸⁰ Pen Sekaraya ñinuk Jon, miñmon nep namb okok mind mind, pisnep yomb gi day tikiy apek, Yisrel biynimb nup niñyak.

2

Jiysis Nup Tikak (*Mat 1:18-25*)

¹ Pen Jon nup tikiyak ñin namb kun ak, gapman biyomb Siysa Ogastas, low ay angak, “Biynimb yand kond mind asikpiyn rek, manjiysek yimb diningiy angak.” ² Nind kiñiñ giy, yimb dinimimb anjiy diyak ñin kun ak, gapman biyomb Sayriyniyas, Siyriya biynimb kuyip kond mind. ³ Pen biynimb miñmon paryomb okok nimb ap yikop mindeyak gok yimb dining, andkind miñmon kiyk key okok amniyak. ⁴ Kun gey niñiy,

Josep nup Depiyt kiñiñ ak tik dand amiy tikyak rek; Mariya nup poñind, miñmon sikoy Nasaret Galiyliy propens ak kirgiy, Jiwdiya propens amiy, kiyñ Depiyt nup tikey mindyngip miñmon sikoy Betliyhem amnak. ⁵ Pen biyn nup minim angyak kun ak, ñapan koñgiy sek mindakniñ, poñind yimb diniñg amnak. ⁶⁻⁷ Amjakiy niñak; maniy tawiy kinyiñgipay korip ak pisnep timbik dak ak mey, kaw mokiñgipay korip ak mindiy, Mariya ñapan nind won ak tikak. Tikiy chech kom kom giy, di kaw tap kaskas ayey ñimbyiñgipay kes miñgan ak ayak.

Enjol Ak Kanj Siypsiyp Mokep Bi Gok Kuyip Angñak

⁸ Pen Mariya Jiysis nup tikak ñin kun ak, bi kanj siypsiyp mokep gok, gunap kisyimken ak kond mindeyak miñmon kun okok. ⁹ Gor enjol bap melik sek yokek, melik kun ak ap kuyip pikniñek niñiy, pirikyak. ¹⁰ Pirikey, enjol ak kuyip angak, “Ma piriknimimb! Yand nimbip biynimb okok mañgiyse, minim tep miñmiñ gep ak dand opiyn. ¹¹ Miñiy biyn bap, Biyomb chin per kond mindpun ak tikip; Depiyt mindyngip miñmon ak. Kisen nuk Biyomb mindiy, tap siy tap timey gipim gach ak wiykyokiy, nimbip di Gor yip jimñiy ayniñgamb. ¹² Nup am piyow niñiy niñniñgambim: nonim nup chech kom kom giy, di kaw tap kaskas ayey ñimbay kes miñgan ak ayek mindeniñgamb angak.” ¹³ Kun angakniñ, enjol kuñay yimb nep semb biyoñ nimb apiy, Gor nup yimb ak dand aranyiñg angyak, ¹⁴ “Gor yimb nup ak dand yiy ar biyoñ aranemb angyak.”

Bi Kanj Siypsiyp Mokyak Gok Am Jiysis Nup Niñyak

¹⁵ Enjol gok andkind semb biyon amniyakniñ, bi kanj siypsiyp mokep gok minim angnin angnin giy angyak, “Gor anğamb, chinup minim kun giy apay ak, kasek Betliyhem amiy niñun angyak.”

¹⁶ Anğiy, amiy niñyak: Josep yip, Mariya yip ñapan angyak kun ak, chech kom kom giy, kaw tap kaskas ayey ñimbay kes miñgan ak ayer mindek. ¹⁷ Niñiy angyak, “Enjol gok, kisen ñapan kun ak nimbip kond mindeningamb apay ak, mey biyey! angyak.” ¹⁸ Bi kanj siypsiyp mokep gok minim kun ak anğey, biynimb gok niñiy, gos kuñay yimb niñyak. ¹⁹ Pen Mariya nup tap key yimb ak gak rek, tep gek gos niñying nep mindyingip. ²⁰ Bi kanj siypsiyp mokep gok, Gor enjol nuk gok angyak rek nep gek, windin key niñiy, yimb nup ak dand aranying, andkind korip amniyak.

Jiysis Nup Tikiy Yimb Ayak

²¹ Mariya ñi ak tikiy ñin onep ar ak mindiy, minek jiy ak kumbak tikiy yimb ayning, enjol ak nind nonim nup, yimb ak kun giy aynimin anğak rek, yimb nup ak Jiysis angyak.

Bi Simiyon Yip Biyn Ana Yip Jiysis Nup Niñrik

²²⁻²³ Pen Mosis Gor low minim ak tikiy, ñi nind tikningambay gok, Gor nup anğningambay anğak ak mey, Mariya ñapan ak tikiy, Jiwda biynimb giyingipay rek, Gor anğniñep korip ak asikiy mindek suñ ayakniñ, Josep yip, Gor ñapan nup ak anğning, dand Jerusalem amiy, Gor anğniñep korip amnirik. ²⁴ Pen low minim bap tikiy,

“Biyñ ñapan tikniñgiy gok suñ ayek, yakir maling akan, kochir omiñal dand Gor anñniñep korip mis ar ak amiy, pik Gor nup simboñg ñiy mey, suñ ayip anñiy, Gor anñniñep korip miñgan ak amniñgambay anñyak.” Gos kun ak kunep niñiy mey, yakir omiñal sek dand amnirik.

²⁵⁻²⁶ Pen Jerusalem amiy, yakir omiñal ak Gor nup simboñg ñiy, korip miñgan amiy niñrik: bi mind tep yimb giy, Gor nup nep anñniñyñgip bap mindek. Yimb nuk ak Simiyon. Nuk Gor Kawnan ak yip mindyñgip ak mey; nup nind anñgak, “Biyomb Gor yokey Yisrel biynimb kuyip diy kond mindeniñgamb ak apek niñiy, kisen kumniñgamban anñgek,” niñmindyñgip.

²⁷ Pen ñin kun ak, Gor Kawnan ak Simiyon nup gos ñek, Gor nup anñniñep korip ak amiy niñak; Josep ber, Jiysis nup dand apiy, Mosis anñgak rek giniñg ap minderik. ²⁸ Kuyip niñiy, Jiysis nup di kaygiy, Gor nup yimb ak dand aranyñg anñgak:

²⁹⁻³⁰ “Biyomb. Ñapan biy yomb giy, chinup di nip yip jimñiy ayniñgamb ak, tep yokey misen niñsipiyn. Kun ak yip anñgak rek yepyey, tep gakniñ kumnim.

³¹⁻³² “Ñapan kun biy, biynimb nand Yisrel kuyip nep danñ anñiy ma yokpan; biynimb yikop okok kuyip kunep danñ anñiy yokpan.

“Pen melik tep nand ak kuyip niñakniñ, chinup Yisrel biynimb yimb ak dand araniñgambay anñgak.”

³³ Simiyon Jiysis nup kaygiy, minim kun ak anñgakniñ, Josep ber gos kuñay niñrik.

³⁴ Pen nuk kuyip bilesiym giyñg, Jiysis

nonim Mariya nup angak, “Ñi nand kun biy mindakniñ, Yisrel biynimb kunaynep namb ak anjilakiy, kinjen tep diy amningambay gok, Gor ker amningambay; kinjen timey diy amningambay gok, apyap pikningambay. Niñyan angyiy, nup yokak ak pen, nup ma diy anjjiwningambay.³⁵ Kun giy mey, yerer giy gos niñiy mindpay rek, biynimb niñningambay. Pen mindmangyiy nip ak kalaw yimb giningamb angak.”

³⁶ Pen ñin kun ak, biyn Gor minim anjep bap kunep ap mindek. Yimb nuk ak Ana. Nop yimb ak Pañiwel. Biynimb Esa angyingipay kiñiñ ak tik dand apiy mey, Ana nup tikyak. Pen Ana simiy nuk ñin jiwiy omiñal nokom, andikiy onep anjip piskind ak yinak. Nind bi diy, nuñgumiy yip minder simiy yin ayak ar ak. ³⁷ Pen nuñgumiy kumakniñ, Gor nup gos anep ayek, ñin gunap tap ñimbis mer, Gor angninep korip ak amiy, pumbnamb kisyimken angnin mindyinigip.

³⁸ Pen nuk Jiysis nup di mindeyak mañ siñak apiy, Gor nup tep angyiy, biynimb Gor chinup diy kond mindeningamb angyiy niñyak gok kuyip angak, “Ñapan biy yomb giy, chinup di Nop yip jimñiy ayingamb angak.”

Jiysis Nup Dand Andkind Nasaret Amnirik

³⁹ Josep ber Gor low minim angyiy tikyak rek giy, tip ak andkind Galiyliy propens amiy, miñmon kiyk Nasaret amnirik. ⁴⁰ Am mindiy Jiysis yomb giy, Gor nup kond mindakniñ, gos tep yimb niñiy, mind tep gak.

Jiysis Gor Anjnip Korip Amnak

⁴¹ Nop nonim ber simiy ak simiy ak, enjol ak Yijip biynimb kuyip pikaying, chinup Jiwda biynimb gok kirkak ñin yomb Pasopa ak miñiy angyi, am Jerusalem nan-giyingipay. ⁴² Kun giy mey, Jiysis simiy nuk yin wimingan ak ayek, nop nonim yip Jerusalem am mindey, ⁴³⁻⁴⁴ ñin yomb kiyk kun ak apiy pandikakniñ, korip amjipun angyi, andkind kinjeñnamb ak apiy niñrik: Jiysis yip ma apeyak. Nuk Jerusalem nep mindek ak pen, kiyk ma niñiy angrik, nuk biynimb gunap yip asaw angyi niñrik. Pen kinjeñnamb ak kiniy, nup ma nep niñiy, ⁴⁵⁻⁴⁸ numiy numam sikop yip mindip akan angyi, piyow andkind Jerusalem amiy niñrik: nuk am Gor nup anjnip korip ak mindiy, biyomb low tiysa gok yip minim anj mindek. Biynimb ap niñmindeyak gok, Jiysis angak rek niñiy, ñi gos kind angyi niñiy, minim anj tep yimb gip ak angyi, wal angyak. Pen nop nonim ber nup kunep niñiy, ñi ak gos nuk ak key niñiy kun gamb, nup ñin omiñal nokom ma niñbur angyi, wal angrik. Nonim pen, Jiysis nup angak, “Nap chirup yenen kun gey, mindmangiy kalaw gakniñ, nip piyow niñraspur?” ⁴⁹ Angek, Jiysis angak, “Yenen yip piyow tangying aspiyr? Bapiy yand korip mindeniñgayn ak ma niñbiyr?” ⁵⁰ Jiysis kun angak ak pen, minim asap ak angyi ma tik niñrik.

⁵¹ Pen ñin kun ak, Jiysis nup poñind andkind miñmon kiyk Nasaret amerik, nuk kun okok mindying, nop nonim angyingipiy rek nep niñiy kindik giyingip. Pen nonim, nuk yerer gak ak

ninjing nep mindyngip. ⁵² Jiysis miñmon Nasaret mindiy, pisnep yomb giy, gos ninrep yimb gek, Gor sek, biynimb gok sek nup ninjey tep gak.

3

*Jon Bi Ñing Pikñemb Ak Minim Angyingip
(Mat 3:1-12; Mak 1:2-8; Jon 1:19-28)*

¹ Rom gapman biyomb yimb Siysa Taybiyriyas, miñmon okok kond mindek, simiy ak yin ayak anjip piskind ak. Pen nuk paryomb okok mindiy, bi kond mindep namb kayañ nuk gunap angek, am miñmon sikoy gunap kond mindeyak. Binuk Ponsis Paylat, Jiwdiya biynimb gok kuyip kond mindek. Binuk Herot, Galiyliy biynimb gok kuyip kond mindek. Herot numam nuk Piyliyp, Yitiwriya biynimb gok sek, Trakonaytis biynimb gok sek kond mindek. Layseniyas, miñmon Abiyliyniy biynimb gok kuyip kond mindek. ² Pen won kun ak, binak Anas yip, Kayapas yip, biyomb Gor nup simbongep omiñal ak Jerusalem minderik.

Pen ñin namb kun ak, Sekaraya ñinuk Jon, biynimb kuñay ma mindeyak namb okok kin mindakniñ, Gor nup gos ñek, ³ Joden ñing gol okok amiy, biynimb gok kuyip minim angyingip, “Tap siy tap timey gipim ak, yenen kun gipun angyi kirgiy, Gor nup nep gosimb ninjem, nimbip ñing pikñen mey; Gor ninjiy kirginingamb angyingip.”

⁴ Jon kuyip Gor minim angyñak kun ak, bi Gor minim angep Asaya, giningamb angyi tikak rek nep gak. Asaya minim tikiy angak:

“Bi bap biynimb kuṅay ma mindpay namb okok meṅg miṅgan dand araniy aṅṅiṅgamb, ‘Per, biyomb asaw aṅgiy, kinjeṅ pindrep giy kond mindpay. ⁵ Kun ak, dum okok piṅiysak tep giy, giw miṅgan okok lum ñi tep giy, kinjeṅ tind mand giy mindonimuj gok; pind yipund giy, kamb gok diyok tep giy, tap siy tap timey gipim ak kirgiy, Biyomb anup kond mindenimimb. ⁶ Kun giy mey, biynimb okok maṅgiyseḱ, Gor binuk yokeḱ biynimb diniṅgamb anup niṅrep giniṅgiy aṅṅiṅgamb’ aṅgiy” tikak.

⁷ Jon Asaya aṅgiy tikak rek aṅgakniṅ, biynimb kuṅaynep mindok ak apiy aṅgyak, “Chinup ñiṅ pikñan aṅgey,” kuyip aṅg giy aṅgak, “Siyṅ saraw ñapan nuk guniy. Yerip gos ak niṅiy pirik opim? ‘Ñiṅ pikon, Gor biynimb gunap kuyip aṅg giniṅgamb ñin ak, chinup ma aṅg giniṅgamb aṅgiy’ pirik opim? ⁸ Ñiṅ pikniṅ, tap siy tap timey gipim gok yenen kun gipun aṅgiy kirgem mey, Gor nup gosimb niṅbay aṅgiy, nimbip ñiṅg pikñanim! Pen gos bap niṅiy, chin Ebrahim ñapan nuk aṅgiy, Ebrahim nup nep gos ak ma niṅnimimb. Nuk tikeḱ, tikey wak gok chin mindpun apim ak, tap yikop. Gor kamb guniy diy, Ebrahim ñapan nuk gunap giniṅg gipkop. Kun ak bi tep Ebrahim tikeḱ; tikey amiy apiy gek chinup tikpay apim ak, Gor niṅek minim rek ma apim.

⁹ “Pen niṅrep ginimimb! Gor mon maṅgiy ma piyip gok timb daṅgiyning, tiw ak mamb giy mindip aṅgak.”

¹⁰ Jon minim kun ak rek aṅgakniṅ, nup pen

aŋgniŋiy aŋgyiŋgipay, “Chinup yergiyaŋ aŋgiy apan?” Aŋgey, kuyip aŋgyiŋgip, ¹¹ “Biynimb tiŋgliys omiŋal mindonimuŋ gok, bap biynimb tiŋgliys ma mindonimuŋ gok kuyip ñiniŋgiy. Pen biynimb tap keñmaŋgiy mindonimuŋ gok, gunap biynimb tap ma mindonimuŋ gok kuyip ñiniŋgiy aŋgak.”

¹² Pen bi takes dep gok, Jon chinup ñiŋg pikñaŋ aŋgiy, ap nup aŋgniŋiy aŋgyiŋgipay, “Tiysa. Chin yerginjun?” ¹³ Aŋgey, kuyip aŋgyiŋgip, “Takes ak diŋiŋg, gapman kay apay rek nep dinimimb. Yesek gunap ma dinimimb aŋgyiŋgip.”

¹⁴ Rom biynimb, amiybi kiyk ap poliys rek mindyiŋgipay gok, Jon nup minim kun ak rek nep aŋgniŋiy aŋgyiŋgipay, “Chin yerginjun?” Aŋgey, kuyip aŋgyiŋgip, “Biynimb gok kuyip timey ma giy, kor yesek giy maniy kuyip ak ma dinimimb. Wong gipim rek nep dinimimb aŋgyiŋgip.”

¹⁵ Pen kun gi mind dand amiy, biynimb gok gos ar bap niŋiy aŋgyak, “Bi biy, Kiyŋ yomb key yimb per kond mindpun ak rek ayip aŋgyak.” ¹⁶ Aŋgey, nuk minim kun ak niŋiy kuyip aŋgak, “Yand nimbip yikop ñiŋg pikñimbiyn; Biyomb yimb ak kisen winiŋgamb. Nuk Biyomb yimb; yand bi yikop. Nup niŋen yip nambiŋ gip. Tomb tirup nup gok tuŋgasikiŋg, tap nup gok marik ginim rek ma ayip. Nuk apiy, Gor Kawnan yipund giy, mon maŋlaŋ rek ak nimbip yokniŋgamb.

¹⁷ “Pen nuk wiyt maŋgiy pikgek gipay rek ak giniŋgamb. Wiyt maŋgiy ñiŋemb gok key ay, wiyt cheŋg gok key ay giniŋgamb. Kun giy,

wiyt mangiy ñinemb gok dand korip nuk amningamb, cheng gok dam mon per yin mindip ak yokningamb angak.”

Herot Jon Nup Kalambis Ayak

¹⁸ Jon biynimb gok kuyip, Gor minim tep ak ar gunap angen ninrep giyan angiy, minim tep kun ak rek sikoy ma angyingip. ¹⁹⁻²⁰ Pen gapman biyomb Herot, tap siy tap timey okok gi dand amiy, numam Piyliyp biynuk Herodiyas nup kunep di gek, Jon, ak girep ma gip angek, Herot ninjiy, nup dam kalambis ayak. Herot kisen timey gak ar bap mey kun ak.

Jon Jiysis Nup Ñing Pikñak

(Mat 3:13-17; Mak 1:9-11)

²¹⁻²² Pen Jon nup kalambis ma ayak won ak, biynimb gok kuyip ñing pikñiyingip. Jiysis nup kunep ñing pikñek, nuk Nop Gor nup angnin mindakniñ, semb biyon ling keykey amek, Gor Kawnan ak yakir kochir rek Jiysis ker wakniñ, minim bap semb biyon nimb apiy angak, “Ñi tep yand! Nip ninen yip tep yimb gip angak.”

Jiysis Nusind Sikop

(Mat 1:1-17)

²³ Pen Jiysis simiy nuk ak ñin jiwiy, andikiy onep ar ak amnakniñ, tikjak Nop Gor nup wong ak gak. Biynimb gok Jiysis nup angninyak-en, “Nop nuk mey; binak Josep angninyak.”

Josep nop ak Heliy.

²⁴ Heliy nop ak Matat.

Matat nop ak Liypay.

Liypay nop ak Melkay.

Melkay nop ak Janay.
Janay nop ak Josep.
²⁵ Josep nop ak Matatayas.
Matatayas nop ak Emos.
Emos nop ak Neyam.
Neyam nop ak Eslay.
Eslay nop ak Nagay.
²⁶ Nagay nop ak Mat.
Mat nop ak Matatayas.
Matatayas nop ak Semen.
Semen nop ak Josek.
Josek nop ak Joda.
²⁷ Joda nop ak Jowanen.
Jowanen nop ak Resa.
Resa nop ak Serababel.
Serababel nop ak Siyaltiyel.
Siyaltiyel nop ak Neray.
²⁸ Neray nop ak Melkay.
Melkay nop ak Eday.
Eday nop ak Kosam.
Kosam nop ak Elmandam.
Elmandam nop ak Yer.
²⁹ Yer nop ak Josiwa.
Josiwa nop ak Eliysa.
Eliysa nop ak Jorim.
Jorim nop ak Matat.
Matat nop ak Liypay.
³⁰ Liypay nop ak Simiyon.
Simiyon nop ak Jiwda.
Jiwda nop ak Josep.
Josep nop ak Jonam.
Jonam nop ak Eliyakim.
³¹ Eliyakim nop ak Meliya.

Meliya nop ak Mena.
Mena nop ak Matata.
Matata nop ak Netan.
Netan nop ak Depiyt.
³² Depiyt nop ak Jesiy.
Jesiy nop ak Obet.
Obet nop ak Bowas.
Bowas nop ak Salmon.
Salmon nop ak Nason.
³³ Nason nop ak Amiyndap.
Amiyndap nop ak Atmiyn.
Atmiyn nop ak Anay.
Anay nop ak Hesron.
Hesron nop ak Peres.
Peres nop ak Jiwda.
³⁴ Jiwda nop ak Jekop.
Jekop nop ak Aysek.
Aysek nop ak Ebrahim.
Ebrahim nop ak Tera.
Tera nop ak Nowa.
³⁵ Nowa nop ak Seruk.
Seruk nop ak Reyiw.
Reyiw nop ak Pelek.
Pelek nop ak Ebey.
Ebey nop ak Sela.
³⁶ Sela nop ak Keynan.
Keynan nop ak Apaksat.
Apaksat nop ak Siyem.
Siyem nop ak Nowa.
Nowa nop ak Lamek.
³⁷ Lamek nop ak Metiwsala.
Metiwsala nop ak Yinok.
Yinok nop ak Jaret.

38 Jaret nop ak Makalalel.
 Makalalel nop ak Keynan.
 Keynan nop ak Enos.
 Enos nop ak Set.
 Set nop ak Andam.
 Andam nup mey, Gor gayak.

4

Seytan Jiysis Nup Yesek Angak (Mat 4:1-11; Mak 1:12-13)

1-2 Pen Jiysis Joden ñing mindiy andkind owakniñ, Gor Kawnan ak nup bak ay, dand miñmon nep namb okok amek, nuk tap ñimbiy mer; yikop nep mindek ñin omiñal jiwak. Pen nuk kun okok girangakniñ, Seytan minim yip ak niñan angiy, ap nup angak, 3 “Nand Gor Ñinuk mindiy ker, kamb biy angey biret rek ayek niñan angak.” 4 Angek, Jiysis nup pen angak, “Baybol buk ak tikiy angyak, ‘Biynimb gok biret nep ñimbiy ma mindeniñgambay angyak.’”

5 Angek, Seytan Jiysis nup dand miñmon yirik paryomb yimb bap amiy, miñmon okok mangiysek yimb yomiy 6-7 angak, “Miñmon teprep guniy niñan! Biyomb keykey kond mindpay. Yand miñmon kun gok mangiysek kond mindpiyn rek, bi bap nup angning angningayn. Kun ak nand kongim yimiy yip angnineniñgamban, miñmon kun guniy mangiysek nip angen, yimb yomb mindakniñ kond mindeniñgamban angak.”

8 Angek, Jiysis pen angak, “Nip ma nep angneniñgayn! Baybol buk ak tikiy angyak,

‘Biyomb chin Gor nup nep angninjiy, wong nup anep giñinimimb angyak’ angak.”

⁹ Kun angek, Seytan Jiysis nup ponind Jerusalem amiy, dand Gor angninep korip yiy akyon giyak ar ak amiy angak, “Nand Gor Ninuk mindpiyn angyi, pinden man biyan ayan!
¹⁰ Baybol buk ak tikiy angyak, ‘Gor enjol nuk gok angek nip kond mindeningambay.’ ¹¹ Minim bap pen tikiy angyak, ‘Apyap pikning gey, nip dand araney, kamb tomb nip ak ma pikningamb angyak’ angak.”

¹² Seytan kun angek, Jiysis angak, “Biyomb Gor windin yirik ar ak, ñiñlon ay kun ak rek ma giningayn. Baybol buk ak, ‘Nup ñiñlon ma ayep angyi tikiyak’ angak.”

¹³ Seytan Jiysis nup minim tom gi mer ninjiy, kiring amiy, gos nuk okok nep, ‘Minek gunap, nup tip ak tom ginim angyi’ kasek ma andkind owak.

*Jiysis Miñmon Galiyliy Kiñin Giy Minim Angñak
(Mat 4:1-11; Mak 1:12-13)*

¹⁴ Pen Gor Kawnan ak Jiysis nup kond mindakniñ, andkind ap miñmon Galiyliy mindiy, key yimb gek ninjiy, minim nup ak ying dand, miñmon Galiyliy namb okok manjiysek amniyak. ¹⁵ Nuk Jiwdan nan-gep korip okok amiy, minim angrep gek, nup bi tep yimb angyi, miñmiñ yimb giyak.

*Nasaret Biynimb Jiysis Nup Ma Diyak
(Mat 13:53-58; Mak 6:1-6)*

¹⁶ Pen Jiysis nuk miñmon Galiyliy namb okok girang diy, miñmon sikoy mindiy yomb gak Nasaret am mindek. Jiwdan lotiw ñin ak apek, per giyingip

rek, nan-gep korip ak amiy, tikjakiy Baybol buk ak riytiym gining gek, ¹⁷ nup bi Gor minim an gep Asaya tikak buk band ak dap ñey, di wisikiy, minim an gning gak day ak niñiy, kuyip riyt giy an gak:

¹⁸ “Biyomb ak, wong nuk gunap yip gan an giy, Kawnan nuk ak yokek yand yip mindip. Kun ak biynimb simbgeprek gok an gep gen niñningambay. Biynimb kalambis rek mindipay gok wisik yoken amningambay. Biynimb windin koy rek mindipay gok gen niñningambay. Biynimb kosyam mindipay gok direp giningayn. ¹⁹ Pen Gor biynimb dningamb ñin tep ak, miñiy owip an giy, biynimb gok kuyip an gningayn an gak.”

²⁰ Jiysis minim kun ak riyt gi day jiwiy, buk band ak kom kom giy, bi buk kond mindyngip anup tip ak ñiy bisgek, biynimb mindeyak gok mangiysek windin ak jiwiy nup nep niñeyak, kuyip an gak, ²¹ “Asaya Biyomb an gek, per kond mindpim kun ak miñiy misen niñsipim an gak.”

²² Kun an gek, minim tep yimb nuk an gak ak niñiy, yimb nup ak dand araniyak. Pen gos bap niñiy an gyak, “Bi kun biy Josep ñinuk rek?”

²³ Kun an ge y, Jiysis kuyip an gak, “Pen yand niñbiyn! Yip an gningambim, ‘Nand Kiyñ yomb key yimb per kond mindpun ak, miñmon Kapaniyam mindiy, tap mageprek gey, yind achimal apek niñbun rek ak, miñmon nak biy kunep gey niñjun an gningambim.’ ²⁴ Pen nimbip niñind aspiyn. Bi Gor minim an gep gok, miñmon bapik okok tan giy, minim tep ak an ge y, niñind apay

anġiy dipay. Pen miñmon kiyk ak key ap anġey, bi chin gok key aspays anġiy minim kuyip ak ma dipay.

²⁵ “Pen niñim! Bi Gor minim anġep Yilayja mindek ñin ak, simiy ominjal nokom takin onep kañgol ak, miñmon ma yimb pikiy, tap ma jakiy, yiwan yomb sikerek yimb ak gak. ²⁶ Yisrel biyn yandiw yiwan gak gok, kuñaynep mindeyak ak pen; Gor Yilayja nup yokek, am miñmon yomb Saydon miñmon sikoy Sareypar amiy, tap mageprek ak gek, biyn yandiw bap keñmanġiy nuk kuñaynep mindek. ²⁷ Pen ar kun ak rek, kisen, bi Gor minim anġep Yilayja mindek ñin ak, Yisrel biynimb soy ayndik ayak gok, kuñay yimb mindeyak ak pen; kuyip gunap gek suñ ma ayak; bi Neman miñmon paryomb Siyriya nimb ak nep gek suñ ayak anġak.”

²⁸ Jiysis kun anġek, biynimb lotiw korip mindeyak gok niñey miluk timey yimb yapek, ²⁹⁻³⁰ nup yuk dam minduñ okok yokon kuman anġiy, yukey amnakniñ, biynimb kuñay mindeyak namb okok amiy kapkap amnak.

*Jiysis Kichekiy Anġ Mis Yokak
(Mak 1:21-28)*

³¹ Nuk miñmon sikoy Kapaniyam Galiyli propens ak am mindiy, Jiwdaw lotiw ñin ak apek, tikjakiy kuyip minim anġñak. ³² Gor minim ak yiñrimey giy, yipund giy yimb nep anġek, wal yimb anġyak. ³³ Pen nan-gep korip namb kun ak, bi kichekiy ambañ ayak bap mindek. Nuk suk yomb anġiy anġak, ³⁴ “Bi Jiysis Nasaret nimb! Yerginiñġ opan? Chinup timey giniñġ opan rek

ayip. Yand nip niñbiyn; Gor bi suñ-tep nuk anep opan angak.”

³⁵ Pen Jiysis kichekiy amban ay mindek kun anup angak, “Minim ma angyi, bi ak kirgiy mis amnon.” Angek, mis amying, bi nonim yipund giy anup, biynimb mindeyak namb sinjak diyokiy amnak ak pen, nup tapin ma pikak.

³⁶ Kun gek, biynimb niñmindeyak gok, kiyk nep angnin angnin giy angyak, “Bi kalrimey kun biy, minim kun ak akay nimb dand apiy angek, kichekiy gok mis ambay angyak.” ³⁷ Pen Jiysis gak minim kun ak, ying dand miñmon kun okok mangyisek amniyak.

*Jiysis Biynimb Gek Suñ Ayak
(Mat 8:14-15; Mak 1:29-31)*

³⁸ Pen Jiysis Jiwda nan-gep korip ak kirgiy, Saymon korip ak amnak. Saymon biyn numok nuk ak tap yomb giy, mumbwak okok mangyisek mon rek yinek mey, biynimb gok apiy Jiysis nup angyak, “Apiy, Saymon numok nup gey, jak amnan angyak.” ³⁹ Angey, nuk biyn tap gek kum mindek man sinjak apiy angak “Tap gip biy suñ ayan angak” Kun angakniñ, won anep suñ ayek, tikjakiy biynimb ap mindeyak gok kuyip tap keñmangyi gak. ⁴⁰ Biynimb kun okok mindeyak gok, minim kun ak niñiy, pumb pañind amnak won ak, biynimb kiyk tap gak gok mangyisek dand Jiysis mindek ak apeyak, kuyip nokom nokom diniñakniñ suñ ayak. ⁴¹ Pen biynimb malñiluk akan, tap yerip amban ay mindek gok, angek mis amying, nup niñyak rek suk yomb angyi angyak, “Nand Gor Ñinuk.” Kun angey,

kuyip kun ma angnimimb angek, angak rek ninjiy mis amniyak.

Jiysis Miñmon Wikan Gunap Amiy Kuyip Minim Anğñak

(Mak 1:35-39)

⁴² Minek miñmon yowakniñ, Jiysis miñmon kun ak kirgiy, key minden angiy, miñmon nep namb okok amnak. Amek, biynimb gok kisen amiy, nup piyow ninjiy angyak, “Okok ma amninin; chin yip mindon angyak.” ⁴³ Kun angey, Jiysis angak, “Gor yip angyokamb opiyn rek, am biynimb wikan gunap kuyip kunep, Gor biynimb diy kond mindeniñgamb rek minim ak angniñgayn angak.” ⁴⁴ Kun angiy, okok giranğyiñg, am Jiwdan-gep korip okok amiy, minim tep kun ak kuyip anğñiyiñgip.

5

Jiysis Angek Piys Kuñay Diyak

(Mat 4:18-22; Mak 1:16-20)

¹ Jiysis ñin bap am ñiñg Galiyliy chemb gol ak mindiy, Gor minim tep ak anğñakniñ, biynimb kuñay yimb nep, minim tep kun ak ninun angiy, chichmiy yimyñg wiyak. ² Kun giy wiyakniñ, Jiysis niñak, bi piys dep gok, bot omiñal dap ñiñg chemb gol kun siñak ay, piys dep wimben gok wasyim gi mindeyak. ³ Nuk Saymon Piyta bot ar ak pidenğ ay angak, “Yip di nembnemb gey, ñiñg namb siñbindon amnan angak.” Angek, Saymon Piyta bot ak di nembnemb gek, ñiñg namb siñak amek, Jiysis bot ar kun ak bisiñg mindyiñg, biynimb gok kuyip minim anğñak.

⁴ Minim anġjiwi, Saymon Piyta nup anġak, “Bot biy pul gi dand ñiņg namb yomb siņbindoņ amiy, wimben ak yokiy piys dim anġak.”

⁵ Anġek, Saymon Piyta anġak, “Biyomb. Miñiy kisyim biyaņ piys nen taņgon taņgon, miñmon yowip ak pen; piys gunap ma dipun. Nand kun apan ak, wimben ak monmon yokniņun anġak.”

⁶ Kun anġiy, wimben yokyakniņ, piys kuņaynep apiy wimben miņgan ak amey, wimben ak aran-jakiy puņgrikniņg rek gak. ⁷ Kun gek niņiy, numam bot ar bap mindeyak gok kuyip ñinan gek apeyak; piys kun gok diy, bot omiņal kun ak ayey, pisnep aran-jakiy, poņgek yowniņg rek gak.

⁸⁻¹⁰ Kun gek niņiy, Saymon Piyta binuk yip bot ar mindeyak gok gos kuņay yimb niņyak. Pen Sebediy ñinuk Jemis yip, Jon yip, bot bap diy Saymon yip woņg jimñiy giyiņgipiyr ak, kunep gos kuņay niņrik. Pen Saymon am Jiysis mindek maņ siņak koņgim yimiy anġak, “Biyomb. Yand bi tap siy tap timey gipiyn ak, nand key okok amnoņ anġak.” Anġek, Jiysis anġak, “Ma piriknimin. Miñiy ñin biy tikiy, bi piys dep ak kirgiy, bi biynimb dand Gor ker owep ak mindeniņgamban anġak.” ¹¹ Kun anġek, bot omiņal ak dam ñiņg gol okok ay, piys tap gok kirgiy, Jiysis nup gosimb niņiy, yip amiy taņgyiņgipay.

Jiysis Bi Soy Ayndik Ayak Bap Gek Suņ Ayak

¹² Pen kisen Jiysis am miñmon yomb bap mindek, bi soy ayndik mumbwak okok maņgiysek ayak bap, ap mindek maņ siņak koņgim yimiy anġak, “Nand yip gey suņ ayniņg, gey suņ ayn-imuņ anġak.”

¹³ Angek, nip gen suŋ ayniŋgamb angyi, nup diniŋakniŋ, suŋ ayak. ¹⁴ Suŋ ayek, bi kun anup angak, “Jiysis yip diniŋek suŋ ayip ma angnimin. Mosis Baybol buk ak tikiy angak rek, soy ayndik yip ak suŋ ayip angyi, am bi Gor nup simbonŋipay gok kuyip yomey, kiyk niŋiy, niŋind apan angey, am siypsiyp ñiluk bap kim tiwning dap kuyip ñiyiŋ angnimin, ‘Yip suŋ ayip rek, Gor nup simbonŋim angyi, siypsiyp ñiluk biy daswiyn angnimin.’ Kun gey, biynimb maŋgiysek niŋiy angningambay, ‘Nup suŋ ayip rek kun gip angningambay.’”

¹⁵ Pen Jiysis nup minim ak, miñmon okok kind kind amek, biynimb kuŋaynep, nup niŋun angyi apyiŋgipay. Biynimb kun gok, gunap minim tep nup ak niŋniŋ apyiŋgipay; gunap chinup gek suŋ ayaŋ angyi apyiŋgipay. ¹⁶ Apey, kuyip minim tep anŋñiy, gek suŋ ayiŋgip. Pen ñin gunap nuk am tip bap key mindiy, Nop Gor nup angnin mindyiŋgip.

Jiysis Bi Ñin Tomb Kalaw Gak Ak Gek Suŋ Ayak

¹⁷ Ñin bap Jiysis biynimb gok kuyip minim anŋñi mindek. Pen namb kun ak, bi Peresiy gunap, bi low tiysa gunap ap biŋiŋ mindeyak. Bi kun gok, gunap miñmon yomb Galiyliy keykey okok nimb; gunap Jiwdiya keykey okok nimb, gunap Jerusalem nimb wiyak. Pen Jiysis Nop kond mindek ak mey, biynimb tap gak gok gek suŋ aynimuŋ rek ayak.

¹⁸ Pen bi gunap, bi ñin tomb kalaw gak bap nup, Jiysis mindek korip miŋgan ak dand amon, gek suŋ ayaŋ angyi, ¹⁹ yirar ay dand amiy niŋyak:

biynimb gok korip miŋgan kun ak pisnep tim-bikdak. Kun gek, bi yirar ay dand wiyak kun ak, dand korip ar biyoŋ amiy, korip ak tungyikiy, Jiysis mindek namb siŋak yokey amnak. ²⁰ Kiyk nuk gek suŋ aynimuŋ rek ayip angyi niŋeyak, Jiysis bi ñin tomb kalaw gak anup angak, “Mam. Tap siy tap timey gach nip chingip ak, niŋiy kirsipiyn angak.”

²¹ Kun angek, bi Peresiy gok sek, bi low tiysa gok sek, gos namb kiyk okok nep key niŋiy angyak, “Bi kun biy an? Nuk Gor nup angyiwiŋg asap. Gor nep mey, tap siy tap timey gach ak, niŋiy kirginiomuŋ rek ayip angyak.”

²² Pen gos niŋyak kun ak, Jiysis key tik niŋiy angak, “Nimb yenen yip gos timey niŋiy kun aspim? ²³ Yand bi ñin tomb kalaw gip biy nup, ‘Tap siy tap timey nip chingip gach ak, wiykyokpiyn angnim?’ Akan; ‘Nip suŋ ayip nen; tikjakiy amnoŋ angnim?’ Akan, minim yerip ak angen, nimbip tep giniŋgamb? ²⁴ Pen niŋrep yimb ginimimb! Minim nup apiyn kun ak, kiñiŋ ak mindip. Bi bap Ñinuk Nop minim ak diy mey; man ar biy apiy, tap siy tap timey gipay gach ak wiykyokniŋgamb angak.”

Kun angyi, bi ñin tomb kalaw gak anup angak, “Miñiy nip suŋ ayip nen; tikjakiy yirar band ak dand andkind korip amnoŋ angak.”

²⁵ Kun angek, biynimb gok niŋmindyakniŋ, won kun anep tikjakiy, nup yirar ay dand wiyak band ak diy, Gor nup tep angyiŋg, korip nuk amnak.

²⁶ Kun gek, niŋiy jiwdiy, Gor nup yimb ak dand

aranying, miñiy key yimb gamb niñsipun angyiy wal angyak.

*Jiysis Liypay Nup Dak
(Mat 9:9-13; Mak 2:13-17)*

²⁷ Pen kisen Jiysis amiy niñak: bi takes dep ak, takes pikyingipay korip miñgan ak bising mindek. Yimb nuk ak Liypay. Jiysis nup niñiy angak, “Apey, yand yip tanğor angak.” ²⁸ Angek, wong giyingip kun ak kirgiy, tap nuk gok mangyisek kirgiy, Jiysis yip tanğyngipiy.

²⁹ Pen Liypay, Jiysis nup tap yomb ak korip nuk ak dangiy ay, bi takes dep gunap, biynimb yikop gunap suk angek apeyak, kiy yip bisgiy tap ñinyak. ³⁰ Pen Jiysis kiy yip tap ñimbek niñiy, bi Peresiy gunap, low tiysa kiyk gok sek ap, Jiysis binuk gok kuyip angyak, “Nimb yenen bi tap siy diy, bi takes diyng maniy siy dipay gok yip bisgiy tap ñimbim?”

³¹ Kun anğeyak, Jiysis kuyip angak, “Biynimb kim mindpun apay gok, dokta niñning ma ambay; biynimb tap gip gok nep, chinup gek suñ ayan angyiy, dokta niñning ambay. ³² Kun ak rek, yand biynimb tep tep gok kuyip dinging ma opiyn; biynimb tap siy tap timey giy, mindrep ma gipun angyiy niñningambay biynimb gok kuyip dinging opiyn angak.”

*Lotiw Gos Ak Nep Niñiy Tap Ma Ñinyak
(Mat 9:14-17; Mak 2:18-22)*

³³ Biynimb gunap Jiysis nup angyak, “Jon binuk gok yip, Peresiy bi kiyk gok yip ñin gunap, Gor nup gos nokom niñjun angyiy, tap ma ñimbiiy yiwan

nep mindiy, Gor nup angninḡbay. Pen binak gok yenen tap ñimbyinḡ, ñinḡ ñimbyinḡ nep mind-pay?”

³⁴ Kun anḡeyak, Jiysis kuyip tikdam ay anḡak, “Chin Jiwda biynimb gipun ar ak; bi bap biyn dininḡ gek, binuk gunap tap yomb ñinḡning geninḡgambay, biynimb gunap pen tikjakiy, yenen kun gispim anḡiy, ma anḡningambay. ³⁵ Pen kisen biyomb kiyk ak nup ñanḡ ayeninḡgambay mey, simb gek tap ma ñinḡningambay anḡak.”

³⁶ Pen Jiysis, Jiwda biynimb minim nind anḡyinḡipay ak, minim yand kisen dand ownik ak sesek wopsakningiy rek ayip anḡiy, kuyip minim gunap paydoḡ ay anḡak, “Chech nindnimb ak talikek, chech kisenimb bap tunḡralikiy, dap ñanḡdey, andip andip ma mindeninḡamb. Keykey yimb ay, omiḡal giy timey yimb giniḡgamb. ³⁷ Pen ñinḡ wayn ak kunep; ñinḡ wayn kim ak diy, kanj meymey wak milip miḡan ak ma sopay. Yenen: soḡiy simjen ñeninḡgambay, tan araniy, biḡ timey yimb anḡiy punḡrikiy soḡgek, meymey wak ak timey giniḡgamb. ³⁸ Kun ak niḡiy mey, ñinḡ wayn kim ak diy, meymey wak kim miḡan ak nep soḡ ayep. ³⁹ Pen biynimb ñinḡ wayn nindnimb ñimbay gok apay, ‘Ñinḡ wayn nindnimb ak tep yimb anḡiy,’ ñinḡ wayn kim kisenimb ak niḡey, kuyip tep ma gip anḡak.”

6

*Lotiw Ñin Ak Yenen Kun Gispim Anḡyak
(Mat 12:1-8; Mak 2:23-28)*

¹ Kisen Jiwda lotiw ñin bap, Jiysis binuk gok yip wiyt woŋg namb ak amyinŋ, binuk gok wiyt maŋgiy kun gok gunap tik ñin beŋ okok ay, wak pikyokiy ñimbyinŋ ñimbyinŋ amniyak. ² Kun geyak, bi Peresiy gunap ninjiy aŋgyak, “Nimb yenen lotiw ñin woŋg magep biy, wiyt maŋgiy wak pik yoksipim?”

³⁻⁴ Aŋgeyak, Jiysis binuk gok giyak kun ak timey ma giyak ak ninjiy, bi Peresiy kun gok kuyip aŋgak, “Depiyt wosrey binuk gok yip yiwan gek, Gor aŋgniŋep korip ak amjakiy, biret Gor windin yirik ar ak ay, bi yikop ma ñimbay; bi Gor nup simboŋgipay gok nep ñimbay biret ak, Depiyt aŋgniŋek, nup ñey, binuk gok yip ñinyak. Kuyip yiwan gek giyak kesim kun ak, Baybol buk tikyak ak, nimb ma ninbim? ⁵ Pen lotiw ñin apim ak, bi bap Ñinuk nep kond mindip aŋgak.”

*Jiysis Bi Ñin Pipich Gak Ak Gek Suŋ Ayak
(Mat 12:9-14; Mak 3:1-6)*

⁶⁻⁷ Pen Jiwda lotiw ñin kisen bap, Jiysis Jiwda nan-gep korip ak amiy, kuyip minim aŋgñiyinŋ mindek. Korip miŋgan kun ak, bi ñin pipich gak bap ap mindek. Bi Peresiy gok sek, bi low tiysa gok sek bi kun ak nup ninyak rek, Jiysis lotiw ñin biy gek suŋ ayniŋgamb akan yergek, nup aŋg gun aŋgiy, ninjinjsek ay mindeyak. ⁸ Pen gos ninyak kun ak, Jiysis key ninjiy, bi ñin pipich gak anup aŋgak, “Nand jakiy namb sinbiy owan aŋgak.” ⁹ Aŋgek, jakiy owakniŋ, nuk bi Peresiy gok sek, bi low tiysa gok sek kuyip aŋgak, “Yikop mindep ñin biy rek, biynimb gok kuyip direp giniŋgambun akan; lotiw ñin aŋgiy kuyip kirginiŋgambun?”

Akan pen, kuyip gon ma jak amningiy; kirgon kumningiy?”

¹⁰ Kun angyi, kuyip ninuskus giy, bi nin timey gak anup angak, “Nin ak almil ayan!” Angek, almil ayaknin, day sun ayak. ¹¹ Jiysis bi kun anup gek sun ayek niniy, bi Peresiy gok sek, bi low tiysa gok sek kuyip miluk yimb yapek, Jiysis nup yerginjun angyi, angnin angnin gi mindeyak.

*Jiysis Binuk Onep Wimingan Ak Dak
(Mat 10:1-4; Mak 3:13-19)*

¹² Pen nin namb kun sinak nin bap, Jiysis Nop nup angniniyn angyi, dum akyon amiy, Nop nup angnin mindek mindek, miñmon yowak. ¹³ Minek pumb waknin, biynimb nuk gok mangyisek angek apeyak, binuk onep wimingan ak kuyip tungasik key ay, kuyip bi minim yip dand amemb gok mindeningambim angyi, angyak.

¹⁴⁻¹⁵ Binuk angyak kun gok yimb kiyk mey;
Bap Saymon. Jiysis yimb nup bap ay, “Piyta”
angak.

Bap Enjriw. Saymon numam nuk ak.

Bap Saymon yimb along, Saymon Selot angyak.

Bap Jemis.

Bap “Jemis Alpiyas” angyak.

Bap Jon.

Bap Piyliyp

Bap Batlomiwiw.

Bap Matyiw

Bap Tomas.

¹⁶ Bap Jiwdas. Nop yimb ak Jemis.

Bap “Jiwdas Yiskariyot” angyak. Nuk nep mey, kisen Jiysis nup ñanryan angyi mimunḡgak.

Biynimb Kunaynep Jiysis Amnakniñ Kisen Amniyak

(Mat 4:23-25)

¹⁷ Pen Jiysis biynimb nuk kun gok yip, dum biyon kirgiy, am giw tep biyan mindyakniñ, biynimb kunay yimb nep, nup niñun angyi ap nan-giyak. Biynimb kun gok gunap Jerusalem nimb, gunap Jiwdiya namb okok nimb, gunap miñmon nambiys Taya nimb, gunap miñmon nambiys Saydon nimb. ¹⁸ Pen biynimb wiyak kun gok, gunap Jiysis minim nup ak niñning wiyak; gunap tap gek, chinup gek suñ ayan angyi wiyak. Pen biynimb kichekiy amban ayek mindrep ma giyak gok, chinup gek suñ ayan angyi, kunep wiyak. ¹⁹ Kiyk kun giy apiy mey, Jiysis nup diniñon, chinup suñ ayniñgamb angyi, ap diniñyakniñ kuyip suñ ayak.

Biynimb Simb Gip Gok Kisen Miñmiñ Giniñgambay

(Mat 5:1-12)

²⁰ Jiysis binuk gok kuyip niñyñg angak, “Nimb biynimb simbgeprek mindpim gok, Gor nimbip diy kond mindeniñgamb!

²¹ “Nimb Gor biynimb tep nuk mindenjun angyi, mindmangyi piñiyñimb gok, biynimb nuk yimb mindeniñgambim!

“Nimbip miñiy yiwan yomb gip gok, kisen yiwan ma giniñgamb!

“Nimbip simb gek siy anḡmindpim gok, kisen tep gakniñ, miñmiñ giyñg mindeniñgambim!

22 “Bi bap Ñinuk nup chingiy mindem, nimbip yiruk niñiy, ‘Biynimb timey kun guniy, an yip mindeningambim angyi,’ nimbip yimb timey ay angyiweningiy, miñmiñ yimb ginimimb. 23 Giningambay kun ak nusind yes kiyk gok, bi Gor minim angep gok kuyip, giyingipay rek nep nimbip giningambay. Kun ak niñiy, Gor chinup direp yimb giningamb miñmon nuk biyon angyi tep gakniñ, ñin beñ pikying, miñmiñ giying mindenimimb!

24 “Pen nimb biynimb maniy tap okok kuñay mindip gok, niñrep yimb ginimimb! Tap nimbik dep rek ak man ar biy pisnep dipim. 25 Pen nimb miñiy tap rek ñimb gem gem kongiy tanimb ak, kisen yiwan yomb giningamb ak niñ-tep ginimimb! Pen miñiy sik minim angying mindpim ak, kisen simb gek siy angmindingambim!

26 “Pen nimbip yimb dand aranying nep mindeningambay ak, niñrep yimb ginimimb. Nusind yes kiyk gok, bi Gor minim yesek angyingipay gok kuyip, kun ak rek giyingipay angak.”

Biynimb Ñan gep Nimb Gok Kuyip Wasemb Aynimimb
(Mat 5:38-48)

27 “Pen biynimb minim yand angen niñsipim guniy. Biynimb nimb yip penpen gep gok kuyip wasemb aynimimb.

Biynimb nimbip miluk niñbay gok kuyip direp ginimimb.

28 “Biynimb gunap, nimbip kunj timey geningiy, kuyip pen wasemb aynimimb.

“Biynimb gunap, Gor nimbip timey ginimun anġeniġiy, nup anġniġem, kuyip kond mindon-imuġ.

²⁹ “Pen biynimb gunap, nimbip mikem pis ak pikeniġiy, andikem, piskind ak kunep pikniġiy.

“Pen biynimb gunap, kolsiyor nimbip ak deniġiy; tiġliys ak kunep dim anġiy, monmon ñinimimb.

³⁰ “Biynimb gunap, tap nen asimb anġeniġiy, niġind apim anġiy ñinimimb.

“Pen tap nimbip bap niġiy deniġiy, chinup jiwnan anġiy ma anġnimimb.

³¹ “Chinup giyaġ anġiy niġbim rek nep, biynimb gok kuyip ginimimb.

³² “Biynimb nimbip wasemb aypay gok nep wasemb ayniġgambim ak, yergiy Gor nup tep giniġgamb. Biynimb tap siy tap timey gipay gok, biynimb kiyk key gok penpen wasemb aypay.

³³ “Pen biynimb nimbip direp gipay gok nep direp giniġgambim ak, Gor nimbip yergiy niġek tep giniġgamb. Giniġgambim kun ak, biynimb tap siy tap timey gipay gok, gipay rek nep giniġgambim.

³⁴ “Tap ñon pen ñiniġgambay anġiy, gos anep niġiy tap ñiniġgambim ak; Gor nimbip yergiy niġek tep giniġgamb. Giniġgambim kun ak, biynimb tap siy tap timey gipay gok, gipay rek nep giniġgambim. ³⁵ Kun ak biynimb nimb yip penpen ñanġep gok wasemb ay, direp giy, tap monmon ñinimimb. Chinup pen ñiniġgambay anġiy, gos ak ma niġnimimb. Nap yomb jel gip ak gip rek geniġgambim mey; nimbip sakiy ma giniġgamb. Nuk biynimb tap siy tap timey gipay

gok sek, nup tep ma apay gok sek kuyip kond mindip.

³⁶ “Nuk biynimb simb niñiy dip rek, nimb kunep ginimimb.

Chin Biyomb Anjiy Biynimb Gok Kuyip Ma Anjiwnimimb

³⁷ “Pen chin biynimb tep anjiy, biynimb gunap kuyip gos timey niñningambim ak, minim kun ak andkind nimbip ker winingamb.

“Biynimb nimbip timey gipay gok niñiy kir-
geningambim, Gor pen tap timey nimb gipim gok
niñiy kirginingamb.

³⁸ “Tap nimb gok mapin kamb ma giy, biynimb
gok kuyip monmon ñeningambim mey; Gor nim-
bip pen kunep ñiningamb. Pen mapin kamb giy,
sikoy sikoy nep ñeningambim, Gor nimbip pen
kunep giningamb angak.”

³⁹ Pen Jiysis minim bap paydon ay angak, “Bi
windin koy bap, bi windin koy bap nup kinjen
ak mindip kun anjiy, ma yomningamb. Yenen,
nuk kun gek, omiñal giy kaw miñgan ak apyap
pikningayr.

⁴⁰ “Biynimb sikul apay gok, am sikul apay won
ak, tiysa kiyk gok kuyip wiyniyim ma gipay. Pen
kisen sikul ak anj tep giy mey; tiysa kiyk gok yip
andip andip mindeningambay.

⁴¹ “Yenen mon bopis windin nimbip pik yiw
giy mindip ak niñanjiy mer, namam tap achip
windin nup mindip anep niñapim? ⁴² Mon bopis
yomb nimbip pik yiw giy mindip ak diyokem,
windin yimb ayek rek, yesek namam tap achip

sikoy windin nup mindip ak ‘Diyokan angyi apim.’

*Mon Bind Tep Akan Timey Angyi Niñningambay
(Mat 7:17-20; 12:33-35)*

⁴³ “Pen mon teprep bind ak mañgiy timey ma piyp. Mon timey bind ak, mañgiy tep ma piyp. ⁴⁴ Kun ak mon gok piyek niñiy, mon ak tep; mon ak timey angyi niñbay. Mon ñiwñiw sek sanğandlem rek gok, mon tep kondyap rek ma piyningamb. ⁴⁵ Biynimb mindrep gipay gok, namb kuyip biyañ tep mindip rek, mind tep gipay. Biynimb mindrep ma gipay gok, namb kuyip biyañ mindrep ma gip rek, mind tep ma gipay. Pen biynimb yerip rek mindpay ak, minim kiyk anğey niñiy; biynimb gok tep, biynimb gok timey angyi niñningambun.

*Bi Korip Gep Omiñal
(Mat 7:24-27)*

⁴⁶ “Yip Biyomb chin, Biyomb chin, apim ak pen; minim apiyn ak kisen ma gipim. ⁴⁷ Biynimb minim yip ak niñiy, apiyn rek gipay gok; ⁴⁸ bi man kilis ar ak korip gek, ñiñg wilik apiy ma dand amnak rek ak mindpay. ⁴⁹ Pen minim yip niñiy kisen ma gipay gok, bi man sayn ar ak korip gek, ñiñg wilik apiy, pisnep tunğjispuk giy, dand amnak rek ak mindpay anğak.”

7

*Jiysis Bi Wong Giñemb Bap Gek Sun Ayak
(Mat 8:5-13)*

¹ Jiysis biynimb kun gok kuyip minim anjñindiy, Kapaniyam amnak. ²⁻³ Pen miñmon tinjon kun okok, biyomb amiybi kunaynep kond mindyngip bap mindek. Nuk minim bap niñak: Jiysis ap Kapaniyam mindek. Kun ak niñiy, Jiwdiya miñmon nop nimb biyomb gunap angyokiy angak, “Bi tep wong yip giñemb ak, tap giy kumning gisap nen, nimb am Jiysis nup poñind apem, gek suñ ayan angak.”

⁴⁻⁵ Angek, Jiysis mindek ak apiy, kilis giy angyak, “Amiybi kond mindep ak, bi tep yimb. Chinup Jiwda biynimb gok per kond mind tep giy, nan-gep korip chinup bap gak. Kun ak nand bi wong giñemb nup ak am gey, suñ aynimun angyak.”

⁶ Angey, Jiysis bi kun gok yip am am korip sinak mañ mañ giyakniñ, amiybi kond mindep kun ak, minim bap pen, bunjiy nuk gunap kuyip angyokek, am Jiysis nup namb pikiy angyak, “Biyomb ak nip anjip, ‘Biyomb! Yand bi tep mer, korip yip ak tomb yiwur ma winimun. ⁷ Yand bi tep rek nip ker ninim. Pen yand niñbiyn; Gor nip bak ay mindip ak, suñ ayan anjiy minim anep angenimin, bi yip tap gip biy suñ aynimun. ⁸ Kond mindep yomb yimb yand ak yip kond mindek; yand pen, amiybi gok kuyip kond mindiy, “Am-nim!” anjen ambay; “Wim!” anjen opay; wong ak kun kun giy gim anjen gipay anjip’ angyak.”

⁹ Kun angeyak Jiysis, bi kun ak gos nuk key niñiy anjip anjiy, wal angying, biynimb nup kisen giy apeyak gok kuyip angak, “Amiybi Rom nimb ak, yip gosimb niñmindiy, chingrep yimb gip. Yisrel

biynimb gunap, yip gos niṅrep giy gip kun ak rek gey, ma niṅbiyn angak.”

¹⁰ Pen amiybi kond mindep ak, binuk gok andkind amiy niṅyak; Jiysis par okok nep mindiy angek, bi tap gak kun ak pisnep suṅ ayak.

Jiysis Biyn Yandiw Ak Ñinuk Nup Gek Tip Ak Tikjakak

¹¹ Ñin namb kun siṅak nep, Jiysis dawin sikoy Nayn amniyn anḡiy amnakniṅ, binuk gok sek, biynimb yikop gok sek kuṅaynep, nup kisen giy amniyak. ¹² Am am miñmon kun ak, kinjeṅ day ak amjakyakniṅ, biyn yandiw bap ñi nokom tikak ak kumek, biynimb kuṅaynep yirar ay dand apeyak. ¹³ Jiysis biyn yandiw kun anup niṅek, simb gek angak, “Siy ma anḡan!” ¹⁴ Kun anḡiy, chip yirar ay dand apeyak ak am diniṅakniṅ, lum siṅak dayak. Day niṅmindyakniṅ, Jiysis bi paranj kun anup angak, “Ñi tikjakan!” ¹⁵ Anḡek, tikjak bisgiy minim angakniṅ, nonim nup, “Ñinak ak biy angak.”

¹⁶ Pen biynimb niṅmindeyak gok gos kuṅay niṅiy, Gor nup yimb ak dand aranyinḡ anḡyak, “Gor bi minim nup anḡep yomb bap yokamb, chinup ker wip. Gor chinup ay mindniṅ wip anḡyak.” ¹⁷ Pen Jiysis gak kun ak niṅiy, kesim dey, miñmon Jiwdiya amiy, miñmon yikop okok amiy gak.

*Jon Bi Ñinḡ Pikñemb Binuk Omiṅal Jiysis Nup Niṅniṅ Amnirik
(Mat 11:2-6)*

¹⁸ Jon binuk gok, Jiysis gak rek maŋgiysek niŋiy, am Jon nup aŋgñeyak, Jon binuk omiŋal aŋgek aperik aŋgak, ¹⁹ “Nirmiŋay am nup aŋgniŋiy aŋgnimiyr, ‘Nand Kiyŋ yomb key yimb kond mindpun anep opan akaŋ, bi kun ak key kond mindenjun aŋgnimiyr’ aŋgak.”

²⁰ Aŋgek, Jiysis mindek ak amiy aŋgrik, “Jon bi ñiŋ pikñemb ak nip aŋgip, ‘Nand Kiyŋ yomb key yimb kond mindpun ak nep opan akaŋ, bi kun ak key kond mindonjun aŋgiy,’ chirup aŋgyokek, nip aŋgniŋiŋiŋ aswur aŋgrik.”

²¹ Pen kiykmiŋay kun aŋgiy niŋmindrikniŋ, Jiysis biynimb miñak ar keykey gak gok gek suŋ ayak. Biynimb tap gak gok, gek suŋ ay, windin koy gak gok, gek windin yimb ay, biynimb kichekiy malñiluk ambaŋ ay mindek gok, gek biynimb yimb ay gak. ²² Kun giy, Jiysis bi omiŋal kun ak kuyip aŋgak, “Nirmiŋay andkind amiy, Jon nup aŋgnimiyr, ‘Chir amiy niŋbur: bi kun ak biynimb windin koy gip gok, gek windin yimb ay; biynimb ñin tomb soy ayndik ayip gok, gek suŋ ay; biynimb timund sakiy ayip gok, gek suŋ ay; biynimb kumbay gok, gek tip ak tikjakiy; biynimb simbgeprek gok, minim tep nuk ak aŋgek niŋbay aŋgnimiyr’ aŋgak. ²³ Pen minim bap aŋgnimiyr, ‘Biynimb yip gosimb niŋiy, chiŋgiy nep mindeniŋgambay gok, miñmiñ yimb giŋiŋgambay aŋgnimiyr’ aŋgak.”

²⁴ Kun aŋgek, bi Jon nup minim dand orik omiŋal ak andkind amnirikniŋ, Jiysis biynimb ap mindeyak gok kuyip, Jon nup minim ar ak aŋgiy aŋgak, “Nimb nind miñmon nep namb okok

ambik ñin ak, yergining ambik? Sund par nokom bap yingen diy, dand amiy apiy gek ak niñning ambik? ²⁵ Akan yenen ambik? Bi chech tep ayak bap niñning ambik? Bi chech tep yimb diy, tap tep tep dun angyi niñbay gok, mindpay biyomb korip okok nep. ²⁶ Pen tap yerip ak niñning ambik? Yikop ma ambik! Bi Gor minim angep, Jon nup nep niñning ambik. Nuk bi Gor minim angep yikop bap mer; wong bap key mindek, Gor nup angek ap minim angnak. ²⁷ Bi Gor minim angep kun anup mey, wosrey Baybol buk ak tikiy angyak, ‘Gor angyip, “Bi minim angep yand ak angen, nind amiy, biynimb gok angrep gek, kisen Ñi yand ak angen niningamb angyip” angyi’ tikyak. ²⁸ Nimbip aspiyn, Jon biynimb nind mindyngipay gok yip, miñiy mindpay gok yip mangiysek wiyniym gip ak pen, Gor biynimb yikop diy kond mindeningamb gok, Jon rek ma mindeningambay; kiyk biynimb yomb mindeningambay angak.”

²⁹ Jiysis minim angak kun ak; biynimb yikop gok sek, bi takes dep gok sek nind apey, Jon kuyip ñing piknek, Gor nup yimb ak dand araneyak mey kun angak. ³⁰ Pen bi Peresiy gok sek, bi Jiwda low tiysa gok sek alemb alemb ñiy, Gor minim tep ak ma diyak rek, chinup ñing ma pikningamb angey mey, kuyip ñing ma piknak.

³¹⁻³² Jiysis kun angyi, kuyip angak, “Nimb biynimb miñiy, ñin namb biy mindpim gok, ñapan sikoy gok silpin ñiying, gunap apay, ‘Dachin pikon, yenen kongim ma papim? Pen kamep simbeprek angon, yenen siy ma apim apay’ rek ak

gipim. Nimb ninem, Jon gak ak tep ma giy, yand gipiyn ak tep ma giy gip. ³³ Jon bi ñiņg pikñemb ak, ap tap ma ñimbiy, ñiņg wayn ma ñimbiy gek, nup aņġjiwiy aņgyiņgipim, ‘Bi kichekiy malñiluk ambaņ ayek mindip ak aņgyiņgipim!’ ³⁴ Pen miñiy bi bap Ñinuk apiy, tap ñimbiy, ñiņg wayn ñimbiy gek, nup aņġjiwiy apim, “Tap kuņay ñimbiy, ñiņg wayn ñimbiy gip ak mey; nuk biynimb tap siy tap timey gipay gok sek, bi takes dep gok sek bi kiyk apim.” ³⁵ Pen, biynimb Gor miñ ar ak, chinup tep gip aņġiy niņbay gok nep, ar kun ak ambay aņgak.”

Kinjenram Biyn

³⁶ Bi Peresiy bap, yimb nuk Saymon. Nuk Jiysis nup aņgak, “Apey korip yand ak am tap ñiņjur aņgak.” Aņgek, Jiysis korip nup ak amiy tap ñiņriknii, ³⁷ kinjenram biyn miñmon kun ak nimb ak, minim bap niņak; Jiysis ap bi Peresiy ak yip tap ñimberik. Kun ak niņiy, wel kuy tep wak, kamb botol diy paryak ak dand apiy, ³⁸ Jiysis mindek kund okok ken amiy, tomb aņgin ak bisgiy, siy aņg mindek. Kun giy, siy aņg mindakniņ, siy ñiņg ak tik Jiysis tomb ar ak yapek, jun kas nuk ak wiykyokiņg, tomb kind nup ak wel ayñiy, bom silokiņg silokiņg mindek.

³⁹ Kun gek, bi Peresiy ak gos nuk anep niņiy aņgak, “Bi kun biy, bi Gor minim aņgep yipund giy mindembikop rek, biyn kinjenram ker ap nup diniņsap ak, tik niņbikop aņgak.” ⁴⁰ Jiysis bi Peresiy gos niņak kun ak niņiy, nup aņgak, “Saymon! Minim nip nokom bap aņgniņg gispiyn aņgak.”

Angek, Saymon angak, “Tiysa. Minim kun ak angan angak.”

⁴¹ Angek, Jiysis tikdam ay angak, “Bi bap tikjakiy, bi ominjal kuyip, bap nup payp handret kiyna ñiy, bap nup piyptiy kiyna ñiy, giningamb.

⁴² Pen kisen bi ominjal kun ak, pen ñemb rek ma ayek, bi maniy ñiningamb kun ak, kuyip-minjay angningamb, ‘Maniy nirip ñimbiyn ak, pen ñinjur angyiy gos ak ma niñnimiyr angningamb.’ Kun angek, bi an bi kun ak nup miñmiñ yimb giningamb? Bi tap day yomb mindeningamb ak akan, bi tap day sikoy mindeningamb ak?”

⁴³ Angek, Saymon angak, “Gos yand niñbiyn ak, bi tap day yomb mindeningamb ak angak.” Angek, Jiysis angak, “Niñind yimb apan angak.”

⁴⁴ Kun angyiy, Jiysis andikiy biyn anup niñying, Saymon nup angak, “Biyn biy nup niñan! Yand korip miñgan nip biy apen, ñing ak diy tomb yip ak ma wasyim gipan; biyn biy yip miñmiñ giying, siy ñing nuk ak tik yapek wasyim giy, jun kas nuk ak wiykek milip gip. ⁴⁵ Yip ma bom silokpan; biyn biy nep apiy tomb kind yip ak bom silokip. ⁴⁶ Yip wel ak ma ayñimban; biyn biy nep tomb kind yip ak, wel kuyrep wip ak ayñimb. ⁴⁷ Kun ak nip aspiyn: biyn kun biy tap siy tap timey kuñaynep gip ak niñiy kirgen, yip pen direp yimb gip. Pen biynimb tap siy tap timey siskoy gipay gok niñiy kirgen; yip pen direp ma gipay angak.”

⁴⁸ Kun angyiy, biyn kun ak nup angak, “Tap siy tap timey gipan ak, niñiy kirpiyn angak.”

⁴⁹ Kun angek, bi nund yip tap ñimbeyak gok, kiyk key angnij angnij giy angyak, “Bi kun biy

yenen, “Tap siy tap timey gipim ak ninjy kirsipiyn asap?” Gor nep mey kun gipkop angyak.”

⁵⁰ Kun angyak ak pen, Jiysis biyn kun anup angak, “Gos nand anep, tap siy tap timey gipiyn rek, Jiysis ninjy kirgan angyi opan ak, nip ninjy kirsipiyn nen, andkind amiy, Gor ñin ar ak mindenimin angak.”

8

Biy Gunap Jiysis Yip Amniyak

¹ Pen kisen ñin namb kun siñak, Jiysis binuk onep wimingan ak yip, miñmon yomb miñmon sikoy okok amiy, Gor biynimb nuk diy kond mindeningamb minim tep ak, biynimb okok kuyip angnak.

² Pen ñin kun ak, biyn tap gek, Jiysis gek sun ayak gunap, kichekiy malñiluk sek mindey, nuk gek biyn yimb ayak gunap, yip tangyngipay. Biyn kun gok yimb kiyk mey, bap “Makdala biyn Mariya” angyngipay. Nup kichekiy onep ar ak mindek Jiysis angyokak. ³ Biyn bap Jowana. Nunyumiy yimb ak Chiwsa. Nuk biyomb Herot korip tap nup gok kond mindyngip. Biyn bap Siwsana. Kiyk biyn yikop gunap yip, maniy kiyk gok key dam tap taw dand apiy, Jiysis binuk gok yip, tap jimñiy ñimbyng girangyngipay.

Wiyt Manjiy Yimbay Angiy Paydon Ay Angak (Mat 13:1-9; Mak 4:1-9)

⁴ Biynimb miñmon keykey, tiwin gok tiwin gok, Jiysis nup niñning kisen wiyakniñ, biynimb nind wiyak gok kuyip, minim bap paydon ay angak, ⁵ “Bi bap wiyt jakan angyi, wiyt manjiy ak

dam wongday okok yokeningamb, gunap kinjen kosemb ar ak yapek, biynimb gok taw amiy apiy gey, yakir gok pen ap ninjy ninjngambay. ⁶ Gunap kamb ar man siskoy aynjngamb okok yapiy, gup giningamb ak pen, kindiy am wos ma giningamb rek, pisnep milip giningamb. ⁷ Pen gunap, kikasik dindbilij namb okok yapeningamb, tap kun ak saw giy, yiwing dek, ma jakningamb. ⁸ Pen gunap, lum teprep okok yapiy, jakrep yimb giy, mangiy kunjay yimb nep piyningamb angak.”

Jiysis kun angiy angak, “Nimb biynimb gos timund sek mindenimimb gok, minim aspiyn biy ninjnimimb angak.”

*Paydonj Ayak Minim Ak Misenj Angak
(Mat 13:10-17; Mak 4:10-12)*

⁹ Kun angak, binuk gok nup angninjy angyak, “Minim paydonj ay anggamban kun ak, minim junj nuk yergiy mindip?” ¹⁰ Angey, Jiysis kuyip angak, “Gor biynimb nuk diy kond mindeningamb minim weygiy mindyngip ak, nimbip gos ñek ninjngambim; pen biynimb yikop gok: ‘Angip kun angiy ma piyow ninjngambay.’”

¹¹ “Pen minim paydonj ay tap yij rek apiyn ak, Gor minim ar ak apiyn. ¹² Mangiy gunap, yownjngamb kinjen kosemb ar apiyn ak; biynimb gok Gor minim ak ninjng gey, Seytan gek sakiy giningambay angiy apiyn. ¹³ Pen mangiy gunap, yownjngamb kamb ar man siskoy ayak okok apiyn ak, Gor minim ak ninjey tep gaknij, nup gos ninjngambay ak pen, gos kilis yimb giy ma ninjngambay rek, miker gunap apek nup kirginingambay angiy apiyn. ¹⁴ Pen mangiy

gunap, yowningamb kikasik dindbiliņ namb okok apiyn ak; biynimb gok Gor minim niņningambay ak pen, kisen minim miker akan; miñmiñ gep ar ak nep gos niņiy, Gor nup gos kilis giy ma niņningambay anġiy apiyn. ¹⁵ Pen yiņ maņġiy gunap, man tep yimb siņak yapiy, jak tep giy, maņġiy kuņay yimb nep piyningamb apiyn ak; biynimb gok minim tep ak niņiy, di wos yimb giy, mindrep yimb giniņgambay gok kuyip apiyn.”

Melik Ak Ma Weyginimimb
(Mak 4:21-25)

¹⁶ “Pen biynimb gok lam danġiy, tiyn miņgan okok akan, bonġ ar kinbay beņ okok ma aypay. Melik gek biynimb niņyan anġiy, ar siņbiyoņ ayey mey, biynimb gok korip miņgan apyiņ, melik kun ak niņningambay. ¹⁷ Minim weyġiy rek mindyiņġip ak; niņnimimb rek nep mindeniņgamb. ¹⁸ Kun ak minim apiyn gok niņrep yimb ginimimb. Biynimb minim niņiy, niņdiniņgambay gok, minim tep gunap sek niņningambay; pen biynimb minim niņiy ma niņdiniņgambay gok, sikoy niņjun anġiy niņbay ak sek, pisnep kurginiņgamb.”

Jiysis Nup Niņning Wiyak
(Mat 12:46-50; Mak 3:31-35)

¹⁹ Pen ñin kun ak, Jiysis numam gunap nonim yip, nup niņning wiyak. Apiy niņyak: korip miņgan kun ak timbik giy anġiy mindek niņiy, mis ar akyaņ mindeyak. ²⁰ Kun gek, biynimb ap mindeyak gok niņiy, Jiysis nup anġyak, “Nanim namam nak gok, nip niņning ap mindpay mis biyaņ anġyak.”

²¹ Angey, Jiysis kuyip angak, “Biynimb siŋok Bapiy Gor nup minim ak niŋiy, kindik gipay gok mey; amiy yand, mam yand rek ayip angak.”

Jiysis Angek Pinim Yomb Dek Ak Kirgak
(*Mat 8:23-27; Mak 4:35-41*)

²² Pen ñin bap Jiysis binuk gok yip, “Galiyliy chemb tikiy pis bindoŋ amnun angiy,” bot ak diy sanđiyak. ²³ Namb okok amying, Jiysis nuk wisin kin amnak won ak, pinim yomb yimb ak ñiŋg namb kun ak diy, ñiŋg paŋg bot miŋgan ak amek, kumniŋgiy rek nep ayak. ²⁴ Kun gek, binuk gok ap, Jiysis nup kikawin gey tikjakek angyak, “Biyomb! Chin maŋgiysek kumniŋg gispun angyak.”

Angey, Jiysis angek pinim yomb dek kun ak won anep kirgiy, ñiŋg paŋg apek ak kirgiy, nind mindek rek mindek. ²⁵ Pen binuk gok kuyip angak, “Gor nup gosimb niŋbim rek ayip ak, yenen nup angninem tap gamb kun ak ma kirgip?”

Angek, kiyk pirikiy, angnin angnin giy, “Bi kun biy an? Pinim yomb dip ak sek, ñiŋg yomb paŋgip ak sek minim angip rek nep gip angyak.”

Bi Kichekiy Malñiluk Sek Ak Suŋ Ayak
(*Mat 8:28-34; Mak 5:1-20*)

²⁶ Pen bot kun ak diy, Galiyliy chemb namb ak am am, Gerasa biynimb mindeyak pis okdoŋ ken amniyak.

²⁷ Pen miñmon kun ak, bi kichekiy malñiluk kuŋay yimb ambaŋ ayak bap mindek. Bi kun ak nuk daynep mindiy, korip yimb miŋgan ak ma kinyiŋgip; chip komyiŋgipay kamb miŋgan okok nep kin taŋgiŋgip. ²⁸⁻²⁹ Bi nup kond mindep

gok, sen diy, ñin tomb nup gok tiwning was giyngipay ak pen, kichekiy tap gok ap kilis gey, sen ayngipay kun gok gek pungrikek, miñmon nep namb okok pernep amyngip.

Pen bi kun ak, Jiysis nup niñiy wal angyiy, ap tomb angin sinak kongim yimek, Jiysis tap nup amban ayak kun gok kuyip angak, “Bi kun biy nup kirgiy mis amnim angak.”

Kun angakniñ, bi kun ak nup tap amban ayak kun gok, nembnemb gey, minim yomb angyiy angak, “Nand Gor Biyomb jel gip Ñinuk ak, yip tap gining gispan ak ma ginimin angak.”

³⁰ Angek, Jiysis angak, “Yimb nand ak angan.” Angek angak, “Yimb yand ak ‘Ñin jiwiy’ angak.” Kichekiy malñiluk gok kuñay yimb molik sikiy mindeyak rek mey, kun angak.

³¹ Pen kichekiy gok, Jiysis nup minim yomb angyiy angyak, “Chinup anğ mon key yinjap kaw miñgan yomb ak ma yokninin angyak.” ³² Kun angyiy niñyak; kanj kuñay yimb nep amil geyak yep pir kun sinak. Jiysis nup angyak, “Chinup angey, am kanj mindpay gindon kuyip molik sikun angey, ³³ Jiysis “Yaw” angek, bi anup kirgiy, am kanj kun gok kuyip molik sikey, kanj gok punğjiw mindun biyan amiy, gindam ñing mangyiy chemb namb biyan pikiy, ñing ñimbiy mangyisek kumdiyak.

³⁴ Pen bi kanj mokep gok, Jiysis gak kun ak niñiy, punğrikind angyiy am biynimb miñmon yomb mindeyak gok kuyip anğñiy, am biynimb miñmon yikop okok mindeyak gok kuyip anğñiy giyak.

³⁵ Kun giy anğñeyak, “Tap kun ak yergek niñiy aspay anğiy,” apiy niñyak: bi kichekiy molik sikiy mindyñgip ak, biyimb ay, walinj yimiy, Jiysis tomb anğin siñak biñing mindek niñiy, pirikyak.

³⁶ Pen biynimb niñmindey Jiysis kichekiy anğ mis yokak gok, biynimb kisen wiyak gok kuyip, kun kun gip anğiy anğñiyak.

³⁷ Pen Gerasa biynimb mañgiysekiy kuyip jel gek, pirikiy, Jiysis nup anğyak, “Nand andkind amnon anğey,” bot diy amniñg gakniñ, ³⁸ bi kichekiy ambañ ay mindek, Jiysis gek biyimb ayak ak, Jiysis nup anğak, “Yand nand yip amjipur anğak.”

³⁹ Kun anğek, Jiysis nup anğak, “Mer. Gor nip yerer gip ak, am biynimb nand gok kuyip anğñinimin anğak.” Anğek, nuk andkind amiy, biynimb gok kuyip, Jiysis yip kun kun gip anğiy anğñak.

Pañ Kumak Ak Sek; Biyn Jiysis Nup Diniñek Sun Ayak Ak Sek

(Mat 9:18-26; Mak 5:22-43)

⁴⁰ Pen biynimb Jiysis asaw anğiy kond mindeyak gok, nuk bot diy amjakek niñiy, “Tep aswan anğyak.”

⁴¹⁻⁴² Pen biyomb Jiwda nan-gep korip kond mindyñgip bap, yimb nuk Jayras. Pañ nuk nokom yimb simiy yin ayak wimiñgan ak kumiñg gek, Jiysis mindek siñak ap koñgim yimiy anğak, “Apey, korip yand amnur anğak.” Anğek, Jiysis niñniñg amnakniñ, biynimb kuñay yimb nep, ap nup pis pis chichmiy yimyñg amniyak.

⁴³⁻⁴⁴ Pen biyn bap, biyn kinjeñ pandikakniñ mindek, simiy yin wimiñgan ayak bap, Jiysis

amek kund okok ken apiy, chech paryomb ayak ak dininjakniņ, suņ ayak. Biyn kun ak, dokta gok yip gey suņ ayaņ anġiy, kuyip maniy ñiyiņgip ak pen, nup gey suņ aynimuņ rek ma ayak.

⁴⁵ Pen Jiysis kuyip anġak, “Yip an dininimb?” Anġek, biynimb gok anġyak, “Chin ma niņbun anġyak.” Anġey, Piyta anġak, “Biyomb. Biynimb kuņaynep akniy, ap nip chichmiy yimey niņiy aspan rek ayip anġak.”

⁴⁶ Anġek, Jiysis anġak, “Biynimb nokom bap yip dininġek, suņ ayip ak niņiy aspiyn anġak.”

⁴⁷ Pen biyn Jiysis nup dininjak kun ak, weyginimuņ rek ma ayek niņiy, jep diyiņg, Jiysis mindek maņ siņak ap koņgim yimiy, biynimb gok niņmindyakniņ anġak, “Yip biyn kinjeņ minek minek pandikip ak, nip dininġen pisnep suņ ayip anġak.”

⁴⁸ Anġek, Jiysis anġak, “Pañ yand. Yip gosimb niņiy, nup dininġen yip suņ ayningamb anġiy, dininġey nip suņ ayip ak, minim ma mindip. Amnoņ anġak.”

⁴⁹ Jiysis kun anġakniņ, bi Jayras nup wong ġiņiyiņgip ak apiy, Jayras nup anġak, “Panak pisnep kumimb; tiysa nup anġey tomb yiwur ma winimuņ. Anġey, andkind amnaņ anġak.”

⁵⁰ Anġek, Jiysis minim kun ak niņiy, Jayras nup anġak, “Pañ yand ak kumimb anġiy gos ak ma niņnimin. Yip gosimb niņeniņgamban, gen tikjakniņgamb anġak.”

⁵¹ Kun anġiy korip ak amjakiy, biynimb gok kuyip maņgiysek anġ mis akyaņ ay; pañ nop nonim omiņal ak, Piyta ak, Jon ak, Jemis ak kuyip

ponjind pañ kun ak niñning, korip mingan biyan amniyak. ⁵² Pen pañ ak kumimb angyi, biynimb siy anğ mindeyak gok, Jiysis kuyip anğak, “Siy ak ma anğim. Ñapan kun biy ma kumimb; yikop wisin kinjap anğak.”

⁵³ Kun angek, nup sik angyi angyak, “Ñapan pisnep kumimb ak, yenen kun asap angyak.”

⁵⁴ Pen Jiysis pañ kumak kun anup, ñin kind ak diy anğak, “Tikjakan!” ⁵⁵ Kun anğakniñ, kawnan nuk ak tip ap tokow gek tikjakak. Jiysis nop nonim kuyip anğak, “Tap gunap ñer ñinanj.” ⁵⁶ Kun angyi, kuyip ber anğak, “Biynimb gunap kuyip, minim kun ak ma yimb anğñinimiy anğak.”

9

Jiysis Binuk Gok Kuyip Anğ Wikan Keykey Yokak

(Mat 10:5-15; Mak 6:7-13)

¹⁻² Jiysis binuk onep wimangan ak kuyip angek apeyak, anğak, “Nimbip kond mindeniğayn ak mey, okok amiy, kichekiy malñiluk biynimb molik sikek mindpay gok anğem mis amiy, biynimb tap gip gok gem suñ ay, Gor biynimb diy kond mindeniğamb minim ak anğñiy, ginimimb.

³ “Pen amniğ; yir kondim, maniy, wand, chech, tap ñinemb tap gok sek dand ma amnimimb. Yikop amnimimb. ⁴ Korip bap amjakem, nimbip anğdeniğiy, kiy yip kin tep giy, amniğ ginimimb ñin ak nep amnimimb.

⁵ “Pen miñmon wikan gunap amem, nimbip ma anğdeniğiy, miñmon kun ak kiring amniğ,

kuyip angnimimb, ‘Minim tep ak dand apambun ma dipim rek, miñmon nimbip biy apon, silkul day day tomb chinup dip ak wiykyokiy amjipun angyi,’ wiykyokiy amnimimb angak.”

⁶ Kun angakniñ, kiyk miñmon sikoy okok amiy, minim tep nup ak angniyiñg, biynimb tap gak gok, gey sun ayak.

*Herot Gos Kuñay Niñak
(Mat 13:1-2; Mak 6:14-16)*

⁷ Pen biynimb gok, Jiysis yerer gak minim ak anğ amiy apiy giyakniñ, gapman biyomb Herot niñiy, gos kuñay yimb niñak. Biynimb gunap angyak, “Jon bi ñiñg pikñemb kuñam tikey kumimb ak, tip tikjakip angyak.” ⁸ Gunap, “Bi Gor minim anğep nindnimb Yilayja, tikjakip angyak.” Gunap, “Bi Gor minim anğep wosrey bap tikjakip angyak.” ⁹ Kun anğey, biyomb Herot angak, Jon nup kuñam tiken kumimb ak, bi kun ak an ap mindakniñ aspay ak, yand am niñnim angyi gos niñak.

*Jiysis Biynimb Payp Tawsin Ak Tap Ñek Ñiñyak
(Mat 14:13-21; Mak 6:30-44; Jon 6:1-12)*

¹⁰ Pen Jiysis binuk onep wimingan ak andkind apiy, miñmon okok tanğiy, yerip yerip giyak minim ak nup angniyakniñ, am miñmon wikan bap key mindon angyi, kuyip poñind miñmon Betsayda amniñg, sanğiyak. ¹¹ Kinjeñnamb okok amniyakniñ, minim bap angyak, “Jiysis binuk gok yip apiy pandiksipay angyak.” Kun anğey, biynimb tiwin gok tiwin gok, nup niñniñg wiyak. Apeyak, tep opim angyi, Gor biynimb diy kond

mindeningamb minim ak kuyip angniying, biynimb tap gak gok, gek sun ayak.

¹² Pen dungep pumb panind amnak won ak, binuk onep wimingan ak apiy, nup angyak, “Miñmon akniy, biynimb ma mindpay namb okok mindpun ak; biynimb guniy angyokey, biynimb mindpay okok amiy, keñmangiy kiyk gok key piyow niñying, kiningiy mingan ak piyow niñying giyan angyak.”

¹³ Kun angeyak, Jiysis angak, “Nimb key kuyip keñmangiy ñinimimb angak.” Angek angyak, “Chin tap ñinemb kuñay ma mindip. Yikop biret onep mamind ak mindiy, piys ominjal mindiy gip. Nand yerip gos niñban? Biynimb biy kuñay yimb mindpay ak, chin am tap ñinemb kuyip gunap taw dand winjun? angyak.” ¹⁴ Ñin kun ak, biynimb ap nan-giyak gok, biyn gok sek, ñapan ñan gok sek mer, bi gok nep mey payp tawsin amnak.

Pen Jiysis binuk gok kuyip angak, “Biynimb kuñay ap mindpay biy angem, tiwin keykey bis-giyan angak.”

¹⁵ Angek, angak rek gey, ¹⁶ nuk biret onep mamind ak sek, piys ominjal ak sek diy, kuyongiy niñiy, Gor nup “Tep” angyi, tipang binuk gok kuyip ñek, kiy pen diying, biynimb gok kuyip bilok ñiyak. ¹⁷ Ñeyak, ñimb dand amiy, ñimb diningiy rek ma ayek, day day kirgiyak gok, binuk gok wand onep wimingan ak yingey arachakak.

Piyta Angak Nand Bi Kiyñ Yomb Key Yimb Ak Angak

(Mat 16:13-19; Mak 8:27-29)

18 Pen ñin bap Jiysis am keynep mindiy, Gor nup angnin mindaknin, binuk gok amjakey, kuyip angninijy angak, “Biynimb yikop gok yip an angyi ninbay?”

19 Angek angyak, “Biynimb gunap, nip Jon bi ñing pikñemb ak angyi ninbay. Gunap, bi Gor minim angep nindnimb Yilayja angyi ninbay. Gunap, bi Gor minim angep nindnimb bap, tikjakip angyi ninbay angyak.”

20 Angeyak, kuyip angak, “Nimb key yip bi an angyi ninbim?”

Angek, Piyta angak, “Nand Bi kiy yomb key yimb, Gor chinup wosrey yokningayn angak ak nep opan angak.”

21 Kun angek, Jiysis kuyip angak, “Minim kun ak, biynimb gunap kuyip ma angñinimimb angak.”

Kumi Tip Ak Tikjakningayn Angak

22 Kun angyi, minim bap pen angak, “Bi bap Ñinuk nup yiwur yomb yimb ak ñiningambay. Bi minim tungasikep yomb gok, bi low tiysa yomb gok, bi Peresiy yomb gok nup ma diy, miluk ninijy ñangayningambay ak pen; ñin ominal nokom mindiy, tip ak tikjakningamb angak.”

23 Pen nuk binuk gok sek, biynimb mindeyak gok sek kuyip angak, “Biynimb an yip ker mindning ginimuj ak, tap man ar biy gos yomb ninbay ak kirgiy, pumbnamb kisyimken, gos yand ninijy apiyn ar ak nep giy; miker diy kumningambay gos ak ma ninijy, sakiy giy nep yip chingiy tangeningiy.

24 “Biynimb Jiysis nup diy mindon, tep ma giningamb angyi ninningambay gok, pisnep apyap

pikningambay. Pen biynimb nup diy mindon, chinup yerer giningamb ak, minim ma mindip angningambay gok, mind tep gep ak dingingambay.

²⁵ “Biynimb tap man ar biy dun angyi gey amningamb gok, gos yomb kiyk ak tap man ar biy ker nep amek, Gor yip perper mindeningiy rek ma ayningamb.

²⁶ “Biynimb an kuyip nambin ginimuñ rek ayek niñiy, “Jiysis nup ma niñbun angningambay ak, kisen yand Bapiy melik chirapiy ak diy, enjol suñ-tep gok sek winingayn ñin ak, kuyip pen kunep Bapiy nup, ‘Kuyip ma niñbiyn angningayn.’

²⁷ “Pen nimbip niñind yimb aspiyn. Biynimb miñiy mindpim guniy, gunap ma kumningambim; kim nep mindiy, Gor biynimb diy kond mindeningamb ak niñningambim angak.”

Jiysis Wak Nup Ak Key Ayak

²⁸ Jiysis kun angyi, ñin anep jiy ak rek mindiy; Jon, Jemis, Piyta kuyip yakam poñind, Gor nup angningning yep dum kun siñak amnak. ²⁹ Amiy, Gor nup angnin mindakniñ, jomluk nup ak key yimb ay, chech nup ak tund giy ñiñakol yimb gak. ³⁰⁻³¹ Kun gakniñ, bi wosrey kumrik, Mosis yip, Yilayja yip Gor melik ak diy apiy, Jiysis Jerusalem ameningamb nup mon kiros bak biyonñ ñangbirik ayey, kumningamb minim ak anğ mindeyak.

³² Pen Piyta, Jemis, Jon kuyip yakam wisin apek, windin jukjuk gi mindeyak ak pen, tikjakiy Jiysis melik tep nup ak niñiy, bi omiñal yip jak mindeyak gok niñiy giyak. ³³ Bi omiñal kun ak amning girikniñ, Piyta gos niñrep giy mer, Jiysis nup angak, “Biyomb. Chin biy mindpun ak tep

yimb mindpun. Chinup yaw anḡey, korip bandak band ominjal nokom gun. Nip bap, Mosis nup bap, Yilayja nup bap anḡak.” ³⁴ Kun anḡakniḡ, won kun anep, semb tund yomb ak kuyip ap maḡiysek yiw gakniḡ pirikyak. ³⁵ Pen minim bap semb namb kun ak nimb apiy anḡak, “Bi biy, Ñi mapin yand. Minim anḡnimuḡ rek niḡnimimb anḡak.” ³⁶ Won kun ak nep; bi ominjal kun ak ma minderik; Jiysis nep mindek.

Pen dum biyoḡ mindey tap gek niḡyak kun ak, ñin namb kun siḡak biynimb gunap kuyip ma anḡñiyak.

Ñiskoy Kichekiy Ambaḡ Ayak Ak Jiysis Gek Ñiyimb Ayak

(Mat 17:14-21; Mak 9:14-29)

³⁷ Pen minek dum biyoḡ kirgiy, kinjeḡnamb okok apyapyiḡ niḡyak, biynimb kuḡay yimb nep, Jiysis nup piyowey apek. ³⁸ Bi bap biynimb namb kun ak, suk yomb anḡiy anḡak, “Tiysa! Ñi yip nokom biy simb niḡan anḡiy dand aswiyn. ³⁹ Kichekiy ak pernep ambaḡ ay mindiy, nup gek suk yomb sikerek anḡiy, gi dam pikiy, kosimb asimbi apiy, kumdam namb ayiḡ wip. Nup kun giy, perper gek mey, mind tep ma gip. ⁴⁰ Bi nak gok kuyip, kichekiy mindip kun ak anḡyokim apiyn ak pen; kiyk anḡyok mer niḡiy kirpay anḡak.”

⁴¹ Kun anḡek, Jiysis anḡak, “Biynimb miñiy mindpim ar biy, minek akay Gor nup gosimb niḡniḡgambim? Ma yimb niḡbim kun ak, yergiy

minim kil sek angnim?” Kun angyiy, bi kun anup angak, “Ñi nand kun ak dand sinbiy owan angak.”

⁴² Angek, dand owakniñ, kichekiy ak ñi kun anup tip ak kilis giy pipang yokek gindam pikak. Jiysis pen kichekiy anup angy gek, key amnakniñ, ñi kun ak ñiyimb ayek, di nop nup ñak. ⁴³ Biynimb ap mindeyak gok, Nop Gor gak kun ak ninjiy, ñawil diyak.

Jiysis Kumningayn Angyiy Tip Ak Angak
(*Mat 17:22-23; Mak 9:30-32*)

Kiyk gos yomb kun ak niñmindyakniñ, Jiysis binuk gok kuyip angak, ⁴⁴ “Minim aspiyn biy timund ay niñ-tep yimb ginimimb. Man mindip, Bi bap Ñinuk nup mimung ninjiy, biyomb gunap kuyip ñiningambay angak.” ⁴⁵ Minim angak kun ak, kiyk tik niñep rek ma ayek; pirikiy Jiysis nup ma angniyak.

An Rek Biyomb Yimb Angyak
(*Mat 18:1-5; Mak 9:33-37*)

⁴⁶ Binuk gok kiyk key angy amiy apiy giy angyak, “Yand biyomb minden,” “Yand biyomb minden,” angyak.

⁴⁷ Jiysis binuk gok, gosimb timey niñyak kun ak key ninjiy, ñapan sikoy yimb bap, dap mindak bak sinak ay angak, ⁴⁸ “Biynimb gosimb yip ninjiy, ñapan sikoy biy rek diniñgambay gok, yip diniñgambay. Pen biynimb yip diniñgambay gok, Biyomb yip yokek winik anup diniñgambay angak.”

⁴⁹ Jiysis kun angek, Jon angak, “Biyomb. Chin niñbun: bi bap yimb nip ak angyiy; kichekiy

malñiluk tap okok angyokip. Pen bi kun ak, chin yip ma tapun rek, kun ma ginimin apun angak.”

⁵⁰ Angek, Jiysis angak, “Yenen nup kun apim? Biynimb chinup miluk ma niñbay gok, bunjiy chin angak.”

Samariya Kay, Jiysis Nup Ma Diyak

⁵¹ Pen Nop Gor, nup dand miñmon nuk biyon amning gak ñin ak, mañ mindakniñ, Jiysis Jerusalem amniyn anjiy, gos kilis giy niñak ak mey; ⁵² bi gunap kuyip nind angyokiy angak, “Nimb nind amiy, kinemb tip yip ak niñayem angak.” Angek, kiyk am Samariya biynimb korip layn bap amjakiy, Jiysis kinemb tip nup bap ayem angey, ⁵³ biynimb miñmon nop nimb kun gok, Jiysis Jerusalem amning gak rek niñiy, kuyip tep ma gek, nup ma diyak.

⁵⁴ Ma deyak niñiy, Jemis yip, Jon yip am, Jiysis nup angrik, “Biyomb! Chin mon mañlan semb biyon nimb ak angon apiy, biynimb kun gipay gok kuyip yinimuj akan?” ⁵⁵ Kun anger, Jiysis andikiy kuyipmiñay niñiyng, kun ma ginjun anjiy kunay angak.

⁵⁶ Biynimb kun gok, Jiysis nup ma deyak, miñmon kun ak kirgiy, miñmon bap key amniyak.

Yand Yip Tanjongambun Angak (Mat 8:19-22)

⁵⁷ Pen kinjeñnamb okok amniyakniñ, bi bap apiy, Jiysis nup angak, “Miñmon akay akay amningamban okok, yand yip nep tanjongambur angak.”

⁵⁸ Kun angek, Jiysis angak, “Yand yip kosyam tanjeningamban. Kayn ayndik gok korip kiyk kinemb ak, man mingan okok mindip. Yakir gok korip kiyk ak key mindip. Pen Bi bap Ninuk, tip kinemb ar nuk ak ma mindip angak.”

⁵⁹ Pen Jiysis bi bap nup angak, “Yip kondey, yand yip tanzor angak.” Angek, bi kun ak pen angak, “Yip yaw angey, yand bapiy nup kond minden, kumek komiy winim angak.” ⁶⁰ Angek, Jiysis angak, “Biynimb permindep ma dipay gok, chip kumemb kun gok kuyip komningiy, nand pen am, Gor biynimb diy kond mindeningamb minim ak angney amnañ angak.”

⁶¹ Bi bap pen angak, “Yand nand yip nep tanjoningambur ak pen, yip yaw angey, am amiy bapiy, mam ay yand gok kuyip nin piksakiy, angniy winim angak.” ⁶² Angek, Jiysis angak, “Biynimb Gor nup marik gining giy pen, gos yomb kiyk ak, andkind biynimb kiyk, tap kiyk gok amningamb ak; Gor biynimb yand angyiy diy, kond mindonimuñ rek ma ayningamb.”

10

Binuk Kunaynep Angyokek Am Miñmon Keykey Minim Angniyak

¹ Kisen Jiysis bi nin jiwiy omiñal nokom, andikiy omiñal nokom (72) diy, kuyip bilok omiñal ak key, omiñal ak key miñmon okok keykey angyokying angak, “Nimb nind amiy, minim yip ak angnem, yand kisen niningayn angak.”

² Pen kuyip minim bap angak, “Tap wong ak kunay yimb nep mindip ak pen, biynimb pipang

dand wep gok nep kuṅay ma mindpay. Kun ak, bi woṅḡday nop nimb anup aṅṅniṅ mindem, biynimb tap pipanḡ dand wep gunap sek aṅgek, am pipanḡ dand winiṅgiy. ³ Nimb pen woṅ ar kun anep ginimimb. Pen siypsiyp ñiluk yand gok nimbip yoksiyiṅ; kayn ayndik mindpay namb ak, ⁴ anpawis, wand, tomb tirup gok sek, dand ma amnimimb. Biynimb kinjeṅnamb okok niṅiy, minim ma aṅṅnimimb. ⁵ Pen korip bap amjakiy, korip miṅḡan amyinḡ, kuyip minim tep won ak aṅgiy aṅṅnimimb, ‘Gor nimbip kond mindenḡ.’ ⁶ Aṅgem, biynimb Gor nup dep rek mindeniṅḡambay gok, minim nimbip kun ak diniṅḡambay.

⁷ “Pen korip kun anep mindiy, tap keṅmaṅgiy dap ñiniṅḡambay gok, ñimbyinḡ mindenimimb. Chinup tap minek minek ñey ñimbun ak, nambinḡ gip aṅgiy, korip ok korip ok ma ginimimb. Bi woṅḡ gipay gok pey dipay. Kun ak rek, kuyip minim tep aṅgem niṅniṅḡambay rek, nimbip pen keṅmaṅgiy ñiniṅḡambay.

⁸ “Pen miñmon bap amem, nimbip sik aṅḡdiy, keṅmaṅgiy ñiniṅḡiy gok ñiṅnimimb. ⁹ Miñmon kun ak, biynimb tap ginimuṅ gok, gem suṅ ayakniṅ, biynimb gok kuyip maṅgiysek aṅḡ tep giy aṅṅnimimb, ‘Kiyṅ yomb biynimb diy kond mindeniṅḡamb ak, tomb aṅḡn nimbip ak wip aṅṅnimimb.’

¹⁰ “Pen miñmon bap amem, nimbip ma sik aṅḡdey, lor namb siṅak amiy, ‘Miñmon nimb biy apon silkul dip gok, wiyk nimbip ker yokiy amjipun. ¹¹ Pen niṅim: Kiyṅ yomb biynimb diy

kond mindeningamb ak, tomb anjin nimbip ak wip anjnimimb.’

¹² “Nimbip aspiyn: kisen kor yomb ñin ak, miñmon Sodom Gomora biynimb tap siy tap timey nep gey gey yin simbok amnak ak, kor giy yiwur sikoy rek diniŋgambay; biynimb minim nimb am anjem ma diniŋgambay gok, kor giy yiwur yomb yimb diniŋgambay.

Yiwur Diniŋgambay

¹³ “Korasin biynimb gok sek, Betsayda biynimb gok sek tap mageprek ak gen, niŋiy kirpay rek, yiwur yomb yimb diniŋgambay. Pen Taya-Saydon biynimb gok kuyip, tap magep kun ak rek, gunap gen niŋbiyap ak, chech talik yowip gunap yimiy, bisgiy tun diyiŋ diyiŋ mindembiyap.

¹⁴ Kor yomb ñin ak, Taya-Saydon biynimb yiwur sikoy rek diniŋgambay; Korasin biynimb gok sek, Betsayda biynimb gok sek yiwur yomb yimb ak diniŋgambay. ¹⁵ Pen ñin kun ak, Kapaniyam biynimb kunep, semb biyoŋ ma amniŋgambay; pisnep kaw miŋgan yomb ak amniŋgambay angak.”

¹⁶ Jiysis binuk gok kuyip angak, “Biynimb minim nimbip dipay gok, minim nimbip ak mer: minim yip ak dipay. Nimbip ma dipay gok, nimbip mer: yip ma dipay. Pen yip ma dipay ak, yip mer: Biyomb yip yokek winik ak nup ma dipay angak.”

Binuk Kuŋaynep Andkind Wiyak

¹⁷ Pen kisen binuk ñin jiwiy omiŋal nokom, andikiy omiŋal nokom (72) kun gok, miñmon okok taŋgiwiy apiy, tep gakniŋ Jiysis nup angyak,

“Biyomb! Kichekiy malñiluk biynimb ambañ ayip gok yimb nip ak angyi, ‘Jiysis mindip rek mis amnim’ angon, apun rek ninjiy ambay angyak.”

¹⁸ Angeyak, kuyip angak, “Yand ninmindnikniñ, kichekiy malñiluk nop kiyk Seytan, kasek won anep, añiñak rek diy apyap pikip. ¹⁹ Siyñ saraw, kondal, maplongim, tap okok nimbip miluk ninjiy, timey giningiy rek ma ayip. Nimbip ñinen aspiyn rek, yuk yokem amningambay.

²⁰ “Pen kichekiy malñiluk gok, apun rek ninjiy ambay angyi, miñmiñ ma ginimimb; Gor Biyomb chin ak, yimb chinup di ayip miñmon nuk biyon angyi, miñmiñ ginimimb angak.”

*Jiysis Nop Gor Nup Tep Angak
(Mat 11:25-27; 13:16-17)*

²¹ Won kun siñak, Gor Kawnan ak Jiysis nup bak ayek, nup tep gakniñ, Gor nup angninjiy angak, “Bapiy. Nand Biyomb semb biyon sek, man biy sek kond mindpan ak, gos nak ak key ninjey tep gip ar ak gipan. Chin biynimb yomb gos tipangiy ninbun apay gok kuyip kirgiy, chin biynimb tep ma mindpun, ñapan sikoy rek mindpun apay gok kuyip diy, kuyip gos tep ñimban ak, nip tep aspiyn angak.”

²² Kun angyi angak, “Biynimb gunap yip ma ninbay; Bapiy nep yip ninimb. Pen Bapiy nup kunep biynimb gunap ma ninbay; yand nep nup ninrep gipiyn. Pen Bapiy yip angek, nuk gip rek gipiyn ak mey, biynimb gos tep ñiyn angyi ninbiyn gok, gos tep ñen, Bapiy nup ninrep gipay angak.”

²³⁻²⁴ Kun angyi, andikiy binuk gok nep kuyip angak, “Gapman biyomb gok sek, Gor minim

anġep biyomb gok sek kuñaynep rek, yand gipiyn ak, minim apiyn ak, niñun anġiy kond mindyinqipay ak pen; ma niñyak. Gor nimbip di tep yimb gek mey, niñsipim anġak.”

Bi Samariya Nimb Ak Girep Yimb Gak

²⁵ Bi low tiysa bap, Jiysis yerip rek anġnimuñ anġiy, ap nup anġak, “Tiysa. Yand yerer giy, perper mindeningayn?”

²⁶ Anġek, nup anġak, “Baybol buk ak tikiy, yerip anġyak?”

²⁷ Anġek, bi low tiysa kun ak anġak, “Baybol buk riytiym gi niñbiyn ak anġyak:

‘Gor Biyomb nak anup wasemb yimb ay, gos timund nak ak, kilis nak ak manġiysek nup ker amnimuñ. Nand key wasemb aypan rek, biynimb gunap kuyip, kunep wasemb aynimin anġiy’ tikyak.”

²⁸ Kun anġek, Jiysis bi kun anup anġak, “Mey yipund giy apan ak. Ar kun ak kisen giy, perper mindeningamban anġak.”

²⁹ Anġek, bi low tiysa kun ak, yimb yip ak sikoy giningamb anġiy, Jiysis nup tip anġniñiy anġak, “Baybol buk tikyak ak, biynimb gunap kuyip wasemb aynimimb anġiy tikyak. Kun ak biynimb gunkay kuyip, kun giyañ anġiy tikyak?”

³⁰ Anġek, Jiysis bi low tiysa ak nup, kesim diy anġak, “Bi bap Jerusalem kirgiy, miñmon Jeriykow amniyn anġiy, kinjeñnamb ak amnakniñ, bi tap siy dep gunap apiy, nup tapin nep pikiy, chech tap nup gok piling dand amniyakniñ, nuk kinjeñnamb siñak kumning kumning gi mindek. ³¹ Bi Gor nup simbonġep bap, lor ar kun

ak amiy niñak; bi kun ak kumning gi mindek. Nuk niñiy pis anep amnak. ³² Pen bi Liypay kiñiñ Gor aņgninep korip kond mindyngip bap, lor ar kun anep amiy niñak, bi kun ak kumning gi mindek. Niñiy, kunep pis anep amnak. ³³ Pen bi Jiwda mer, miñmon Samariya nimb bap, kinjen par nokom kun ak nep amiy niñak; bi kun ak kumning gi mindek. Niñiy, nup simb niñiy, ³⁴ mindek mañ siñak amiy, soy nup gok wel gunap ay, wayn ñiñg gunap ay tiwningak. Tiwningiy, di dongiy ar nuk ak ay dand amiy, korip maniy tawiy kinyingipay ak dam ay, kond mind tep yimb gak. ³⁵ Minek amning giyng, bi korip kond mindyngip kun anup, maniy kind nokom bap ñiy aņgak, ‘Nand bi kun biy nup direp ginimin. Pen maniy yerip yerip aņgningamban ak, andkind apiy nip ñiningayn aņgak.’ ”

³⁶ Jiysis kesim kun ak diy, bi low tiysa kun anup aņgak, “Bi kinjenamb pikayak ak, bi omiñal nokom pandikiy, bi an nuk key wasemb ayip rek, nup wasemb ayak?” ³⁷ Aņgek, bi low tiysa ak aņgak, “Bi nup simb niñiy direp gak ak aņgak.” Aņgek, Jiysis nup aņgak, “Niñind apan. Mey ar kun anep ginimin aņgak.”

Mata Nup Woņg Gos Anep Ayak

³⁸ Pen Jiysis binuk gok yip miñmon bap am-jakeyak, biyn miñmon kun ak mindek bap, kuyip poņind korip nuk ak amnak. Biyn kun ak yimb nuk Mata. ³⁹ Korip nuk ak, nunay bap mindek. Yimb nuk Mariya. Pañ Mariya kun ak, Jiysis mindek mañ siñak ap bisgiy, Jiysis minim aņgakniñ, niñmindek. ⁴⁰ Mata nuk keynep tap keñmaņgiy

daŋgiy gi gi, gos kuŋay niŋiy, ap Jiysis nup aŋgak, “Biyomb. Mariya yip kirgek, key nep tap chin gok daŋgiysipiyn ak tep ma gip. Nup aŋgey apek, ominal giy tap daŋgiyur aŋgak.”

⁴¹ Aŋgek, Jiysis aŋgak, “Mata. Mata. Nip tap kun gok nep gos ayip! ⁴² Ak tap yikop! Mariya minim tep ak diyn aŋgiy, gos ak ayek, ap niŋmindip. Kun ak, yand nup kiring amnon aŋgnim rek, ma ayip aŋgak.”

11

Gor Nup Kun Giy Rek Aŋgniŋnimimb Aŋgak (Mat 6:9-15; 7:7-11)

¹ Ñin bap, Jiysis miñmon wikan bap mindiy, Nop Gor nup aŋgniŋ jiwakniŋ, binuk bap ap nup aŋgak, “Gor nup yergiy rek aŋgniŋbay? Jon binuk gok kuyip, aŋgñek niŋyak rek, chinup kunep aŋgñey niŋjun aŋgak.”

² Aŋgek, Jiysis kuyip aŋgak, “Gor nup aŋgniŋniŋ, kun giy aŋgnimimb:

‘Bapiy. Nand timey ma giy, Bi tep yimb mindpan ak, yimb nip dand aranemb. Nand nep Biyomb chin mindiy, chinup kond mindenimin.

³ Pen tap keñmaŋgiy gok, minek minek ñimbun rek ak ñinimin.

⁴ Biynimb gunap chinup timey gey, kuyip pen miluk niŋiy timey ma gipun rek, tap siy tap timey chin gipun ak, kunep niŋiy kirginimin. Chinup kond mindey, gos bap apek timey ma ginjun aŋgnimimb’ aŋgak.”

5-6 Kun anġiy, binuk gok kuyip anġak, “Nimb bap, kisyimnamb yomb akyaŋ, buŋġiy nimb bap korip ak amiy anġningambim, ‘Buŋġiy. Bi yand niŋep rek bap, par okok nimb apiy amniyn anġiy, korip yip ak apchakamb, tap nup ñen ñiŋnimuŋ ak ma mindek mey; nip ker aswiyn. Yip biret ominiŋal nokom ñan anġeningambim,’ buŋġiy nimbik kun ak minim bap anġningamb; 7 ‘Kisyimnamb biy, yip kun ġiy ma ap anġninin! Ñapan yand gok yip kinjeŋ ġiŋiy kinjipun. Kun ak yergiy tikjakiy, nip tap aspan ak diŋinim anġningamb?’

8 “Pen nimbip aspiyn: bi korip nop nimb ak, buŋġiy yand anġiy, kasek ma diŋeniŋgamb; nup ñan anġiy kond mindyiŋġ, kilis ġi mindem mindem, anġningambim rek niŋiy, diŋiniŋgamb.

9 “Kun ak nimbip aspiyn: tap yerip tikdenimuŋ, Gor nup anġniŋem, nimbip ñiniŋgamb. Pen tap yerip piyowniŋningambim ak, kunep diniŋgambim. Chinup kinjeŋ ak yikaŋ anġiy, pik ġiyġiw gem, yikniŋgamb.

10 “Yenen: biynimb an Gor nup anġniŋbay gok, apay rek ġip. Tap piyowpay ak kuyip yomimb. Pen kinjeŋ ak yikaŋ anġiy, pik ġiyġiw gey, apay rek niŋiy yikip.

11 “Nimb bi ñapan nop gok, ñapan nimb bap piys nen anġek, siyŋ timey bap ñimbikip? 12 Akaŋ pen, yakir maŋġiy nen anġek; kondal bap ñimbikip? Ak kun ma ġipkip! 13 Nimb biynimb tep mer ak pen; ñapan nimb gok tap tep gok nep ñimbim. Bapiy tep semb biyoŋ ak bi tep yimb.

Nuk tap yesek bap key ma ñiningamb. ‘Kawan nand ak chinup yokan angem,’ yokningamb angak.”

Kichekiy Malñiluk Nop Kiyk Seytan Kilis Ak Dipan Angyak

(Mat 12:22-30; Mak 3:20-27)

¹⁴ Pen bi bap kichekiy ak amban ayek, minim angyi mer, yikop nep mindek. Jiysis kichekiy aban ayak kun ak angyokek, minim angakniñ, biynimb ap niñmindeyak gok, gos kunay yimb niñyak.

¹⁵ Pen biynimb kun gok gunap angyak, “Nuk kichekiy malñiluk nop kiyk Seytan, yimb bap Belsiybul apay kilis ak diy, angyoksap angyak.”

¹⁶ Pen biynimb gunap, Jiysis yerip giningamb angyi angyak, “Tap bap key semb sinbiyon gey niñy mey; Gor nep angyokek winak angningambun angyak.”

¹⁷ Pen Jiysis gos yesek niñyak kun ak niñy angak, “Miñmon yomb nokom bap, asik keykey ay mindrep ma giningambay. Biynimb kiñiñ nokom bap, kunep asik keykey ay mindrep ma giningambay. ¹⁸⁻¹⁹ Kun ak rek, Seytan kiñiñ ak tungasik keykey ay, yergiy mind tep giningambay? Yip Belsiybul nup kond mindek, kichekiy malñiluk anğ mis yoksap apim ak pen, yand kun gembiniñ, yergiy biynimb nimb gok kichekiy malñiluk anğ mis yokpiyap. Kiyk key nimbip angningambay, biynimb bap kun giningiy rek ma ayip. ²⁰ Pen Gor yip kond mindek angyokpiyn ak; yip yenen, Gor binuk biynimb diy kond mindeningamb ak wip biy angyi ma niñbim.

21 “Pen bi kalrimey bap mindiy, chim yakam nuk ay tep giy, korip nuk niñmindek, biynimb tap nuk bap piling diniñgiy rek ma ayniñgamb. 22 Pen bi kalrimey yimb bap key apiy, chim tap nuk siy di mindip gok piling diy mey, key niñimb rek bilokniñgamb.

23 “Biynimb yand ker ma mindpay gok, Seytan kind ak mindiy mey, yip ma dipay. Pen biynimb yand yip woñg ma gipay gok, kinjen day añg tikey, biynimb yip ker wiñiñg gipay gok ma opay.

*Kichekiy, Malñiluk Tap Gok Yikop Angyokem Tip Andkind Winiñgiy Rek Ayip
(Mat 12:43-45)*

24 “Kichekiy malñiluk timey bap, biynimb amban ay mindek, angyokeniñgambay, am miñmon nep namb okok tip bap niñiy minden angyiy, am kun okok tang tang mer niñiy, korip miñgan nind mindiy opiyn ak amniyn anñiñgamb. 25 Angyiy, amiy niñiñgamb: korip kun ak girep yimb gey, tip anep mindeniñgamb. 26 Nuk niñiy okok amiy, nund rek mer; kichekiy malñiluk timey yimb onep ar ak sek poñind apiy, miñgan kun ak mindeniñgambay. Kun gek, nind mindrep giyiñgiy rek mer; pisnep timey yimb giniñgamb angak.”

27 Jiysis kun angek niñiy, biyn bap namb kun ak tikjakiy, meñg miñgan dand araniy angak, “Nanim nip tikiy tiy ñak ak, miñmiñ yimb ginimuj angak.”

28 Angek, Jiysis angak, “Kun apan ak pen; biynimb Gor nup minim ak niñiy, angyip angyip rek giniñgambay gok, miñmiñ giniñgambay angak.”

*Tap Bap Key Gey Niñun Anğyak
(Mat 12:38-42; Mak 8:12)*

29-30 Pen biynimb kuñay yimb nep, ap nanan giyakniñ, Jiysis anğak, “Biynimb miñiy mindpim ñin namb biy, tap siy tap timey giyiñ apim, ‘Tap key rek bap semb biyoñ gek niñiy, Kiñ yomb key yimb per kond mindpun ak nep, wip anğiy niñningambun apim.’ Pen nimbip aspiyn, tap bap key gen ma niñningambim. Niñning: Jona wosrey ñin omiñal nokom, piys yomb koñgiy namb biyañ mindiy, owak rek ak yip kunep gek, niñningambim. Gor Jona nup kond mindrep gak rek, Niyniypa biynimb niñiy, Gor nup gosimb niñyak.

31 “Pen wosrey, Kiwiyn biyn yomb miñmon paryomb Yitiyopiya nimb ak, kiñ Solomon biyomb rek ayek niñiy, minim nup ak niñiy anğiy owak. Pen biynimb miñiy mindpay gok, Biyomb yimb ak ap mindiy, minim anğip ak ma dipay rek, kisen kor yomb ñin ak, minim yomb diniñgambay.

32 “Wosrey, Jona am Niyniypa biynimb kuyip angek, tap siy tap timey giyak gok kirgiy, Gor nup diyak. Jona bi yikop ak angek niñyak ak pen, miñiy Biyomb yimb ap mindip biy nup, kun ma gipim. Kisen kor yomb ñin ak minim yomb diniñgambim anğak.”

*Kisyimnamb Okok Rek Ma Mindenimimb
(Mat 23:1-26; Mak 12:38-40; Luk 20:45-47)*

33 “Biynimb gok lam danğiy tiyn miñgan okok akañ, boñ ar kinbay molik okok ma aypay; ar siñak tik ayey melik gek, biynimb gok korip

mingan kun ak apiy misen niᅇbay. ³⁴ Pen windin maᅇgiy ak sup rek mindip ak mey, mind tep gek, mumbwak ak mind tep yimb giningamb. Pen mind tep ma gek; kisyim wip rek ak mindeningamb.

³⁵ “Namb chinup ak melik mindip aᅇgiy niᅇningambim ak pen; kisyim wip rek ayip ak, niᅇrep yimb ginimimb. ³⁶ Mumbwak nimb maᅇgiysek melik yimb giy mindeningamb ak, wikan bap kisyim ma mindeningamb; lam melik gip rek ak, giyᅇᅇ nep mindeningamb aᅇgak.”

Nimb Peresiy Gach Sek Aᅇgak

³⁷ Pen Jiysis minim aᅇjiwakniᅇ, bi Peresiy bap nup aᅇgak, “Apey, korip yand ak amiy tap ᅇniᅇur aᅇgak.” Aᅇgek, Jiysis am korip nup ak, ³⁸ bisgiy tap ᅇniᅇakniᅇ, bi Peresiy kun ak, gos nuk namb okok nep niᅇiy, bi kun biy yenen, chin Jiwdakay per gipun rek, ᅇnin nuk ak ᅇniᅇ ay gilunᅇ yokiy mer; yikop nep tap ᅇnimbsap aᅇgiy, gos ak niᅇak. ³⁹ Gos kun ak kun giy niᅇek, Jiysis aᅇgak, “Nimb Peresiy kay, piler kap gok mis okok ken, ᅇniᅇ pik tep gipay rek ak gipim ak pen, namb nimb biyaᅇ tap siy tap timey gipim gach ak, arachakiy mindip. ⁴⁰ Nimb sakiy sek yimb. Gor nimbip wak ak nep ma gayak; namb biyaᅇ kunep gayak. ⁴¹ Kun ak, tap piler kap mingan biyaᅇ mindip ak, biynimb simbgeprek gok kuyip ᅇnimimimb. Kun giy mind tep giningambim.

⁴² “Pen nimb Peresiy kay niᅇrep yimb ginimimb. Sinimb tap monmon gok niᅇem tap yomb rek ayek, ᅇnin paᅇgniᅇ dand amiy, wanjrem ak amek, Gor nup nokom bap ᅇnun aᅇgiy, per ᅇnimbim.

Ak tep gipim; minim ma mindip. Tap siskoy okok per kun giy gipim ak pen, yenen minim junj yimb ak kunep ma gipim. Gor nup niñiy dep akan, biynimb gok kuyip niñiy dep ar ak, per kirpim.

⁴³ “Nimb Peresiy kay niñrep yimb ginimimb. Gos nimbik niñbim ak, lotiw namb ak akan, miytiyñ gipay namb ak amon, aswim-ey angey, yimb chinup anep dand araniyan angyi, gos ak nokom niñbim.

⁴⁴ “Pen gipim kun ak, Gor nimbip pen kunep giniñgamb ak, niñrep ginimimb. Biynimb gunap niñiy, nimbip bi tep yimb apay ak pen; chip kuy giy mindip rek ak, mindpim angak.”

⁴⁵ Kun angek, bi low tiysa bap, Jiysis nup angak, “Tiysa. Minim kilis timey yimb apan kun ak, chinup kunep apan akan?”

⁴⁶ Angek, Jiysis angak, “Nimb bi low tiysa gok niñrep yimb ginimimb. Minim kilrimey apim ak, wand miker yomb gok rek, biynimb gok kuyip gom ñimbim ak pen; kuyip simb niñiy ma tungasik dipim.

⁴⁷ “Kun ak niñrep yimb ginimimb! Nasind yes nimb gok wosrey, bi Gor minim angep gok kuyip pikayey, nimb kaw kuyip komemb gok gayrep giyng mindpim. ⁴⁸ Gipim kun ak tep nep pikyak angyi gipim.

⁴⁹ “Kun ak Gor niñrep giy angak, ‘Bi minim yip angep gok, bi minim yip dand amemb gok kuyip yokniñgayn ak pen, kuyip yiruk niñiy, gunap timey giniñgambay; gunap pisnep pikayniñgambay angak.’

⁵⁰ “Pen wosrey, miñmon alwol gayak ñin ak tikiy, bi Gor minim anjep gok kuyip per pikey wip rek, biynimb miñiy mindpay gok, minim miker kun ak diniŋgambay. ⁵¹ Miker kun ak mey, bi Ebol nup nind kiñiñ giy ñaŋgiy, ñaŋg dand apiy, ñaŋg dand apiy, kisen Sekaraya nup, Gor nup tip tap simboŋg ñemb korip miŋgan ak bindoŋ, kamb diy giyak bind ar ak biy, namb siŋak ñaŋgayak. Nimbip niŋind yimb aspiyn. Minim miker kun ak maŋgiysek, biynimb miñiy mindpay gok diniŋgambay.

⁵² “Pen nimb bi low tiysa gok niŋrep yimb ginimimb. Kiy diy, kinjeŋ yikiy korip miŋgan amiy niŋrep gep ak, yiruk gek kirpim. Kirgiy, biynimb korip miŋgan amniŋ gipay gok kuyip, per kinjeŋ day angrikipim. Kun ak niŋrep yimb ginimimb angak.”

⁵³⁻⁵⁴ Jiysis kuyip kun angiy, mis amnakniŋ; bi Peresiy gok sek, bi low tiysa gok sek nup yiruk niŋiy angyak, “Minim yerip ak angon, pen angek niŋiy, dand kor yomb amnun angyak.” Kun ak mey, nup minim yesek yesek ar keykey gok angniniŋgipay.

12

Tap Weygiy Gipay Gok Miseni Niŋniŋgambay (Mat 10:26-27)

¹ Pen won kun ak, biynimb kuŋay yimb nep ap nan-giy, chichmiy yimyakniŋ, Jiysis binuk gok kuyip angak, “Peresiy kay per timey gipay ak weygiy, mind tep gipun apay. Kun ak rek, nimb kunep ginimimb rek ayip ak, niŋrep yimb

ginimimb. ² Tap weygiy gipim gok, kisen misen niñningambay. Minim kapkap ang weygipim gok, kunep misen gek niñningambay. ³ Pen minim kisyimken apim gok, melik sek angey niñningambay. Minim kapkap korip miñgan okok apim gok, korip ar biyon angey, ying dand miñmon okok amningambay angak.”

*Gor Nup Piriknimimb
(Mat 10:31)*

⁴ “Biynimb yand guniy. Nimbip aspiyn, Gor nup chinon, chinup ñanngningambay angyi ma piriknimimb. Ak yikop mumbwak ar anep timey giningambay. ⁵ Kun ak nimbip aspiyn: pirikning, Gor Biyomb nimbip pikay, mon key yinjap yokningamb ak nup piriknimimb. Kun ak nimbip niñind yimb apiyn.

⁶ “Nimb niñbim: yakir sikoy onep mamind ak yokiy, maniy likañ sikoy won omiñal nep dipay. Yakir sikoy kun gok, Gor ma niñnimuñ rek bap ma mindip; mañgiysek niñimb ak nep mindip.

⁷ Pen nimb biynimb gok, tap yimb; yakir gok kuyip wiyniym gipim. Kun ak, Gor jun kas nimbip mañgiysek ñin pangip ak mey; gos sek mindenimimb angak.”

*Jiysis Nup Yimb Di Angep
(Mat 10:32-33; 12:32; 10:19-20)*

⁸ “Nimbip aspiyn: biynimb Jiysis ker mindpun angyi, biynimb mindpay namb ak angyikey; kuyip pen, biynimb guniy yip ker mindpay angyi, enjol mindpay namb ak misen angyikningayn.

⁹ “Pen biynimb ‘Jiysis ker ma mindpun angyi’ biynimb mindpay namb ak angey, kuyip pen, yip

ker ma mindpay angyi, enjol mindpay namb ak angningayn.

¹⁰ “Bi bap Ñinuk nup anjjiweningambay, Gor niñiy kirgining kirginingamb; pen Kawnan nuk ak nup anjjiweningambay, nuk niñiy ma kirginingamb.

¹¹ “Pen nimbip kor gining, dand lotiw gining biynimb ap nan-gipay namb ak amey akan; kanjsol mindpay namb ak amey akan, gapman biyomb mindpay namb ak amey, pen minim yerip ak diy anjgun angyi, gos ak ma piyow niñnimimb.

¹² Tikjak apikniñ, Gor Kawnan ak nimbip gos ñakniñ, angningambim angak.”

Tap Kunay Dun Angyi Gos Ma Niñnimimb

¹³ Biynimb kunay mindeyak namb kun ak, bi bap Jiysis nup angak, “Tiysa. Mam yand ak nup angey, bapiy tap nuk day kumak gok, bilok yip pis ak key ñañ angak.”

¹⁴ Angek, Jiysis nup angak, “Yip an anqip, ‘Bi tap pikasik ñemb ak mindonimun angek,’ tap nimbip gok pikasik ñinim? ¹⁵ Tap kunay dun angyi gos ak ma niñnimimb. Tap dun angyi niñbim kun gok, nimbip gek mindrep ginimimb rek ma ayip angak.”

¹⁶ Pen Jiysis minim bap kuyip paydon ay angak, “Bi maniy kunay mindeningamb bap, wonjday nuk ak, wiyt mangiy tap gok kunay yimb mindeningamb. ¹⁷ Gos nuk okok nep key niñdand amiy, tap ñiñemb yand kunay mindip gok, korip miñgan akay dap ay ñimb mindenim angningamb. ¹⁸ Pen gos bap niñiy, korip sikoy gok timbrik yokiy, korip yomb yomb gok nep giy, keñmangiy

tap yand okok maŋgiysek, di miŋgan kun okok ay wonḡ ak kirgiy, ¹⁹ tap yand kun gok nep ñimbyiḡ, ñiḡ ñimbyiḡ, miñmiñ giyiḡ, gi mindeniḡayn aḡniḡgamb. ²⁰ Pen kun giy niḡek, Gor nup aḡniḡgamb, ‘Nand bi sakiy sek yimb. Miñiy kisyimnamb biyaḡ kumeniḡgamban, tap nand kuḡaynep mindip gok, an rek diniḡgamb aḡniḡgamb.’

²¹ “Kun ak rek mey, biynimb tap kiyk gok nep mapin tikjakek, Gor nup niḡey tap yikop rek ayip aḡgak.”

Gos Kuḡay Ma Niḡnimimb Gor Nimbip Kond Mindeniḡgamb

(Mat 6:25-34)

²² Jiysis kun aḡgiy, binuk gok kuyip aḡgak, “Chech akay nimb diy yimniḡgambun; tap akay nimb diy ñiḡniḡgambun aḡgiy gos yomb ak ma niḡnimimb. ²³ Nimbip gayak ak, chech, tap ñiḡemb nep piyow niḡniḡgiy aḡgiy ma gayak.

²⁴ “Yakir gok biynimb gipay rek, wiyt yimey, pikgek tik dand ma opay. Pen wiyt maḡgiy tik dap nan-giniḡgiy korip bap ma mindip. Gor nep mey, tap ñiḡemb kuyip ak ñimb. Nuk tap yikop gok niḡiy kun gip ak, yenen chinup ma kond mindeniḡgamb aḡgiy gos kuḡay niḡbim? ²⁵⁻²⁶ Akan pen, kumniḡ giniḡgambim ñin ak kirgiy, won bap sek mindenimimb rek ayek; tap yesek kun gok gos kuḡay niḡbim?

²⁷ “Tap saḡgiy okok jakiy, maḡgiy piyniḡ sum gip gok, key mokyaḡ giniḡgiy rek ma ayip, Gor nep gek, mokyaḡ tep yimb ak giy mindipay. Pen wosrey, biyomb Solomon mokyaḡ giyiḡgip ak,

mokyan tep kun ak rek ma giyinqip. ²⁸ Tap sangiy okok jakip kun gok tap yikop; per ma mindeningamb. Miñiy rek mindiy, toy rek pikrik mon dangiyey yiningamb. Pen Gor tap ma kond mindep rek kun gok kond mindip ak, chinup kond mindeningamb angyi niñnimimb ak pen; gos nimb ak parsek ma mindip.

²⁹ “Keñmangyi, ñiñg, tap gok akay nimb diy ñiñjun angyi, gos ak ma niñnimimb. ³⁰ Biynimb Gor ker ma mindpay gok, gos kun ak rek niñbay; pen Nap yomb ak nimbip sakiy ma gip; tap nimbip tikdip gok niñimb. ³¹ Kun ak nuk biynimb diy kond mindeningamb ak, chinup sek dinimun angyi, gos nokom niñiy gem amek mey, nimbip kond mindakniñ, tap kun gok ma tik diningamb.

*Tap Teprep Nimb Gok Nan-gem Mindonimun
Gor Miñmon Biyon
(Mat 6:19-21)*

³² “Kanj siypsiyp sikoy tiwin biy. Nap yomb nimbip diy kond mindeningayn angyi niñimb ak mindip ak mey; ma piriknimimb. ³³ Tap nimb gok mindip rek yokiy maniy diy, biynimb tap ma mindip gok kuyip ñinimimb. Kun gem mey, tap mapin nimb gok lum ar biy ma mindeningamb; mindeningamb Gor miñmon biyon. Kun biyon ma kurginingamb; siplep ma siwiy, bi siydep gok siy diningiy rek ma ayningamb. ³⁴ Tap tep nimb gok man ar biy di nan-gem, gos nimbip ak mindeningamb man ar biy; pen semb biyon nan-gem, gos nimbip ak amningamb kun biyon angak.”

Minj Moka Giy Mindenimimb

³⁵ “Kun ak laplap nimb ak dem apek, maŋ maŋ paŋgiy, ler ak pimbirikiy, lam ak daŋgiy ay niŋmindenimimb. ³⁶ Bi wonŋ giŋimbay gok aŋgningambay, ‘Biyomb chin ak, biyn diyiŋ tap yomb ŋimbsipay namb ak amimb rek, maŋ mindip winiŋgamb aŋgiy,’ niŋnep mindeniŋgambay. Kun ak biyomb kiyk ak giraŋgiy, ap kinjeŋ ak pik giygiw gek, kasek yikniŋgambay. Kun ak rek nimb ginimimb. ³⁷ Pen nuk andkind apiy niŋningamb: niŋmindeniŋgambay ak, kuyip di tep yimb giniŋgamb. Biyomb kun ak nuk key, chech nuk ak lip gek apek, maŋ maŋ paŋgiy, ler ak pimbirikiy, kuyip aŋgek, am tap ayŋimbay tip ak biŋiŋ kus kus gey, nuk key kuyip tap ŋiŋemb gok dam ŋiniŋgamb. ³⁸ Pen Biyomb ak kisyimnamb biyaŋ akaŋ; kakaruk aŋgakniŋ apiy niŋningamb: binuk gok wisin ma kineniŋgambay, kuyip di tep yimb giniŋgamb. ³⁹ Kun ak niŋim. Biynimb korip nop nimb gok, bi tap siy dep bap ŋin ak rek winiŋgamb aŋgiy niŋmindembiyaŋ ak; korip kuyip ak piklakiy, tap kuyip gok siy ma dipkop. ⁴⁰ Kun ak rek Bi bap ŋinuk winiŋgamb aŋgiy, kond mindenimimb. Ma asaw aŋgiy, niŋningambim ŋin ak winimuŋ rek ayip aŋgak.”

Gor Nup Wonŋ Giŋirep Ginimimb (Mat 24:45-51)

⁴¹ Jiysis kun aŋgek, Piya aŋgak, “Biyomb. Minim paydoŋ ay apan kun ak, chinup nep apan akaŋ, biynimb maŋgiysek apan?”

⁴² Angek, Jiysis angak, “Bi an gos tep mindak, wong gi tep yimb giningamb ak, biyomb nuk ak amning giy, nup angningamb, ‘Bi wong yip giñimbay gunap kuyip kond mindiy, tap ñinemb kuyip gok bilok ñiyiing gi mindenimin angyi’ amningamb. ⁴³ Kun ak kisen andkind apiy, angningamb rek gek niñiy, nup di tep yimb giningamb. ⁴⁴ Niñind apiyn. Nup angek, tap nuk gok mangyisek kond mindeningamb.

⁴⁵ “Pen bi wong nup giningamb ak, biyomb yand ak kasek ma winingamb angyi, biynimb wong giñiningambay gunap kuyip tapin pikiy, tap ñimbiy, ñiing kilis ñimbiy, sakiy ay gi mindakniñ, ⁴⁶ biyomb nuk ak kasek ma winingamb angyi niñningamb ñin ak apiy, nup timey yimb giy, biynimb minim nup ma niñiy, am mindpay kind ak angyokningamb.

⁴⁷ “Biyomb ak apiy mey, minim nuk angak ak niñrep giy, kindik ma gipay biynimb gok kuyip, yiwur yomb yimb rek ñiningamb. ⁴⁸ Biynimb minim nup nind ma niñiy, timey giningambay gok kuyip, yiwur siskoy rek ñiningamb. Pen ar kun ak rek, bi bap nimbip tap yomb ñiy, pen kun ak rek ñim angningamb. Pen tap kuñaynep di ñin ar nimbip ak ayek, direp ma geniingambim, apiy nimbip minim yomb yimb ak angningamb.

*Gunap Jiysis Nup Ma Diy Asik Key Ayningambay
(Mat 10:34-36)*

⁴⁹ “Yand opiyn ak, man ar biy sup pung angyiñing opiyn. Okok mangyisek yinbikop ak tep! ⁵⁰ Yiwur yomb diniñgayn ak, yip miker

yimb gisap. Kun ak pisnep di den mey, yip tep giningamb!

⁵¹ “Yip aᅅgningambim, biynimb di jimñining gisap aᅅgningambim ak pen; yand opiyn rek, gos ar keykey ninjiy, asik keykey ayniᅅgambay.

⁵² “Miñiy ñin biy tikiy, amyong apyong onep mamind rek mindeniᅅgambay ak; omiᅅal nokom yip dey, omiᅅal yip ma diy, asik keykey ayniᅅgambay. Pen mer ak: omiᅅal yip der, omiᅅal nokom yip ma diy, asik keykey ayniᅅgambay. ⁵³ Bi apiymiᅅay ak, ñinuk akan nop, yip ma dek mey, asik keykey ayniᅅgayr. Biyn amiymiᅅay ak, panuk akan nonim, yip ma dek mey; asik keykey ayniᅅgayr. Nonim yip, ñinuk biyn ak yip kunep: nonim akan, ñinuk biyn ak yip ma dek mey, asik keykey ayniᅅgayr aᅅgak.”

*Bi Kiyᅅ Yomb Key Yimb Ak Wip Aᅅgiy Ma Niᅅyak
(Mat 16:2-3; Mak 8:11-13)*

⁵⁴ Pen Jiysis minim bap sek kuyip aᅅgak, “Pumb paᅅind amimb okok ken semb ayek ninjiy, miñiy miñmon pikniᅅ gisap aᅅgiy niᅅmindem, apim rek nep gip. ⁵⁵ Pinim yomb ak akyim ken apek ninjiy, miñiy pumb yomb giniᅅ gisap aᅅgem, apim rek nep gip. ⁵⁶ Tap semb ar biyong niᅅrep giy; man ar biy niᅅrep giy gipim ak pen, yenen ñin yomb kond mindyiᅅgipim ak, miñiy wip biy ma niᅅbim?

*Minim Yomb Mindip Rek Gor Yip Tunᅅasik
Ayrep Ginjun
(Mat 5:25-26)*

⁵⁷ “Pen yenen, Gor kinjen tep ar ninrep giy dinimimb ak mindakniñ, tap yesek ar gok apun rek gip angyiñ ninbim?”

⁵⁸ “Pen bi bap nimbip kor dand amjipiyn angek, kor yomb kun ak yenen amjipun angyi, kinjenamb okok amying, nund yip minim ang tungasik ayrep ginimimb. Pen mer ak, nimbip pisnep dam biyomb kor ninimb ñin ar ak yokek, nuk pen di poliys ñin ar ak ayek, nimbip dam kalambis ayingamb. ⁵⁹ Kun ak nimbip aspiyn; kalambis kun ak mindnep mindeningambim. Tap day nimbik gok pisnep day pang diy nep, mis amningambim angak.”

13

¹ Won kun ak nep, biynimb gunap ap, Jiysis nup kesim diy angyak, “Galiyliy biynimb gunap ap Gor angninrep korip ak, tap simbonñ ñiyakniñ, gapman biyomb Paylat kuyip pisnep pikayamb, likañ kuyip yowip, meymey siypsiyp pikayey likañ yowip namb sinjak angyak.”

² Angeyak, Jiysis kuyip angak, “Galiyliy biynimb kun gok, tap siy tap timey key yimb geyak, kuyip kun gip angyiñ ninbim? ³ Ak mer! Pen ninjim! Tap siy tap timey gipim gok, yenen kun gipun angyi ma kirgeningambim, mangyisek kun ak rek nep kumningambim.

⁴ “Pen miñmon Saylom, korip paryomb yiy akyon giyak ak pang apyapiy, biynimb onep kangol pis ak kuyip pikayak ak ninbim. Pen nimb angningambim, ‘Jerusalem biynimb gunap tap siy tap timey giyak rek mer; kiyk tap siy tap timey

yomb yimb ak gey, Gor gek korip kun ak pang apyapiy, kuyip pikayak angningambim.’⁵ Pen ak kunep mer! Nimbip niñind yimb aspiyn. Nimb mangiysek tap siy tap timey gipim gok, yenen kun gipun angiy ma kirginingambim ak; mangiysek kumyak kun ak rek nep kumningambim angak.”

Mon Bind Mangiy Ma Piyp Ak Paydon Ayak

⁶ Pen Jiysis minim bap paydon ay angak, “Bi bap kiyaw mangiy ak piyan angiy, yin ak jiw dand apiy, miñ wayn wonḡ namb nuk ak yimningamb. Kisen andkind apiy niñningamb; mangiy ma nep piyeningamb,⁷ bi wonḡ nup giñiningamb ak nup angningamb, ‘Simiy nokom nokom yinakniñ, per apiy niñbiyn; kiyaw yimnik ak, mangiy ñinemb ak ma nep piyp. Kun ak wonḡday namb yip ak mindek tep ma gip. Timb yoknimin angningamb.’

⁸ “Angek, bi wonḡ nup giningamb ak angningamb, ‘Biyomb. Kiyaw kun ak miñiy ma timb yokep. Yand kiyaw kiñin kun ak kipil gi tep giy, tap kaskas gunap dap ayen,⁹ simiy andikiy ak mangiy piyek kirginimin; pen ma piyek, ñin kun ak timb yoknimin angningamb’ angak.”

Biyn Kund Ñikgak Ak Yipund Gak

¹⁰ Pen Jiwdá lotiw ñin bap, Jiysis Jiwdá nan-gep korip miñgan ak amiy, kuyip minim anḡñi mindek. ¹¹ Korip miñgan kun ak, biyn kichekiy gek, kund ñikgiy nep tanḡek tanḡek, simiy yin kaḡol piskind ayak ak, ap mindek. ¹² Jiysis biyn kun anup, anḡek apek angak, “Tap nip gip ak suñ ayip angak.” ¹³ Kun angiy, nup diniñakniñ, kund ak yipund gek, Gor nup yimb ak dand aranak.

14 Pen Jiwda lotiw ñin ak, gek suñ ayak ak ninjy, biyomb Jiwda nan-gep korip kond mindek ak nup miluk yapek, biynimb ap mindeyak gok kuyip angak, “Nimbip biynimb tap gip gok, wong ñin onep kañgol ak mindip; apem gek suñ aynimuj. Miñiy ñin biy lotiw ñin ak pen, kun gispim angak.”

15-16 Angek, Jiysis angak, “Kanj kaw, dongiy nimb gok tiwning ayem mindeningamb ak, lotiw ñin ak ñing nen gek, kuyip simb ninjy miñ wisikiy, dand amem ñing ñinngambay akan mer? Pen basind yes chin Ebrahim tikek, tik dand amiy tikpay pañ biy, Seytan nup wosrey tiwningayek, simiy yin kañgol piskind ayip ak, nup simb ma ninbim? Miñiy lotiw ñin biy, miñ nup ayip ak tungasiken, minim yomb aspim? Kun ak tom yimb gipim angak.”

17 Jiysis kun angek, bi nup miluk ninjak gok, kuyip nambin yimb gak. Pen biynimb yikop gok, Jiysis tap mageprek giyingip rek ninjy, miñmiñ yimb giyak.

*Mon Mastet Manjiy Ak Paydon Ay Angak
(Mat 13:31-33; Mak 4:30-32)*

18 Jiysis minim bap sek anjiy angak, “Gor biynimb diy kond mindeningamb minim angning gispiyn ak, yergiy rek angen ninrep yimb giningambim? 19 Mey minim ar angning gispiyn biy rek mindip. Bi bap mon mastet manjiy ak, di wongday nuk ak yimek, jak yomb giy, alik tep ak pikek, yakir gok ap ay mindeningambay angak.”

20 Minim bap pen tip ak angak, “Gor biynimb diy kond mindeningamb minim ak, yergiy angen ninrep giningambim? 21 Ar kun ak rek, biyn gok

yis ak sikoy band bap diy, palaw tiyn yomb ak sek, tungandik mandik gey, mindyinj yomb yimb tanimb rek ak giningamb angak.”

Kinjenrumb Sikoy Ak
(*Mat 7:13-14, 21-23*)

²² Pen Jiysis Jerusalem amning, yipund giy ma amnak. Nuk miñmon dawin yomb okok sek, miñmon sikoy okok sek namb namb kinying, minim angñek amnak. ²³ Biynimb kun okok mindeyak gok, bap Jiysis nup angak, “Gor biynimb gunap nep diningamb?”

Angek, kuyip angak, ²⁴ “Kun ak nimbip aspiyn, nimb kilis giy nep, kinjenrumb sikoy tam ak amningambim. Biynimb kuñay yimb nep, korip miñgan amnun angiy, gi mer niñningambay. ²⁵ Yenen, bi korip nop nimb ak kinjen giñek, nimb mis okok nep mindiy, pik giygiw giying angningambim, ‘Biyomb! Kinjen ak yikan angem,’ nuk angningamb, ‘Nimb akay nimb? Yand nimbip ma niñbiyn’ angningamb.”

²⁶ “Angek, nimb pen angningambim, ‘Nind miñmon chinup ak, ap minim angñinakniñ, nand yip tap niñnuk angem,’ ²⁷ nimbip tip ak angningamb, ‘Yand nimbip ma niñbiyn. Nimb akay nimb? Nimb biynimb tap siy tap timey nep gipim ak, kinjen ma yikningayn! Amnimimb’ angningamb.”

²⁸ “Kun ak kisen Ebrahim, Aysek, Jekop, bi Gor minim angep gok, Gor ñin ar ak mindyakniñ, nimbip pen ang mis yokek, siy angying, meng siwbirik mindeningambim. ²⁹ Pen biynimb Jiwdaw mer gok, gunap pumb lim gip okok ken apiy;

gunap pañind amimb okok ken apiy, gunap akdon nimb apiy, gunap akdon nimb apiy, Gor biynimb diy kond mindeningamb namb ak apiy, jimñiy tap yomb ñiñningambay.

³⁰ “Kun ak, biynimb nind opay gok, kasek amnun angyiy gos ak ma niñey, biynimb kisenimb gok apiy, kuyip tawsak ay nind amningambay angak.”

Jiysis Jerusalem Simb Niñak
(Mat 23:37-39)

³¹ Won kun siñak nep bi Peresiy gunap apiy, Jiysis nup angyak, “Gapman biyomb Herot nip pikayniñg gisap ak, miñmon biy kirgiy, miñmon bap key amninim angyak.”

³² Angeyak angak, “Nimb am kayn ayndik kun ak nup angem, niñmindonimuj. Miñiy sek, toy sek biynimb tap gip gok gen suñ ay, biynimb kichekiy malñiluk ambañ ayip gok, gen biynimb yimb ay giniñgamb. Menik mey, Jerusalem amiy, woñg yand ak gi diniñgayn.

³³ “Pen miñiy ñin kaw biy, Gor woñg yip angak anep gi mindeningayn. Jerusalem amen yip pikayniñgambay. Bi Gor minim angep gok kuyip, per miñmon gunap ma pikaypay; Jerusalem nep pikaypay. ³⁴ Jerusalem! Jerusalem! Gor, bi minim nup angep nimbip ker yokip gok, yenen per kamb diy pikaypim! Per biynimb nimbip gok kakaruk ñiluk rek, pil beñ okok ayin angen, yip yiruk niñiy ma dipim! ³⁵ Kun ak niñim; Gor angninep korip yomb nimbik ak, yikop yimb mindeningamb. Yip ma niñningambim. Kisen, bi Gor chinup nen angyokek asaw ak, tep yimb asaw

anġningambim ñin ak nep, yip niġningambim anġak.”

14

Jiysis Bi Ñin Tomb Siw Gak Ak Gek, Suġ Ayak

¹ Jiwda lotiw ñin bap, Jiysis am, Peresiy biyomb bap korip ak tap ñinakniġ, nuk yerip rek ginimur anġiy, niġyinsek ay mindeyak. ² Yenen: ñin kun ak, bi ñin tomb siw gak bap ap mindek. ³ Jiysis bi kun anup niġiy, bi Peresiy gok sek, bi low tiysa gok sek kuyip anġak, “Bi tap gip gok, lotiw ñin ak gon suġ aynimur akan, mer?” ⁴ Anġek, minim bap pen ma yimb anġeyak; nuk bi ñin tomb siw gak anup, diniġek suġ ayek, anġyokying, ⁵ bi kun gok kuyip anġak, “Ñapan nimb bap akan; makaw nimb bap, lotiw ñin ak ñiġ malpim kaw miġgan ak amek, nimb simb ma niġiy, ma diyokniġgambim?” ⁶ Anġek, kiyk pen minim bap ma anġyak.

Yimb Yomb Mindenġ Anġiy Gos Ak Ma Niġnimimb

⁷ Pen bi kun gok tap ñiġniġ, cheya ar tep tep gok nep bisġey amnakniġ, Jiysis minim bap paydoġ ay anġak, ⁸ “Bi bap biyn diniġ giy, tap yomb ñiġniġ nimbip suk anġek amiy, cheya tep aynimur ar ak, ma bisġinimimb. Bi kun ak nuk, biyomb yimb bap apiy bisġanġ anġiy, aynimur rek ayniġgamb. ⁹ Kun ak nimb ar kun ak bisġeniġgambim, bi nimbip suk anġningamb ak apiy anġningamb, ‘Nimb key siġak amem, biyomb biy bisġanġ anġek,’ nimbip nambiġ gakniġ, am gol okok bisġiniġgambim.

¹⁰ “Pen nimbip tap ñiñun angyi suk angeningiy, amiy gol okok bisinğ mindem mey, bi nimbip suk angningamb ak apiy angnimun, ‘Bungiy sikop. Nimb apiy cheya tep ar biy bisgim angek,’ biynimb tap ñiñning ap mindeningambay gok nimbip niñiy, bi gok namb biy biyomb mindpay angningambay.

¹¹ Kun ak rek, biynimb chin yimb yomb mindip angyi niñbay gok, Gor niñek yimb kuyip apy-owningamb. Pen biynimb, Gor Biyomb yimb mindip angyi siskoy diy mindpay gok, Gor yimb kuyip gek araningamb angak.”

¹² Jiysis minim kun ak angyi, bi tap yomb ñiñning, biynimb suk angak ak nup angak, “Nand tap yomb ñiñning; namam nak gok, bunğiy nak gok, biynimb miñmon nak jimñiy gok, bi maniy kunay mindeningamb gok kuyip nep suk ma angnimin. Biynimb kun gok rek, nip pen ambey ñiningambay. ¹³ Tap yomb ñiñning; biynimb yimgeprek gok, biynimb ñin tomb pañğ pikek amdip gok, biynimb windin koy gok, biynimb ñin tomb timey gip gok kuyip suk anğey apiy; tap ñiñnimimb.

¹⁴ “Biynimb simbgeprek kun gok, nip pen ñiningiy rek ma ayningamb ak mey; kisen Gor biynimb suñ-tep nuk gok, gek tikjakningambay ñin ak, nip pen ñiningamb angak.”

*Tap Yomb Ñiñningambay Ak Paydon Ayak
(Mat 22:1-10)*

¹⁵ Pen minim kun ak niñiy, bi kiy yip tap ñimbek bap, Jiysis nup angak, “Gor biynimb nuk diy kond mindeningamb gok, nuk yip jimñiy tap yomb

ñiñningambay rek, miñmiñ yimb giningambay angak.”

¹⁶ Angek, Jiysis angak, “Bi bap tap yomb ñiñning, biynimb kuñaynep suk angningamb.

¹⁷ Pen tap yomb ñiñemb ñin kun ak apeningamb, bi nup wong giñiningamb ak nup angyokiy angningamb, ‘Miñiy am biynimb angaypiyn gok kuyip am ponind wan angak,’ amiy angningamb, ‘Tap mangiysek dap nan-gip nen, apem amnun angningamb.’

¹⁸ “Angek, biynimb kun gok bap angningamb, ‘Yand amnim ak pen; mankumb bap tawpiyn ak, niñning amjiapiyn angningamb.’

¹⁹ “Bap angningamb, ‘Amnim ak pen; wong giyan angiy, makaw anep wanjrem tawpiyn ak, wong girep giningiy akan angiy, tiwning diniñning amjiapiyn angningamb.’

²⁰ “Bap angningamb, ‘Amnim ak pen, biyn yand ak kisen nep dipiyn angningamb.’

²¹ “Kun angey, bi kun ak andkind amiy biyomb nuk anup angningamb, ‘Biyomb! Biynimb apan gok am angen, kiyk kun kun apay.’ Angek, biyomb ak simbwur nup ak timey gek, binuk kun anup, tip ak dawin yomb kun okok angyokiy angningamb, ‘Nand kasek kinjen tam yomb okok sek, kinjen tam sikoy okok sek amying; biynimb simbgeprek gok diy, biynimb ñin tomb beñ beñ gip gok diy, biynimb windin koy gip gok diy, mumbwak mind tep ma gip gok diy, dand winimin angningamb.’

²² “Angek, angningamb rek giy, kisen bi wong giñemb kun ak angningamb, ‘Biyomb. Apan

rek kisen gipiyn ak pen; wikan gunap tip anep mindip angningamb.’

²³ “Angek, biyomb ak bi kun ak nup, miñmon yikop okok angyokiy angningamb, ‘Kinjen tam yomb okok sek, kinjen tam sikoy okok sek amiy, biynimb kuñay yimb dand apey, korip miñgan yip ak pisnep timbik dinimuñ. ²⁴ Pen biynimb nind suk angen ma opay gok, tap yip siskoy gunap ma ñiñningambay. Mer yimb angningamb’ angak.”

*Gos Niñrep Giy Yip Ker Winimimb Angak
(Mat 10:37-38)*

²⁵ Jiysis kun angyi amnakniñ, biynimb kuñay yimb nep, nup kisen giyakniñ, nuk andikiy kuyip angak, ²⁶ “Biynimb gok yip ker winingambay ak pen, gos yomb kiyk amningamb; nop, nonim, nunay, numam, biyn, ñapan kiyk, akan mumbwak kiyk key ak; yand niñen biynimb yand mindeningiy rek ma ayip.

²⁷ “Biynimb gunap angningambay, Jiysis biynimb nuk mindenjun ak pen; kun gon, biynimb gunap chinup timey giningiy rek ayip angyi, mumbwak kiyk keynep gos niñyng mindeningambay ak, kuyip ma diningayn.

²⁸ “Pen bi nimb bap, korip yomb bap gining, maniy ak yerip yerip diy ginim angyi, gos ak niñrep giy ginimuñ. ²⁹ Pen giyn giyn angyi, simen ak nind nep giningamb ak pen, korip par kun ak sisak gek, biynimb gok nup angyiwiy angningambay, ³⁰ ‘Bi par ak korip gining rek gi dand amiy, day sek kirgip angningambay.’

31 “Pen kun ak rek, bi bap, biyomb bap yip penpen giniᅅ; gos niᅅ-tep giy amnimuᅅ. Gos niᅅdand amiy, amiybi yand ak ten tawsin nep mindip; biyomb kun ak amiybi nuk tiwendiy tawsin mindip; penpen giy, yip ᅅaᅅᅅ aynimuᅅ rek ayip aᅅᅅiy mey, ³² par okok kisen owakniᅅ, minim ak yokiy aᅅᅅniᅅgamb, ‘Minim aᅅᅅ jimᅅniᅅjur aᅅᅅniᅅgamb.’

³³ “Kun ak niᅅrep ginimimb. Tap nimb gok nep wasemb ay, biynimb nimb gok nep wasemb ay giniᅅgambim ak, biynimb yand ma mindeniᅅgambim.

Sol Minim Ak Paydoᅅ Ayak

³⁴ “Sol tap yindik tep yimb ak pen; yindik nuk ak amek, yergiy gey tip ak yindik giniᅅgamb?

³⁵ Sol kun ak rek, di woᅅᅅday ak ayey, timey giniᅅgamb. Kun ak woᅅᅅ nuk bap ma mindip; diyokep rek nep ayip. Minim kun ak, biynimb gos timund sek ak tikniᅅnimimb aᅅᅅak”

15

Siypsiyp ᅅiluk Kurgak

(Mat 18:12-14)

¹ Biynimb tap siy tap timey giyak gok sek, bi takes dep gok sek Jiysis minim asap ak niᅅun aᅅᅅiy, ap niᅅmindeyak. ² Pen bi Peresiy gok sek, bi low tiysa gok sek Jiysis nup, aᅅᅅjiwiᅅ aᅅᅅyak, “Nuk yenen bi tap siy dep gok yip, bi takes diyiᅅᅅ maniy yesek gunap dipay gok yip, per tap jimᅅniᅅ ᅅiᅅimb aᅅᅅyak.”

³ Kun aᅅᅅey, Jiysis niᅅiy, minim bap kuyip paydoᅅ ay aᅅᅅak, ⁴ “Bi nimb bap, kanj siypsiyp ᅅin

jiwiy onep mamind ak mok mindeningamb. Pen nokom bap kurgek, gunap dam wikan bap ayek, tap kaskas ñinyakniñ, kanj nuk kurginingamb ak, mapin piñiyñiy nep ayek, piyowek amningamb. Am piyow giranrang niñiy, ⁵ nup tep yimb gakniñ, di wanjrem ar ak ay dand korip winingamb. Dand apiy, ⁶ bunjiy nuk gok kuyip suk anjiy, biynimb miñmon nuk yip jimñiy gok kuyip suk anjiy gek, ap nan-gey angningamb, ‘Kanj yand kurgip ak piyow niñiy dipiyn nen; manjiysek apem miñmiñ gun angningamb.’

⁷ “Kun ak rek, Gor biynimb nuk kuñaynep suñtep rek ayningamb ak pen; gos nuk ak amningamb biynimb minim nup timbrikiy, pisnep kumjun rek ayip anjiy, niñningambay gok. Kun ak mey, bap nup ker apek, enjol nuk gok yip miñmiñ yimb giningambay.

Maniy Manjiy Kurgak

⁸ “Akan pen, biyn bap maniy manjiy nuk onep wanjrem ak mindeningamb. Pen won bap, korip miñgan okok kapkap yapeningamb, nuk yerginingamb? Nuk lam dangiy ay, tap day day liñg liñg, maniy nuk won kun ak niñiy dek, ⁹ nup tep yimb gakniñ, bunjiy nuk gok kuyip, manjiysek suk angek ap nan-gey angningamb, ‘Maniy yowip won ak piyow niñbiyn nen, manjiysek apem miñmiñ gun angningamb.’

¹⁰ “Kun ak rek, Gor biynimb nup kirpay gok kuyip giningamb. Biynimb nup kirpay kun gok, bap gos kisenimb niñiy, nup deningamb, nuk enjol nuk gok yip miñmiñ yimb giningambay angak.”

Ñi Ak Nop Nup Kiring Annak

11 Jiysis kun angyi angak, “Bi bap ñi ominal tikningamb. 12 Ñinuk kisen ak, ap nop nup angningamb, ‘Bapiy. Tap chirupminay apan gok, pikasik yip gok key ñan angek,’ nop tap kuyipminay gok pikasik keykey ñiningamb. 13 Ñek, ñinuk kisen ak permindiy mer, nop tap pikasik ñiningamb gok yokiy maniy diy, dand miñmon paryomb okok amningamb. Am kun okok mindiy, biyn siy tap timey okok giying, maniy dand amningamb gok, mangyisek giñimb diningamb.

14 “Kun giy ñimbdeningamb, yiwan yomb yimb ak winingamb miñmon kun ak. Maniy diy, tap taw ñinimuy rek bap, ma yimb mindeningamb.

15 Kun gek, am bi miñmon nop nimb, kun ak nimb bap angniek, nup kanj wong ak angayningamb.

16 Pen nup yiwan yomb yimb ak ginep mindek mindek, kanj mokningambay tap day gok gunap, ñinimuy rek ayningamb ak pen; biynimb gunap, nup tap keñmangyi ma ñiningambay.

17 “Pen kisen, gos nuk ak asik ayek angningamb, ‘Bapiy bi nup wong giñimbay gok, keñmangyi kunay mindip. Yand biy minden, yiwan yomb yimb ak gip. 18 Bapiy mindip ak tip andkind amiy, nup angningayn, “Windin yirik ar nip ak timey giy, Gor windin yirik ar ak timey giy gipiyn rek, 19 yip ñiyand ma angnimin. Bi wong nip giñemb yikop rek bap, angayey mindenim, angningayn” angningamb.’

20 “Kun angyi, sanjiningamb. Am am, nop mindeningamb sijak man man gakniñ, nop ñinuk

nup parchim niņek, simb timey yimb gek, kasek am nup di kaykol gakniņ, ²¹ aņgniņgamb, ‘Bapiy. Gor windin yirik ar ak timey giy, windin yirik ar nip ak timey giy gipiyn rek, yip “Ñiyand” ma aņgnimin aņgniņgamb.’

²²⁻²⁴ “Nop pen, bi woņg nup giñiniņgambay gok kuyip aņgniņgamb, ‘Ñiyand ak pisnep kurgiy kumak rek ayak ak pen; miñiy niņsiypiyn. Nup chech paryomb ak ayñiy, ñin riyn ayñiy, tomb tirup ayñiy ginimimb. Kun giy, am makaw ñiluk tep yimb bap pik dand apem, daņgiy ñimbyiņg, miñmiñ ginjun aņgniņgamb.’ Aņgek, aņgniņgamb rek giy, keñmaņgiy daņgiy ñimbyiņg, miñmiñ giniņgambay.

²⁵ “Pen ñinuk nind ak, woņgday okok giraiņgiy, andkind yep korip maņ siņak apiy niņniņgamb; giyta pikiy, miñmiñ giyiņg geniņgambay. ²⁶ Kun gey niņiy, bi nop nup woņg giñemb bap nup aņgniņiy aņgniņgamb, ‘Yergispay?’ ²⁷ Aņgek aņgniņgamb, ‘Namam kisen kumimb aņgiy niņbun ak pen; miñiy andkind apek, nap makaw ñiluk tep yimb bap, pik daņgiy ñimbyiņg, miñmiñ gispay aņgniņgamb.’

²⁸ “Aņgek, nup miluk timey yimb yapek, korip miņgan ma yimb amniņgamb; mis akyaņ nep mindeniņgamb. Nop pen mis apiy, ‘Korip miņgan wan aņgiy’ nup minim sisayn aņgek, ²⁹ ñinuk aņgniņgamb, ‘Yand minim apan rek kindik giy, bi yikop woņg giñimbay rek ak mindiy, woņg nip ak per gen gen, simiy kuņay yimb nep yinimb. Pen yip meymey ñiluk bap ñey, buņgiy yand gok yip pik daņgiy ñimbyiņg, miñmiñ ma gipun. ³⁰ Ñinak

kun ak, tap bilok ñinak gok dam biyn siy, tap okok giy, ñimbdiy apek, nup simb ninjiy, makaw ñiluk tep yimb ak pikpan angninḡamb.’

³¹ “Kun anḡek, nop ñinuk nup angninḡamb, ‘Chirapiy per mindpur rek, tap yand gok manḡiysek nak dininḡamban. ³² Namam kisen kumimb rek ayak ak pen; miñiy tip ak apek yimb ninjiy mey, miñmiñ gispun angninḡamb’ anḡak.”

16

Kisen Yergiy Rek Mindeninḡambim Gos Ak Niñnimimb

¹ Jiysis binuk gok kuyip anḡak, “Biyomb tap nuk kuḡay mindeninḡamb bap, bi kond mindep nuk bap anḡayek, tap nup gok kond mindeninḡamb. Pen biyomb ak, minim bap niñninḡamb; bi tap nup kond mindeninḡamb ak, tap nup gok monmon giniḡamb. ² Kun ak ninjiy, nup suk anḡek apek angninḡamb, ‘Tap yip kond mind tep ma gipan ak, yip anḡñey niñbiyn. Kun ak nand am, tap yand yerip yerip mindip gok ñin paḡg tep giy; biynimb okok kuyip, tap day yand yerip yerip mindip gok ñin paḡg tep giy, ap yip anḡñinimin. Pen woḡg yip ak kisen ma giniḡamban angninḡamb.’

³ “Anḡek, bi tap nup kond mindep kun ak, namb nuk okok nep gos kuḡay ninjiy angninḡamb, ‘Biyomb ak yip anḡyoksap rek yerginim? Yand bi kilis ma mindpiyn ak, man piñiy paḡgnim rek ma ayip. Biynimb gunap tap kuyip ak asimb anḡñimben, yip nambiḡ giniḡamb angninḡamb.’ ⁴ Pen kisen gosimb niñrep giy angninḡamb, ‘Yerginim ak

ninšipiyn. Ar kun ak gen biyomb ak yip angyokek, biynimb gunap yip dey, korip kiy ak kin mindeningayn angningamb.’

⁵ “Kun angyi, biyomb nuk ak biynimb gunap kuyip, tap day mindeningamb gok suk angek, bi nind winingamb anup angningamb, ‘Biyomb yand ak, tap day nuk nip yerip yerip mindip?’

⁶ Angek, ‘Wel diram ñin jiwiy onep kangol ak angningamb.’ Angek angningamb, ‘Tiker biy diy, kasek ñin jiwiy ominal nokom nep tikan angningamb.’ Angek, angningamb rek giningamb.

⁷ “Kisen bi bap apek angningamb, ‘Biyomb yand ak, tap day nuk nip yerip yerip mindip?’ Angek, ‘Wan tawsin rays bek angningamb.’ Angek angningamb, ‘Tiker biy diy, kasek eyit handret nep tiknimin angningamb.’ Angek, angningamb rek giningamb.

⁸ “Kun gek, kisen biyomb ak ninjiy angningamb, ‘Bi tap yip kond mindep ak, yerer giy mindrep giningamb ak, ninrep gip angningamb.’

“Kun ak ninjim: Biynimb yikop gok apay, ‘Miñiy yergiy gon, kisen bisgep chin ak mindeningamb angyi’ gos ak ninying, gey amimb. Pen biynimb Gor ker mindpay gok, kun rek gey ambikop ak tep. ⁹ Maniy tap yerip man ar biy mindip gok, biynimb yingeprek gok kuyip simb ninjiy ñem mey; kisen tap kun gok pisnep kurginingamb ñin ak, kinjen tep nimb ak mindeningamb.

¹⁰ Tap sikoy bap, biynimb gunap kuyip ñin ar ak ayey, direp ma giningambay ak; tap yomb bap ñey, kunep giningambay. Pen tap sikoy bap, di ñin ar kuyip ayey, direp giningambay

ak; tap yomb gok ñey, kunep giniᅇgambay. ¹¹ Pen nimb taprep lum ar biy diyiᅇg, niᅇrep giy ma geniᅇgambim; an nimbip gek perper mindeniᅇgambim. ¹² Biyomb ak tap nuk, pen ñin ar nimbip ayek, direp ma geniᅇgambim, gos yerip niᅇiy, tip tep miñmon nuk biyoᅇ ak nimbip aᅇgniᅇgamb.

¹³ “Bi nokom bap, biyomb omiᅇal kuyip wong giñinimuᅇ rek ma ayip. Yenen: nuk biyomb bap nup niᅇek tep geniᅇgamb, biyomb bap nup kirginiᅇgamb. Akaᅇ biyomb bap nup niᅇek tep geniᅇgamb; bap nup kirginiᅇgamb. Kun ak, nimb maniy tap yikop gok, tap tep yimb aᅇgiy, Gor nup kirginimimb rek ayip ak; niᅇrep ginimimb aᅇgak.”

¹⁴ Bi Peresiy gok, gosimb yomb kiyk maniy ar ak nep niᅇyiᅇgipay ak mey, Jiysis minim aᅇgak kun ak niᅇiy, aᅇgjiwyak. ¹⁵ Aᅇgjiweyak, kuyip aᅇgak, “Tap biynimb niᅇey tep gip gok, Gor niᅇek tap yikop rek ayip. Nimb biynimb windin yirik ar ak, chin biynimb tep mindpun apim ak pen; Gor namb nimbip biyaᅇ niᅇimb.

¹⁶ “Pen Jon bi ñiᅇg pikñemb ma mindek ñin ak, biynimb gok Mosis low minim tikak ak sek, bi Gor minim aᅇgep gunap minim tikyak ak sek niᅇiy, ar kun ak gey amyiᅇgip. Pen miñiy, Jon apiy, minim tep Gor biynimb diy kond mindeniᅇgamb ak aᅇgek niᅇiy, biynimb maᅇgiysek ar kun ak nep amnun aᅇgiy, gey amjap. ¹⁷ Pen semb biyoᅇ sek, mankumb biy sek kurginiᅇgamb rek ayip: Gor low minim ar ak, kurginimuᅇ rek ma mindip.

18 “Kun ak bi biyn diy kirgiy, am biyn kisenimb bap dipay gok, timey gipay. Pen bi an tikjakiy, biyn bi diy kirgak bap nup diniᅅgamb ak; kunep timey giniᅅgamb.

Maniy Bi Ak Yip Lasaras Yip

19 “Bi bap maniy tap nuk kuᅅay yimb mindyiᅅgip. Nuk chech teprep yimb gok nep yimiy, tap ᅅiᅅemb teprep gok nep ᅅimbyiᅅgip. 20 Pen korip kinjeᅅrumb gol nuk siᅅak, bi soy sek tap ma mindek bap, dap ayey mindyiᅅgip. Yimb nuk Lasaras. 21 Gosimb nuk ak, yand bi tap kuᅅay mindip biy tap ᅅimbek, day day bong molik okok yowᅅiᅅgamb gok ᅅimben mey, yip yiwan ma giniᅅgamb aᅅgyiᅅgip. Pen kayn gok apiy, soy nup gok bileng ᅅimbyiᅅgipay.

22 “Kindik, bi maniy tap nuk ma mindyiᅅgip kun ak kumek, enjol gok ap nup dand Gor miᅅmon biyone amiy, Ebrahim yip ayak. Bi maniy tap nuk kuᅅay mindyiᅅgip ak, kunep kumek komyakniᅅ, 23 am mon key yinᅅap ak, yiwur yomb yimb gakniᅅ mindyiᅅgip. Pen mindiy, kiyoneᅅiy niᅅak: Ebrahim, Lasaras yip keykey siᅅbiyone minderik. 24 Niᅅiy, suk aᅅgiy aᅅgak, ‘Bapiy Ebrahim. Yip simb niᅅan. Lasaras nup aᅅgey, ᅅin maᅅgiy par nuk bap ᅅiᅅg ak tawiy, dap alemb yip ak diniᅅek, yip sayn gaᅅ. Mon ak yiniy, yip yiwur timey yimb giᅅ aᅅgak.’

25 “Aᅅgek, Ebrahim aᅅgak, ‘ᅅi niᅅan! Man ar biyaᅅ mindenak ᅅin ak, nak tap tep gok nep dinak; Lasaras tap timey gok nep dak. Pen miᅅiy miᅅmon biy, nuk sayn tep mindakniᅅ, niᅅ yiwur yomb gisap. 26 Gor mol yomb yimb ak, namb

biy gayak ak mey; chin biynimb pis biy, talakiy kayan ak ma amningambun. Pen nimb pis kayan ak talakiy, biy ma winingambim angak.’

²⁷ “Angek, bi kun ak angak, ‘Kun apan ak, Lasaras nup angey, bapiy korip amiy, ²⁸ mam yand onep mamind ak kuyip, minim kilis yimb ak angenimun, miñmon yiwur pernep gip biy, ma winingiy angak.’

²⁹ “Kun angkek, Ebrahim angak, ‘Gor Mosis nup gos ñek, Baybol buk minim tikak ak sek, bi minim nup angep gunap kuyip gos, ñek Baybol buk tikiyak minim ak sek mindip. Niñning, kun gok niñningiy angak.’

³⁰ “Angek, maniy bi kun ak angak, ‘Bapiy. Ak tep ma apan. Biynimb bap kumiy tikjakiy, am angeningamb mey, niñind angip angiy, tap siy tap timey gipay ar ak kirgiy, Gor nup nep gosimb niñningambay angak.’

³¹ “Angek, Ebrahim angak, ‘Kiyk Mosis minim tikak ak ma niñiy, bi Gor minim angep gunap, minim tikiyak ak ma niñiy gipay ak; bi bap kumiy tikjakiy, am angkek, kunep ma niñningambay angak.’”

17

*Tap Siy Tap Timey Giy Apyap Pikpay
(Mat 18:6-7; Mak 9:42)*

¹ Jiysis binuk gok kuyip angak, “Biyn bap akan, bi bap miñ timey ar ak giy, biynimb gunap kuyip gos ñey, ar kun ak giy apyap pikpay ak; timey yimb gip. Miñ ar kun ak nind giyngipay, miñiy gipay, kisen kunep giningambay. Pen gipay kun

ak rek, yiwur kun ak key yimb diniᅇgambay. ² Kiyk won kun siᅇak nep, giniᅇg giyakniᅇ, kuyip kamb yomb bap, kuᅇam ak sek miᅇ aybirikiy, dam ᅇiᅇg yokpiyap ak, kuyip tep gipyap. Yenen: kiyk kim mindiy, biynimb yip ker ᅇin tomb wos ma gip gunap, kuyip gey apyap pikniᅇgambay ak, yiwur yomb yimb diniᅇgambay. ³ Kun ak nimb asik tep ginimimb.

Pen mam akan, ay bap tap siy tap timey gonimuᅇ, nup niᅇchikiy aᅇgem, yenen kun gipiyn aᅇgiy niᅇonimuᅇ; niᅇiy kirginimimb. ⁴ Pen tap nimbip rek gunap timey giyiᅇg, yenen kun gipiyn aᅇgiy, ap aᅇgonimuᅇ, niᅇiy kirginimimb. ᅇin nokom bap, kun gek gek onep ar ak rek amek, kunep niᅇiy kirginimimb aᅇgak.”

Gor Nup Gosimb Niᅇbay

⁵ Jiysis kun aᅇgek, binuk gok aᅇgyak, “Chin key kun ginjun rek ma ayip; kuyip yiruk niᅇjun rek ayip. Kun ak nand gey, chin Gor nup gosimb nokom niᅇon, chinup kond mindakniᅇ, kun ginjun aᅇgyak.”

⁶ Aᅇgey, Jiysis kuyip aᅇgak, “Pen Gor nup gosimb niᅇbim ak yomb mer: mon mastet maᅇgiy achimb rek nep mindek; aᅇgniᅇgambim, ‘Mon biy junj sek jiwiy, ᅇiᅇg yomb namb siᅇbindoᅇ, jak mindey aᅇgem,’ Gor aᅇgniᅇgambim rek nep giniᅇgamb.

Bi Woᅇg Giᅇemb

⁷ “Bi bap, bi woᅇg giᅇemb nuk bap diy aᅇgek, am man piᅇiy paᅇgiy akan, kanj siypsiyp gok mok taᅇgiy, andkind korip apek, biyomb nuk

ak, nup yerip angningamb? ‘Nip yiwan gip, kasek ap bisgiy tap ñinan angningamb?’ ⁸ Mer! Kun ma angningamb. Nuk angningamb, ‘Chech ak dey apek, ler ak aybirikiy, ñing tap yip gok dapey ñimben, kisen ñing tap nand gok ñinan angningamb.’ ⁹ Bi wong giñemb nuk ak, angningamb rek gek, nup minim tep gunap ma angningamb. ‘Bi wong giñemb yand ak mey, apiyn rek gip angningamb.’

¹⁰ “Kun ak rek mey nimb. Gor nimbip angningamb rek giy, kisen angningambim, ‘Chin biynimb tep mer: ar bap key ma gipun; wong chin gep rek ak mey, gipun angningambim’ angak.”

Bi Soy Aydik Ayak Onep Wanjrem Ak Gek Sun Ayak

¹¹ Jiysis Jerusalem amniyn angyi, miñmon Samariya biy Galiyliy bindoñ, namb ak am am miñmon bap amjakakniñ, ¹² bi soy ayndik ayak onep wanjrem ak, nup namb pikiy, keykey siñbindoñ mindiy, ¹³ angyak, “Biyomb Jiysis. Chinup simb niñan angyak.”

¹⁴ Angeyak, kuyip angak, “Nimbip sun ayip nen, am bi Gor nup simbongep gok kuyip, yomnimimb angak.” Kun angek, kinjeñnamb okok amniyakniñ, kuyip mangiysek sun ayek, ¹⁵ bi Samariya nimb ak nup sun ayak ak niñiy, minim yomb angying, Gor nup yimb ak dand aranying, ¹⁶ andkind ap Jiysis mindek siñak kongim yimiy, nup “Tep” angak.

¹⁷ Kun gek niñiy, Jiysis angak, “Yand angninbiyn-eñ; bi onep wanjrem ak sun ayip

angiy ninbiyn ak pen; bi onep anjip ak akay? ¹⁸ Bi gunap yenen ma opay? Bi par okok nimb ak nep apiy, Gor nup tep angip angak.”

¹⁹ Kun angiy, bi kun anup angak, “Jiysis yip gek, sun ayningamb angiy gos ak ninban rek, nip gen sun ayip nen, amnoj angak.”

*Gor Biynimb Diy Kond Mindeningamb
(Mat 24:23-28)*

²⁰ Pen bi Peresiy gok, Jiysis nup angyak, “Kiyņ yomb key per kond mindpun ak ñin akay rek apiy, chinup diy kond mindeningamb?”

Angey, Jiysis angak, “Biyomb biynimb diy kond mindeningamb apim kun ak, biyomb kiyņ gunap, biynimb misen kond mindey ninjy apay, ²¹ ‘Biyimb kond mindip biy, kond mindip bindoņ apay’ rek ma angningambim. Yenen, nuk nimbip bak ay, kapkap kond mindeningamb angak.”

²² Kun angiy, binuk gok kuyip angak, “Kisen ñin bap, Bi bap Ñinuk nup ninun angiy, mapin nimbip ak, piņiyñiy nep ayningamb ak pen, nup misen ma ninningambim. ²³ Biynimb gunap mindip bindoņ, mindip biy angey, minim kun ak ninind apay angiy, ma am piyow ninnimimb. ²⁴ Yenen: Bi bap Ñinuk winingamb ñin ak, añiñak diy, melik parsek gip rek ak, gakniņ winingamb. ²⁵ Pen biynimb miñiy mindpay gok, nup yiruk ninjy ma dey; yiwur yomb yimb ak diy, kumiy tikjak semb biyoņ amiy, kisen tip ak winingamb.

²⁶ “Nuk winingamb ñin kun ak, wosrey Nowa mindek ñin ak, gak rek giningamb. ²⁷ Biynimb gok tap ñimbying, ñing ñimbying, biyn penpen

ñiyiņg gi mindyakniņ, Nowa amyoniņg apyoniņg on siyip miņgan sikind amdey, miñmon yomb sikerek ak pikiy, ñiņg wilik apiy, biynimb kun gok kuyip, maņgiysek yiwiņgdek kumyak.

28 “Pen bi Lot mindek ñin ak, Sodom Gomora biynimb gok kunep tap ñimbyiņg, ñiņg ñimbyiņg, sikiyim giyiņg, tap woiņg giyiņg, korip giyiņg gi mindyakniņ, 29 Lot miñmon kun ak kirgiy, miñmon wikan bap key amnakniņ, mon maņlaņ yomb yimb ak, semb biyoņ nimb apiy, Sodom Gomora biynimb kuyip, maņgiysek yin simbok amnak. 30 Bi bap, Ñinuk winiņgamb ñin ak; Nowa mindyiņgip ñin ak sek, Lot mindyiņgip ñin ak sek gi mindyiņgipay rek, gi mindeniņgambay.

31 “Ñin kun ak, biynimb korip ar biyoņ mindeniņgiy gok, tap kiyk gok diniņg, korip miņgan ma amniņgiy. Pen biynimb woiņgday okok taņgeniņgiy gok, tap gunap diniņg, andkind korip ma amniņgiy. 32 Lot biynuk nup gak ar ak niņnimimb. 33 Pen biynimb key nep mindiy, mindrep giniņgayn anņniņgambay gok, mon key yinjap ak amniņgambay. Biynimb Jiysis ker minden, yip pikayniņg pikayniņgiy anņiy, yip kisen giniņgambay gok, biynimb yand yimb mindiy mey, perper mindeniņgambay. 34 Nimbip aspiyn: ñin kun ak, bi omiņal minj ar nokom bap, kineniņgayr ak; Gor bi bap nup diy, bap nup kirginiņgamb. 35 Pen biyn omiņal biret jimñiy gi mindeniņgayr ak; bap diy, bap nup kirginiņgamb. 36 [Bi omiņal woiņgday okok taņgeniņgayr ak; bap diy, bap nup kirginiņgamb anņak.]”

37 Kun anņek anņyak, “Biyomb. Minim aspan

kun ak, akay kun giniᅅgamb?”

Anᅅey, Jiysis aᅅgak, “Miñ miᅅgan, mon miᅅgan, kamb miᅅgan okok ma giniᅅgamb; miseᅅ nep namb siᅅak giniᅅgamb aᅅgak.”

18

Bi Kor Niᅅep Bap Biyn Kaᅅil Bap

¹ Jiysis binuk gok, yiruk ma niᅅniᅅgiy, Gor nup aᅅgniᅅyiᅅ nep mindeniᅅgiy aᅅgiy, kuyip minim bap paydoᅅ ay aᅅgak: ² “Miñmon bap, biyomb kor niᅅep bap mindeniᅅgamb. Pen bi kun ak, Gor nup gosimb ak ma niᅅiy, biynimb gok kuyip simb ma niᅅniᅅgamb. ³ Biyn kaᅅil miñmon kun ak nimb bap, pernep apiy nup aᅅgniᅅgamb, ‘Bi ñaᅅpep yand ak, minim chirup ak niᅅnimin aᅅgniᅅgamb.’ ⁴ Kun aᅅgniᅅgamb ak pen, biyomb kor niᅅep kun ak, minim nup ak ma diniᅅgamb. Ma dek, nup ap minek minek aᅅgniᅅ gek gek, kisen biyomb kun ak aᅅgniᅅgamb, ‘Yand Gor nup, gosimb ak ma niᅅiy, biynimb gok kuyip, simb ma niᅅiy gipiyn ak pen; ⁵ biyn kaᅅil biy minek minek ap aᅅgek aᅅgek, yip yiruk giniᅅgamb nen, kor kun ak niᅅnim aᅅgniᅅgamb.’

⁶ “Bi yikop biynimb simb ma niᅅep ak, kun gak ak pen; ⁷⁻⁸ Gor ma giniᅅgamb aᅅgiy niᅅbim? Akan pen, takiy mindiy giniᅅgamb aᅅgiy niᅅbim? Mer! Nimbip aspiyn: biynimb nuk key niᅅiy dak gok kuyip, timey giyakniᅅ, pumbnamb kisyimken nup aᅅgniᅅyiᅅ mindpay rek, per ma kond mindeniᅅgamb; aᅅgniᅅgambay rek niᅅiy giniᅅgamb aᅅgak.”

Bi Peresiᅅ Bap Takes Dep Bap

⁹ Pen chin mind tep gipun; biynimb gunap, mind tep ma gipay angyak rek, kuyip minim bap paydon ay angak, ¹⁰ “Bi Peresiy bap, bi takes diyingip bap Gor nup angninjing, Gor angninjep korip ak amnirik. ¹¹ Bi Peresiy ak namb nuk okok nep, Gor nup lotiw giy angak, ‘Nip tep yimb aspiyn. Yand bi gunap gipay rek; biyn siy, tap siy, tap timey okok ma gipiyn. Yand bi takes dep biy rek mer. ¹² Wiyk minek minek lotiw minden angyi, per ñin ominjal tap ma ñimbiyn sek. Per tap yand onep wanjrem ak diying, nip nokom bap ñiy, yand onep anjip ak nep dipiyn angak.’

¹³ “Pen bi takes dep ak, keykey sinbikdon jiy kuyangiy mindiy, gos kunay ninjiy angak, ‘Gor. Yand bi tap siy tap timey gipiyn ak, yip simb ninjimin angak.’

¹⁴ “Nimbip aspiyn: Gor bi takes dep ak kun angek ninjiy, nup diy, bi suñ-tep yimb mindpiyn angak ak nup ma dak. Yenen: biynimb yimb kiyk key dand aranimbay gok, Gor gek apyap pikningambay. Pen biynimb, Gor Biyomb mindip angyi, pirikiy, kapkap mindeningambay gok; Gor gek yimb mindeningamb angak.”

*Jiysis Ñapan Sikoy Gok Kuyip Bilesiym Gak
(Mat 19:13-15; Mak 10:13-16)*

¹⁵ Biynimb gok Jiysis ñapan chinup gok bilesiym gan angyi, dand apey, bilesiym gakniñ, binuk gok, biynimb kun gok kuyip ninchikiy angyak. ¹⁶ Kun geyak, Jiysis ñapan sikoy gok suk angek wiyakniñ, binuk gok kuyip angak, “Yenen kun apim? Ñapan sikoy gok kirgem, yip ker wiyaj. Gor nup dipay mey; ñapan sikoy kun

gok rek. ¹⁷ Ñapan sikoy gok, Gor minim ak kun kun giy mindip angey niñiy, kasek dipay. Kun ak nimbip niñind aspiyn; biynimb ñapan sikoy yip gosimb niñbay rek niñningambay gok, Gor kuyip diy, kond mindeningamb; biynimb yikop gok kuyip kirginingamb angak.”

Jiwda Biyomb Bap Tap Kunay Mindek
(*Mat 19:16-22; Mak 10:17-22*)

¹⁸ Jiwda biyomb bap, Jiysis mindek ak apiy angak, “Tiysa nand bi tep yimb. Yand yergen, Gor gek per mindeningayn?”

¹⁹ Angek, Jiysis angak, “Biynimb gunap tep ma mindipay; Gor nuk nep mey, bi tep yimb mindip. Kun ak gos yerip niñiy, yip bi tep yimb apan?”

²⁰ Pen nand Gor low minim ak niñban: ‘Biyn siy bi siy ma ginimimb. Chip ma ñanagnimimb. Tap siy ma dinimimb. Yesek ma anagnimimb. Nap nanim minim anagnimiy ar ak nep niñiy, kindik ginimimb angip’ angak.”

²¹ Angek, bi kun ak angak, “Yand ñiskoy miñg tikiy, low minim ar kun ak kindik gi dap dap, miñiy ñin biy, kindik ginep mindpiyn angak.”

²² Jiysis minim kun ak niñiy angak, “Tap nokom bap nep ma gipan. Tap nak gok mangiysek yokiy maniy diy, biynimb yingeprek gok kuyip ñiy mey; mindrep gep nand ak, mindeningamb Gor miñmon biyoñ. Kun ak apiyn rek giy apiy, bi yand bap mindenimin angak.”

²³ Angek, nuk minim kun ak niñiy, gospar yimb ayak.

²⁴ Gospar ayek, Jiysis angak, “Biynimb tap kunay mindip gok, kosyam yimb Gor nup gosimb

niney, kuyip diy kond mindeningamb. ²⁵ Kanj kamel gok, ñiw lekpai minġan ak amning, kasek amningiy rek ayningamb; pen biynimb maniy tap kiyk kuñay mindip gok, kosyam yimb Gor nup gosimb niney, kuyip diy kond mindeningamb anġak.”

²⁶ Kun anġek, biynimb mindeyak gok anġyak, “Minim aspan kun ak, biynimb gunap Gor ker mindenjun rek ma ayip. Akan yerip?”

²⁷ Anġey, Jiysis anġak, “Ar gunap biynimb giningiy rek ma ayningamb ak pen; Gor nuk gining, ginimuñ rek nep mindip anġak.”

²⁸ Kun anġek, Piyta anġak, “Niñan! Korip tap chin gok mañġisek kirgiy, nip chingiy nep tapun anġak.”

²⁹ Anġek, Jiysis kuyip anġak, “Nimbip niñind aspiyn. Biynimb Gor biynimb nuk kuñay diy kond mindonimuñ anġiy; korip, biyn, numam, nop, nonim, ñapan kiyk gok kuyip kirgey, Gor sakiy ma giningamb. ³⁰ Miñiy mindpun ñin namb biy, kuyip kond mind tep gek, tap kiyk gok, biynimb kiyk gok kuñaynep mindeningamb. Pen ñin kisen ak apek, nuk yip perper mindeningambay anġak.”

*Yip Pikayningambay Anġiy Tip Ak Anġak
(Mat 20:29-34; Mak 10:46-52)*

³¹ Jiysis binuk onep wimġan ak kuyip, dand gol okok amiy anġak, “Niñim. Miñiy Jerusalem amoningambun, Bi bap Ñinuk nup, wosrey Baybol buk ak tikiy anġyak rek giningambay. ³² Nup di bi Jiwda mer gok, ñin ar ak ayeningambay, nup anġjiwying, ñiñlon ayiñg, kiñuk giyiñg, ³³ miñ diy pikyiñg, pisnep pikayningambay. Pen minek

ominjal nokom mindiy, tip ak tikjakiy, kim mindeningamb angak.”

³⁴ Pen kun angek, binuk gok gos pangyiknimun rek ma ayek, minim asap ar ak angyi, ma ninyak.

Jiysis Bi Windin Koy Gak Ak Gek, Windin Yimb Niñak

(Mat 20:17-19; Mak 10:32-34)

³⁵ Pen kisen, am miñmon Jeriykow amjakyakniñ, bi windin koy, maniy tap gok nen asimb angyingip bap, kinjen yomb gol sinjak bising mindek ak mey; ³⁶ biynimb kunaynep minim ang pandikyakniñ, biynimb gunap kuyip angninijy angak, “Yergispay?”

³⁷ Angek angyak, “Jiysis bi Nasaret nimb ak, apiy pandiksap angyak.”

³⁸ Kun angeyak, nuk suk yomb angyi angak, “Jiysis! Depiyt Ñinuk! Yip simb niñan angak.”

³⁹ Angek, biynimb pandikeyak gok, nup angyi angyak, “Yenen kun aspan? Kapkap mindey angyak.”

Kun angyak ak pen, nuk kapkap ma mindek, suk yomb angying angak, “Jiysis! Depiyt Ñinuk! Yip simb niñan angak!”

⁴⁰ Angek, Jiysis ninijy aland giy, biynimb gok kuyip angak, “Poñind yep man sinbijy wim angak.”

Angek, poñind apeyak angak, ⁴¹ “Nip yerginim?”

Angek angak, “Biyomb. Yip gey windin ak tip ninijyn angak.”

⁴² Angek, Jiysis nup angak, “Yip geningamb, windin yimb niñningayn angyi gos niñban ak, windin niñan angak.”

⁴³ Angek, won kun anep windin niñiy, Gor nup yimb ak dand aranying, Jiysis amnakniñ, kindik gak. Biynimb mañgiyseki Jiysis gak kun ak niñiy, Gor nup yimb ak dand aranyak.

19

Sakiyas Yerer Gak

¹⁻³ Pen miñmon Jeriykow namb kun ak, bi man nep won bap, maniy tap nuk kuñay mindyngip ak mindek. Yimb nuk ak Sakiyas. Nuk bi takes dep gok kuyip, mañgiyseki kond mindyngip. Jiysis pandikakniñ, biynimb kuñaynep ap niñing geyak, Sakiyas bi mañ won ak mey, Jiysis bi yerip rek ak niñiyn angyi, ⁴ nind amiy, mon bind bap tanaraniy, Jiysis apek tam bineñ niñmindek.

⁵ Jiysis pen ap, mon tan mindek kiñiñ siñak apiy, kuyongiy niñiy, Sakiyas nup angak, “Kasek lung yowan! Miñiy korip nand ak, am mindeningayn angak.” ⁶ Angek, Sakiyas lung yapiy, miñmiñ giying, Jiysis nup poñind korip nuk amnak.

⁷ Biynimb gok gak kun ak niñiy, miluk yapek angyak, “Bi kun ak am, bi tap siy tap timey gip korip ak, kining amjap angyak.”

⁸ Pen kisen am, Sakiyas korip ak minim ang mindyng, Sakiyas Jiysis nup angak, “Biyomb. Nand niñan! Miñiy tap yand gok bilok pis ak ay, pis ak biynimb simbgeprek gok kuyip ñiningayn. Yand nind tom giy, biynimb gunap tap kuyip siy dinik rek ayip gok, pen ñining, tap nokom bap dinik rek, pen omiñal omiñal ñiningayn. Pen tap omiñal siy dinik rek, pen ñining, onep jiy ak

ñiningayn. Kun giy, gi dam dam maŋgiysek day paŋg diy, kirginingayn aŋgak.”

⁹ Pen biynimb gok niŋmindyakniŋ, Jiysis Sakiyas nup minim ak aŋgiy aŋgak, “Bi biy nusind Ebrahim, Gor nup gosimb niŋak rek niŋimb ak mey; Gor miñiy nup diy, biynimb nuk yip korip jimñiy kinbay gok kuyip diy gip. ¹⁰ Yenen: bi bap Ñinuk wak ak, biynimb Gor ker mindpay gok kuyip diniŋ ma wak; biynimb nup ker ma mindpay gok kuyip diniŋ awak aŋgak.”

*Bi Onep Wanjrem Ak Maniy Diyak
(Mat 25:14-30)*

¹¹ Pen biynimb kun gok, Jiysis mey, Biyomb per kond mindpun ak; Jerusalem amek, nup kiyn aŋgayon, chinup kond mindek, mindrep yimb giningambun aŋgiy niŋyak.

Jiysis gos niŋyak kun ak key niŋiy, minim nind aŋgak ak niŋyakniŋ, minim bap sek paydon ay aŋgak, ¹² “Bi biyomb mindep rek bap, kond mindep yand ak mindip amen, yip kiyn aŋgayek, andkind apiy, biynimb miñmon yand guniy kuyip kond mindenim aŋgiy, miñmon paryomb okok amniŋgamb. ¹³ Pen kisen amniŋgamb: nind bi nup woŋg giñiningambay onep wanjrem ak kuyip suk aŋgek apey, maniy yir omiŋal, omiŋal keykey bilok ñiy aŋgniŋgamb, ‘Maniy ñispiyn biy diy, woŋg biysniys genimimb. Kisen yand tip ak winiŋgayn aŋgniŋgamb.’

¹⁴ “Kun aŋgiy, amniŋgamb ak pen; biynimb miñmon nuk yip jimñiy gok, nup miluk niŋiy, bi gunap aŋgyokey kisen amiy, bi kond mindep ak

nup angningambay, ‘Bi chinup kiyn anj ayning gispan biy, chin ma diningambun angningambay.’

15 “Pen nup kiyn anjayek, tip ak andkind apiy, bi nup wonj giñiningambay gok kuyip, suk anjek apey angningamb, ‘Maniy ñinik gok sikyim gi andik mandik giy; pen yerip yerip dipim?’

16 Anjek, bi nind winingamb ak angningamb, “Biyomb. Maniy yir yip ñinak ominjal ak, sikyim gi andik mandik giy, pen yir ñin jiwiy ak dipiyn angningamb.”

17 “Anjek, biyomb ak angningamb, ‘Nand girep gipan. Tap sikoy ak ñenik, wonj girep ginak rek, miñiy miñmon dawin yomb onep wanjrem ak anjen, kond mindeningamban angningamb.’

18 “Bi namb ak apiy angningamb, ‘Biyomb. Maniy yir yip ñinak ominjal ak, sikyim gi andik mandik giy, pen yir onep mamind ak dipiyn angningamb.’

19 “Anjek, biyomb ak angningamb, ‘Gipan kun ak rek, miñiy nip anjen, dawin yomb onep mamind ak kond mindeningamban angningamb.’

20-21 “Pen bi nup wonj giñemb bap apiy angningamb, ‘Biyomb. Yand nip ninbiyn. Nand bi kalrimey yimb. Biynimb gunap tap kuyip gok sikyim girep giy mer; pilgiy rek dipan. Tap wonj kosyam giy yimbay gok, nand kilis giy nep ñimban. Kun ak yand nip pirikiy mey, maniy yir yip ñinak ominjal ak, yikop dam tiwning ayen mindek, miñiy dand opiyn angningamb.’

22 “Anjek, biyomb ak angningamb, ‘Minim nak apan ak tungandikiy, nip key kor giningayn. Yip bi timey yimb, biynimb tap kuyip gok sikyim

girep giy mer; yikop diy, tap wong kosyam gi yimbay gok, nand kilis giy nep, taw piling dipan apan kun ak; ²³ yenen maniy yip ak diy, dam ben ayey, andkind apiy siyniñ gunap sek ma dipiyn angningamb.'

²⁴ "Kun angyi, bi yep mañ siñak mindeningambay gok kuyip angningamb, 'Maniy yir yip omiñal ak piling diy, bi maniy yir ñin jiwiy mindip ak nup ñim angningamb.'

²⁵ "Angek angningambay, 'Biyomb. Nuk maniy yir ñin jiwiy ak, di mindip angningambay.'

²⁶ "Angey angningamb, 'Nimbip aspiyn. Per biynimb tap kiyk kuñay mindip gok, gunap sek dipay; pen biynimb tap kiyk siskoy mindip gok, gey pisnep yap amimb. ²⁷ Pen biynimb, 'Kiyñ kun ak chin ma diningambun angyi, miluk niñbay gok kuyip am dand apiy, windin yirik ar yip siñbiy, ñañg aynimimb angningamb' angak."

Jiysis Nup Kiyñ Gok Kuyip Gipay Rek Giyñg Dand Jerusalem Amniyak

(Mat 21:1-11; Mak 11:1-11; Jon 12:12-19)

²⁸ Jiysis kuyip minim kun ak angyi, binuk gok yip Jerusalem amnun angyi, nuk nind giy, ²⁹ am am, Oliyp pir miñmon Betpasiy-Beteniy gol siñak amjakiy, binuk omiñal kuyip angyokiy angak, ³⁰ "Miñmon wikan bindoñ amiy niñningayr; dongiy marip biynimb ma dand tapay bap, tiwningayey mindeningamb. Wisikiy dand winimiyr. ³¹ Pen biynimb gunap apiy angningiy, 'Kanj dongiy chinup ak yenen wisik dand amjipiyr angeningiy' angnimiyr, 'Biyomb ak

wong mindek angyokamb, dining opur angnimiyr' angak."

³² Kun angek, amiy ninrik: angak rek nep mindek. ³³ Am miñ ak wisik girikniñ, bi dongiy nop nimb gok apiy angyak, "Dongiy marip chinup ak yenen miñ wisiksipiy?"

³⁴ Angey angrik, "Biyomb ak wong mindamb angip ak mey, wisiksipur angrik." ³⁵ Kun angiy, dongiy marip kun ak miñ wisikiy, ponind dand Jiysis mindek ak amjakiy, chech kiyk band gunap tungjiwiy, di dongiy ar ak ay, Jiysis nup di ar kun biyon ayer bisgak.

³⁶ Bisgiy, lor ar ak amnakniñ, biynimb gok, chech tap okok dap lor ar kun ak ayakniñ, tawying tawying amnak. ³⁷ Am am, Jerusalem man man gakniñ, Oliyp dum kinjen kuyangipay tip ak, biynimb nuk gok kunaynep, nup miñmiñ yimb giying, tap yerip yerip gak gok gos ak niñiy, suk yomb angying, Gor nup yimb ak dand aranying, ³⁸ angyak:

"Gor kiyñ yomb chinup angyokamb wip biy, chinup kond mindrep giningamb. Chinup direp yimb gip kun ak, yimb nup dand yiy ar biyon aranjun angyak."

³⁹ Kun angyakniñ, bi Peresiy gunap namb kun okok mindeyak gok, Jiysis nup angyak, "Tiysa. Biynimb nak gok kuyip ang gey, kun ma angyan angyak."

⁴⁰ Angeyak, Jiysis angak, "Nimbip aspiyn; kun ak ma angeningambay, Gor kamb gok gek, minim angningambay angak."

Jiysis Jerusalem Niñiy Siy Angak

⁴¹ Jiysis Jerusalem maᅇ maᅇ giyিং, dawin yomb kun ak niᅇiy, siy ñিং tik dam yokyিং aᅇgak, ⁴² “Miñmon Jerusalem. Nimbip simb yimb niᅇsiy. Nimbip di Gor yip jimñining winik ak niᅇbikip rek, tep yimb gipkip! Pen ma niᅇiy, windin koy rek mindpim! Gor nimbip ker apek ma dipim rek, ⁴³ kisen bi gunap ap dawin yomb nimbip biy, ñiluk ay kus kus gi mindiy, ⁴⁴ pisnep gi timey yimb gey, woᅇᅇ wariy, minj, korip, tap gunap ma yimb mindeniᅇgamb aᅇgak.”

*Jiysis Gor Aᅇᅇniᅇep Korip Miᅇgan Ak Amnak
(Mat 21:12-17; Mak 11:15-19; Jon 2:13-22)*

⁴⁵ Kun aᅇᅇiy, nuk Gor aᅇᅇniᅇep korip ak amiy, biy nimb sikyim geyak gok kuyip, aᅇ mis yokyিং aᅇgak, ⁴⁶ “Baybol buk tikiy aᅇᅇyak, ‘Korip yand ak, yip aᅇᅇniᅇep korip ak mindip aᅇᅇyak’ ak pen, nimb sikyim gem gem, biy nimb tap siy diy, ap kapkap kinbay korip bap rek ayip aᅇgak.”

⁴⁷ Pen Jiysis minek minek, ap Gor aᅇᅇniᅇep korip miᅇgan ak, biy nimb gok kuyip minim aᅇᅇniᅇiyiᅇᅇip. Bi Gor nup tap simboᅇᅇep yomb gok, bi low tiysa gok, bi minim tunᅇasikep gok nup pikayun aᅇᅇiy, gos nokom niᅇyak ak pen, ⁴⁸ biy nimb maᅇᅇiysek minim tep nup ak niᅇun aᅇᅇiy, yiñrimey yimb geyak, minim bap aᅇᅇiy nup pikayniᅇᅇiy rek ma ayak.

20

*Nip An Aᅇᅇek Kun Girapan
(Mat 21:23-27; Mak 11:27-33)*

¹ Pen ñin namb kun siᅇak, Jiysis Gor aᅇᅇniᅇep korip miᅇgan ak amiy, nuk biy nimb di Gor yip

jimñiy ayniᅅgamb minim tep ak aᅅᅅñakniᅅ, bi Gor nup tap simbonᅅep yomb gok, bi low tiysa gok, bi minim tunᅅasikep gok apiy,² nup aᅅᅅyak, “An nip aᅅᅅek, ap Gor aᅅᅅniᅅep korip biy, biynimb gok kuyip yuk yokyiᅅᅅ, minim aᅅᅅñiyiᅅᅅ girapan?”

³ Aᅅᅅey aᅅᅅak, “Yand nimbip pen, aᅅᅅniᅅep bap aᅅᅅniᅅniᅅᅅᅅ gispiyn. ⁴ Jon biynimb gok kuyip ñiᅅᅅ pikñak ak, gos nuk key niᅅiy gak akan, Gor aᅅᅅek gak?”

⁵ Aᅅᅅek, kiyk key aᅅᅅniᅅ aᅅᅅniᅅ giy aᅅᅅyak, “ ‘Gor aᅅᅅek Jon biynimb gok kuyip ñiᅅᅅ pikñak aᅅᅅon,’ nuk aᅅᅅniᅅᅅgamb, ‘Kun ak minim nup ak, yenen ma niᅅbim aᅅᅅniᅅᅅgamb.’ ⁶ Pen Jon gos nuk key niᅅiy, biynimb gok kuyip ñiᅅᅅ pikñak aᅅᅅon, biynimb guniy, Gor aᅅᅅek apiy gek niᅅbay rek, chinup kamb jiw pikayniᅅᅅgambay aᅅᅅyak.”

⁷ Kun aᅅᅅiy, Jiysis nup aᅅᅅyak, “Jon ap biynimb gok kuyip minim aᅅᅅñiy, ñiᅅᅅ pikñiy gak ak, chin ma niᅅbun. Gos nuk key niᅅiy gak akan, Gor aᅅᅅek gak aᅅᅅyak.”

⁸ Kun aᅅᅅey, kuyip aᅅᅅak, “Nimb yip pen ma aᅅᅅñimbim rek, yand pen; an aᅅᅅek ap gispiyn ak, nimbip ma aᅅᅅñiniᅅᅅgayn aᅅᅅak.”

*Jiwda Biyomb Gok Bi Gor Wong Giñiyiᅅᅅipay
Gok Timey Giyak Rek, Ñinuk Nup Kunep
Giniᅅᅅgambay Aᅅᅅiy Paydoᅅ Ay Aᅅᅅak
(Mat 21:33-46; Mak 12:1-12)*

⁹ Pen Jiysis kuyip paydoᅅ ay aᅅᅅak, “Bi bap wayn wong ak gi yimiy, biynimb wong nup giniᅅᅅgambay gunap kuyip aᅅᅅay, nuk am miñmon paryomb okok mindeniᅅᅅgamb. ¹⁰ Pen wayn

manġiy pik giniġgamb ñin ak, binuk bap aġġyokiy aġġniġgamb, ‘Am aġġey, wayn manġiy yip ġunap ñey, dand winimin aġġniġgamb.’ Aġġek amjakek, biynimb wayn woġġ gi mindeniġgambay gok, nup pik pik ay, yikop aġġyokey andkind winiġgamb. ¹¹ Kun gey, bi wayn woġġ nop nimb ak, bi bap pen aġġyokek amniġgamb. Pen nup kunep pik pik ay, yikop aġġyokey andkind winiġgamb. ¹² Kun gey, bi kisenimb bap aġġyokek amjakek, nup tapin yimb pikiy, lipiġġ dam mis akyaġ yokniġgambay.

¹³ “Kun ġeniġgambay, bi woġġday nop nimb ak, Ñi mapin yand ak yoken, minim aġġeniġgamb niġniġgambay aġġiy, yokniġgamb. ¹⁴ Yokek amjakek, biynimb wayn woġġ gi mindeniġgambay kun gok aġġniġgambay, ‘Ñi wip biy, nop wayn woġġ ak, nuk dinimuġ rek ayip. Nup pisnep pikay, chin dun aġġniġgambay.’ ¹⁵ Kun aġġiy, nup lipiġġ dand mis okok amiy, pisnep pikayey kumniġgamb. Pen kun ġeniġgambay, bi woġġday nop nimb ak kuyip yerginiġgamb? ¹⁶ Nuk apiy, biynimb kun gok kuyip pikay, woġġday kun ak biynimb ġunap kuyip pen aġġek, kond mindeniġgambay aġġak.”

Jiysis kun aġġek, biynimb niġmindeyak gok aġġyak, “Mer! Chinup Jiwda biynimb kun ma ġinimuġ. Biynimb kisenimb gok aġġek, ma kond mindeniġgiy aġġyak.”

¹⁷ Aġġeyak, kuyip niġkuskus ġiy aġġak, “Baybol buk ak, minim kun ak rek tikiy aġġyak: ‘Bi korip ġep gok, kamb bap tep ma ġek kirġiyak ak pen, miñiy korip sap namb yomb biyaġ

ak pinjiyñiy mindip angyi' tikyak.

¹⁸ “Biynimb kamb ar kun ak apyap pikningambay gok, tapin nep pikningamb. Pen kamb kun ak punjjiw apyapiy, biynimb aybirikningamb gok, pisnep piksimbjakningamb angyak.”

¹⁹ Jiysis kun angek, “Chinup nep asap angyi,” bi low tiysa gok sek, bi Gor nup tap simbongep yomb gok sek nup kor gun angyi ninyak ak pen; biynimb kunaynep niñmindeyak niñiy, pirikiy kirgiyak.

Rom Biyomb Siysa Nup Takes Pikjun Akan Mer Angyak

(Mat 22:15-22; Mak 12:13-17)

²⁰ Pen minim angak gok niñiy, nup yergiy dand kor amjun angyi, am biynimb gunap kuyip mimunğ giy angyak, “Nimb biynimb tep rek silok ay, am tom giy, nup minim gunap angem, pen yerip anğonimun niñiy, nup dand gapman kor yomb ak amningambun angyak.” ²¹ Kun angey, nup am anğniñiy angyak, “Tiysa. Chin niñbun; yip yerip gos niñningambay angyi minim key gunap ma apan; biynimb gok kuyip Gor minim anğñining akan, yerip anğning, yipund giy nep apan. ²² Kun ak yerginjun. Rom gapman biyomb Siysa nup, takes pikjun akan, mer?”

²³ Kiyk yesek tom giyak kun ak, Jiysis key niñiy, kuyip angak, ²⁴ “Maniy takes pikpay kun ak bap yip diñem niñiyn angak.” Angek, diñey niñiy angak, “Maniy bak ak, kawnan an ker mindiy, yimb tikyak kun ak, an yimb ak mindiy gip?”

Angek angyak, “Siysa kawnan ak mindiy, yimb nuk ak mindiy gip angyak.”

²⁵ Angey, kuyip angak, “Kun ak Siysa yip ginimimb anjip gok, nup ginimimb; Gor yip ginimimb angyi ninimb gok, nup ginimimb angak.”

²⁶ Pen minim angak kun ak, kiyk niney, miker nup bap, dinimuᅇ rek ma ayek, wal angyak. Bi gos tipangiy niniy anjip angyi, pen minim gunap ma angyi, minim gomb pisnep kurgak.

*Biynimb Kumiy Tip Tikjakpay Akan Angyak
(Mat 22:23-33; Mak 12:18-27)*

²⁷ Biynimb gunap, biynimb kumiy ma tikjakpay angyi, gos ak ninyingipay. Biynimb kun gok kuyip, “Sanjiwsiy biynimb” angyingipay. ²⁸ Kiyk gos kun ak ninyingipay rek, ap Jiysis nup nemb-nemb giyᅇᅇ angyak, “Tiysa. Bi Gor minim anᅇep Mosis; minim bap chinup tikiy angak:

‘Bi bap biyn diy, ᅇapan tikiy mer yikop kumeningamb, numam nuk bap pen, biyn kun ak diy, ᅇapan nup ak angyi tikningamb angak.’

²⁹ Kun ak, bi kiᅇiᅇ sek onep ar ak mindeningambay; numam nind ak biyn diy, ᅇapan tikiy mer; yikop kumningamb. ³⁰ Kumek, numam namb pen, biyn kun ak diy, kunep ᅇapan tikiy mer; yikop kumningamb. Kun gek, numam namb ak pen diningamb. ³¹ Ak kunep ᅇapan tikiy mer; yikop kumningamb. Kun gi dam dam, numam onep ar ak maᅇgiysek ᅇapan tikiy mer; yikop kumningambay. ³² Kisen biyn kun ak kunep kumningamb. ³³ Pen kumiy tikjakningambay apan ak, biyn nokom binuk di onep ar ak ayingamb kun ak, kisen an ker mindeningamb angyak.”

³⁴ Angey, Jiysis kuyip angak, “Miñiy mindpun ñin biy, biyn gok bi dipay; bi gok biyn dipay. ³⁵ Pen Gor biynimb nuk gok kumiy tikjakiy, biyn gok bi ma dingingambay; bi gok biyn ma dingingambay. ³⁶ Pen tip ak ma kumningambay; Gor ñi pañ nuk gok mindiy, enjol nuk gok per mindpay rek mindeningambay. ³⁷ Biynimb kumiy tikjakpay minim ak, Mosis kunep angiy tikak ak niñbun. Gor mon bind mañlañ gek namb ak mindiy, basind nind kumyak gok yimb angiy, Mosis nup angak, ‘Yand Gor yesek bap mer; Ebrahim, Aysek, Jekop Gor kiyk yand mindpiyn angak.’ ³⁸ Biynimb nind kumyak gok, ‘Gor kiyk mindpiyn’ angak rek chin niñbun; biynimb kim mindpay akan, kumbay gok Gor niñimb, mañgiysek kim mindpay.” ³⁹ Jiysis kun angek, bi low tiysa gunap angyak, “Tiysa. Minim yipund giy nep aspan angyak.” ⁴⁰ Minim ang tep gak kun ak pirikiy, kisen minim gunap nup ma angninyak.

Yip Yenen Kiyñ Yomb Key Yimb Ak Ma Apay Angak

(Mat 22:41-46; Mak 12:35-37)

⁴¹ Pen Jiysis kuyip angak, “Biynimb gok, Kiyñ yomb key yimb ak nup, Depiyt Biyomb nuk angninyak ak pen; yenen nup Depiyt tik dand amiy apiy gek, tikpay ñi ak nep apay. ⁴² Depiyt nuk key, Kiyñ yomb key yimb ak nup minim angiy, Baybol buk day ‘Sam’ apay ak tikiy angak: ‘Biyomb Gor, Biyomb yip ak nup angip, “Nand ñin yipund kind yip okok mindiy, ⁴³ mind dand amiy, biynimb nip alemb alemb ñimbay

gok kuyip, tomb beŋ nand okok ayen, taw-birikningamban anġip” anġiy’ tikak.

44 Pen Depiyt Kiyŋ yomb key yimb ak nup, Biyomb yand anġak kun ak, yenen nup Depiyt ñinuk ak nep apay anġak.”

*Bi Low Tiysa Gok Mind Tep Ma Gipay Anġak
(Mat 23:1-36; Mak 12:38-40; Luk 11:37-54)*

45 Pen biynimb gok niŋmindyakniŋ, Jiysis binuk gok kuyip anġak, 46 “Nimb bi low tiysa gok gipay rek ginimimb rek ayip ak, niŋrep yimb ginimimb. Kiyk gipay ar ak, okok tanġon yimb chinup anep anġyan anġiy, chech paryomb gok yimiy, nan-gep korip ak amiy, biyomb bispay ar ak bisgiy, tap yomb ñimbay ñin ak, am biyomb bisginingiy tip ak dipay. 47 Pen biyn yandiw gok korip tap kuyip okok, chinup nimb tikan anġiy lip lip giyiŋ, Gor nup anġniŋsipun anġiy, minim paryomb yesek yesek ar gok apay. Kun gipay ak, kisen yiwur yomb key yimb ak, diniŋgambay anġak.”

21

*Biyn Kaŋil Ak Opriyŋ Ñak
(Mak 12:41-44)*

1 Jiysis Gor anġniŋep korip miŋgan ak, am mindiy niŋak: biynimb maniy sek gok, maniy gunap dap kes opriyŋ ayiŋgipay miŋgan ak yokeyak. 2 Pen biyn yandiw simbgeprek bap, maniy likaŋsek sikoy omiŋal ak dap yokak. 3 Yokek, Jiysis niŋiy anġak, “Nimbip niŋind aspiyn. Biynimb gunap maniy siskoy yokpay; biyn yandiw simbgeprek biy, maniy nuk yomb yimb ak yokip.

⁴ Pen biynimb gunap, maniy kiyk kuñaynep mindakniñ opriyñ ñimbay; biyn yandiw simbgeprek biy, maniy nuk mindip rek mañgiysek yokip. Tap taw ñiñnimuñ bap ma mindip angak.”

Gor Nup Anğniñep Korip Ak Timey Giniñgambay Angak
(*Mat 24:1-2; Mak 13:1-2*)

⁵ Pen binuk gunap anğyak, “Gor anğniñep korip biy, kamb tep tep tap okok dand apiy giyak ak, tep yimb mindip anğyak.” Kun anğey, Jiysis kuyip angak, ⁶ “Kun apim ak pen, kisen tap tep niñsipim kun gok ma mindeniñgamb. Amiybi miñmon okok nimb gok apiy, mañgiysek tunğwaniñg diyokek, kamb bap, kamb bap ar ak ma mindeniñgamb angak.”

Kisen Miker Giniñgamb
(*Mat 24:3-14; Mak 13:3-13*)

⁷ Anğek, nup anğniñiy anğyak, “Tiysa. Tap kun ak ñin akay rek kun giniñgamb. Pen tap yerip rek ak gek niñiy, miñiy giniñg gisap anğniñgambun anğyak.”

⁸ Anğey, Jiysis kuyip angak, “Niñrep ginimimb! Biynimb kuñaynep ap tom giy, yimb yip ak diy anğniñgambay, ‘Yand nep aswiyn. Ñin yomb ak wip anğniñgambay.’ Kun anğey, niñind apay anğiy ma niñnimimb.

⁹ “Pen miñmon wikan gunap tikjakiy, miñmon wikan gunap yip penpen giniñgambay; miñmon wikan gunap kiyk keynep penpen gey niñiy, ñin kisen apay ak winiñg gakiñ gispay anğiy,

ma piriknimimb. Ñin kun ak kisen winiᅅgamb aᅅgak.”

¹⁰ Kun aᅅgiy, kuyip aᅅgak, “Miñmon gunap, miñmon gunap yip penpen giniᅅgambay. Biyomb gunap layn nuk gok tikjakiy, biyomb gunap layn nuk gok yip penpen giniᅅgambay. ¹¹ Miñmon okok kuᅅaynep monmon yomb diy, yiwan yomb giy, miñak yomb giy giniᅅgamb. Tap semb ar biyoᅅ gok key kindik nimb ayek, pirikep rek aᅅniᅅgamb.

¹² “Pen tap kun gok kisen kun giniᅅgamb; nind yip ker mindpim rek, nimbip timey giniᅅgambay. Nimbip kor giniᅅ, dand Jiwda nan-gep korip ak amiy, kor giy, kalambis ay, dand gapman biyomb kor ak amniᅅgambay. ¹³ Nimbip giniᅅgambay kun ak, minim tep yip ak misen aᅅᅅniᅅmimb rek aᅅniᅅgamb. ¹⁴ Pen minim yerip rek aᅅᅅjun aᅅgiy, nind ma piyow niᅅnimimb. ¹⁵ Yand key nimbip gos tep ñen, aᅅᅅimbikniᅅ, kiyk niᅅey diyokep rek ma aᅅniᅅgamb.

¹⁶ “Pen nap, nanim, namam, buᅅgiy nimb, biynimb nimb key gok mimuᅅᅅ giy; nimbip gunap pisnep pikayniᅅgambay. ¹⁷ Yip dipim rek, biynimb maᅅgiysek nimbip miluk niᅅniᅅgambay. ¹⁸ Pen jun kas nimbip bap ma kurginiᅅgamb. ¹⁹ Yip chiᅅgiy nep mindiy mey; perper mindeniᅅgambim.

Dawin Yomb Jerusalem Biy Gi Timey Giniᅅgambay Aᅅgak

(Mat 24:15-21; Mak 13:14-19)

²⁰ “Pen amiybi gok ap, Jerusalem kus kus giyakniᅅ; maᅅ mindip Jerusalem timey

giningambay angyi, ²¹ biynimb Jiwdiya mindeningiy gok, pirik miñmon yirik okok amningiy. Biynimb Jerusalem mindeningiy gok, pirik mis amningiy. Pen biynimb mis okok mindeningiy gok, dawin yomb miñgan biyan ma amningiy. ²² Yenen: Gor nup kirpay rek, ñin kun ak, Baybol buk tikiy angyak angyak rek nep giningamb. ²³ Pen biyn ñapan koñgiy mindeningambay gok sek, biyn ñapan tiy ñeningambay gok sek kuyip, miker yomb giningamb. Gor Yisrel biynimb gok kuyip, miker yomb ñinim angyi, miñmon biy gi timey yimb giningamb. ²⁴ Biynimb gunap kuyip, baynat diy piñiy ayingambay; biynimb gunap kuyip miñ ay, dand miñmon gunap amningambay. Pen biynimb Jiwda mer gok, dawin yomb Jerusalem timey gi mindey mindey, Gor kuyip ñin angyak ak pandikek nep, kirginingambay.

*Bi Bap Ñinuk Melik Sek Winingamb
(Mat 24:29-31; Mak 13:24-27)*

²⁵ “Pen pumb ak key yimb ay, takin ak key yimb ay, gap gok key yimb ay giningamb. Ñing siy pañg apiy giw yomb angek, biynimb miñmon kind kind mañgiysek gospar aying, gos kunaynep niñningambay. ²⁶ Tap semb ar biyon mindip gok, okok nimb okok nimb gek, miñmon biy yergining gisap angyi, jel pirikiy, gos tikek apek, kumemb rek ayingamb. ²⁷ Nind kun geningamb, kisen Bi bap Ñinuk semb biyon nimb Nop kilis ak diy, melik tep nuk ak sek winingamb. ²⁸ Tap aspiyn biy kisen gakniñ, Biyomb chinup tungasik

diningamb ak, maŋ mindip winingamb aŋgiy, niŋmindenimimb aŋgak.”

Mon Kiyaw

(Mat 24:32-35; Mak 13:28-31)

²⁹ Jiysis kun aŋgiy, minim bap tikdam ay aŋgak, “Mon kiyaw ak sek, mon yikop gunap sek silup ayek niŋiy, ³⁰ miñiy pumb ayniŋ gisap aŋgiy niŋbim. ³¹ Kun ak rek, tap apiyn gok gakniŋ aŋgniŋgambim, ‘Gor biynimb diy kond mindeniŋgamb ñin ak, maŋ asaw aŋgniŋgambim.’ ³² Biynimb mindeniŋgambay ñin kun ak, ma kumniŋgambay; kim mindyakniŋ, tap aspiyn gok maŋgiysek gek niŋniŋgambay. Niŋind yimb apiyn. ³³ Semb ar biyoŋ sek, mankumb biy sek kurginiŋgamb; pen minim yand ak ma kurginiŋgamb.

Jiysis Aŋgak “Niŋrep Giy Mindenimimb Aŋgak”

³⁴ “Pen niŋrep ginimimb. Ñiŋ kilis tap gok kuŋay ñimbiy, sikyim, simiy yiŋg chendbil, tap man ar biy nep gos niŋmindeniŋgambim; ñin kun ak apiy, nimbip yakir tap gok gon ayey dip rek ak diniŋgamb. ³⁵ Akniy nep ma giniŋgamb; biynimb miñmon kiñiŋ waŋgin omiŋal ak mindipay rek maŋgiysek giniŋgamb. ³⁶ Kun ak niŋrep ginimimb. Gor nup aŋgniŋyiŋg nep mindem mey; tap kun gok gakniŋ, nimbip kond mindek, kim amiy, am Bi bap Ñinuk windin yirik ar ak mindeniŋgambim aŋgak.”

³⁷⁻³⁸ Jiysis ñin kaw kun ak, am Gor aŋgniŋep korip miŋgan ak mindiy, biynimb gok kuyip minim aŋgñiyiŋgip. Kiyk minim nup niŋun aŋgiy,

maynamb yimb tikjakiy, Gor aᅇgniᅇp korip ak amyinᅇipay. Pen kisyim wakniᅇ, Jiysis nuk am miᅇmon Oliyp dum kinyinᅇip.

22

*Jiwdas Jiysis Nup ᅇanᅇyanᅇ Anᅇiy Mimunᅇ Gak
(Mat 26:1-5; Mak 14:1-2, 10-11; Jon 11:45-53)*

¹ Jiwda ᅇin yomb biret yiys sek ma ᅇimbay ᅇin ak, maᅇ maᅇ wak. ᅇin yomb kun ak, enjol bap, Yijip biynimb kuyip pikayinᅇ, Yisrel biynimb kuyip niᅇiy kirgak ak mey, “Pasopa” apay.

² Pasopa ᅇin yomb kun ak maᅇ gakniᅇ, Gor nup simbonᅇep biyomb gok sek, bi low tiysa gok sek Jiysis nup ᅇanᅇun anᅇyak ak pen, biynimb gok kuyip pirikiy, yergiy ᅇanᅇjun anᅇiy, anᅇniᅇmindeyak.

³ Anᅇniᅇ mindyakniᅇ, Seytan, Jiysis binuk Jiwdas, Yiskariyot nup molik sikak. ⁴ Sikek, nuk am Gor nup simbonᅇep biyomb gok sek, Gor anᅇniᅇp korip kond mindyinᅇipay poliys biyomb gok sek mindeyak ak amiy anᅇgak, “Jiysis nup kayn gi dand amen, nup pikayniᅇgambim anᅇiy minim ak kuyip anᅇᅇak. ⁵ Anᅇᅇek, kuyip tep gakniᅇ, nup anᅇyak, “Nip maniy ᅇiniᅇgambun anᅇyak.” ⁶ Anᅇeyak mey; nuk Jiysis biynimb gok yip ma mindonimunᅇ won ak, nup kayn gi dand amiy, biyomb gok kuyip ᅇinim anᅇiy, kond mindek.

*Pasopa Tap Ak ᅇinᅇniᅇg Gayrep Giyak
(Mat 26:17-25; Mak 14:12-21; Jon 13:21-30)*

⁷ Pen biret yiys sek ma ᅇimbay ᅇin kun ak apek, siypsiyp ᅇiluk pik Gor nup simbonᅇ ᅇinᅇjun anᅇiy,

⁸ Jiysis nuk Piyta yip, Jon yip kuyip angyokiy angak, “Nirminjay am Pasopa tap ñiñningambun gok gayrep genimiyr angak.”

⁹ Angek angrik, “Akay kun ginjur?”

¹⁰ Anger angak, “Nirminjay dawin yomb ak amiy niñningayr; bi bap ñiñg mal dand apeningamb. Nup namb pikiy, amnimuñ miñgan okok amiy, ¹¹ bi korip nop nimb kun ak nup angnimiyr, ‘Tiysa nip anqip, Korip miñgan akay, bi yand gok yip, Pasopa tap ñiñningambun anqip angnimiyr.’ ¹² Anger, niripminjay dam korip miñgan yomb cheya tap gok sek mindeningamb ar biyoñ ak angek, Pasopa tap ñiñningambun gok, miñgan kun ak gayrep genimiyr angak.”

¹³ Angek amiy niñrik: angak angak rek nep mindek, Pasopa tap ñiñning giyak gok gayrep gerik.

Jiysis Binuk Gok Kuyip Biret Wayn Ñak

(Mat 26:26-30; Mak 14:22-26; 1 Kor 11:23-25)

¹⁴ Pen dungek wakniñ, tap ñiñning, bi minim nup dand amemb gok yip ap bising kus kus giy, ¹⁵ kuyip angak, “Per gosimb yip wip ak, nimb yip Pasopa tap ñiñning gispun biy ñimbip mey, kisen yiwur yomb diniñgayn. ¹⁶ Yenen: nimbip aspiyn, kisen tip ak ma ñiñningayn; yikop nep minden minden, siypsiyp ñiluk per ñimbun junj ak misen gek, Gor biynimb nuk diy kond mindeningamb ñin ak nep, tap yomb ak ñiñningambun angak.”

¹⁷ Jiysis kun anqiy, ñiñg wayn kap ak diy, Gor nup tep anqiy, binuk gok kuyip ñiying angak, “Ñiñg ñispiyn biy diy ñiñnimimb. ¹⁸ Pen nimbip aspiyn: miñiy ñin biy tikiy, ñiñg wayn ak ma

ñimben, Gor biynimb nuk gok kuyip diy kond mindeningamb ñin ak winingamb angak.”

¹⁹ Kun angiy, biret ak kunep diy, Gor nup tep angiy, tipang kuyip ñiyiing angak, “Mumbwak yip yiwur yomb giningamb rek, nimbip aspiyn. Ar kun ak biret biy diy, gos yip niñyiing ñinimimb angak.”

²⁰ Pen tap ñimbdiy, wayn ñiing ak diy, kap miingan ak songiy, kuyip ñiyiing angak, “Likañ yip yapek kumen nep, Gor nimbip biynimb yand angiy, diniingayn angak minim ar ak wos aningamb ak mey; nimbip ñiing wayn biy ñispiyn.

²¹ “Pen niñim! Bi yip kayn gi dand amningamb ak yip bising mindpun. ²² Bi bap Ñinuk, Gor angak kinjen ar ak kindik giy kumningamb ak pen; bi nup kayn gi dand amningamb anup, simb niñsipiyn angak.”

²³ Jiysis kun angek, binuk gok kiykaw nep “An rek kun giningamb angiy,” pen angek pen angek gi mindeyak.

Binuk Gok Yand Biyomb Minden Angiy Penpen Angyak

²⁴ Jiysis binuk gok “Nimb mer! Yand biyomb minden angiy,” kiykaw nep, key penpen ang mindeyak. ²⁵ Jiysis kuyip angak, “Gapman biyomb Gor ker ma mindpay gok, biynimb gok kilis giy kond mindyiing apay, ‘Kuyip direp yimb gipun apay.’ ²⁶ Pen nimb kun ak rek ma ginimimb. Biyomb nimb gok, ñi paranj rek mindeningiy; biyomb sikerek gok, bi woñg giñemb rek mindeningiy. ²⁷ Mankumb biy gipay miñ ar ak, biyomb am bisgey, bi woñg giñimbay gok, keñmangiy

tap kuyip gok marik gipay. Pen yand nimbip yikop, bi wonj giñimbay rek ak gipiyn. Nimb kun ak rek ginimimb.

²⁸ “Yip miker yimb gip ñin biy ma kirpim; kond nep mindpim. ²⁹ Kun gipim ak Gor yip anjip, ‘Biyimb gok kuyip diy kond mindeningamban,’ anjip rek, yand pen nimbip aspiyn ak mey; ³⁰ ñin kun ak tomb anjin yip ak mindiy, Jiwda kiñin yomb keykey onep wimingan ak kuyip, kond mindeningambim angak.”

Jiysis Piyta Nup Bi Kun Ak Ma Ninbiyn Anjningamban Angak

(Mat 26:31-35; Mak 14:27-31; Jon 13:36-38)

³¹ Jiysis Piyta nup angak, “Saymon, Saymon. Niñan! Gor Seytan nup ‘Yaw’ angek, nimbip wiyt manjiy songey songey, manjiy yimb ak key ay, day day ak key ay gipay rek ak giningamb. ³² Pen Gor nup anjningbiyn rek, yip pisnep ma kirningamban. Pen tap siy tap timey giningamban ak, ‘Yenen kun gipiyn anjiy,’ tip ak andkind yip ker winingamban. Apiy, namiy namam gunap kuyip anj tep gey, mind tep giningiy angak.”

³³ Jiysis kun angek, Piyta angak, “Biyomb. Nip ma kirginingayn. Ominjal giy nep giranor, nip kalambis ay, yip kunep ayningiy. Pen nip pikay, yip kunep pikayningiy angak.”

³⁴ Angek, Jiysis angak, “Piyta. Nip aspiyn: miñiy kisyimken biyan kakaruk ma suk anjningamb won ak, Jiysis nup ma ninbiyn anjiy, yinj ominjal nokom anjningamban angak.”

Anpawis, Wand, Baynat

³⁵ Kun angyiy, kuyip angak, “Nind nimbip angyokiy angnik, ‘Anpawis, wand, tomb tirup gok dand ma amnimimb: yikop amnimimb angnik.’ Angen ambik ñin kun ak, nimbip tap gunap mindek akan, tikdak?”

Angek angyak, “Mer! Tap chinup gunap ma tikdak. Mindek angyak.”

³⁶ Angeyak, Jiysis angak, “Pen miñiy nimb anpawis, wand, tap gok mindonimuñ, dand sesek amnimimb. Bi an ñayip baynat ma mindonimuñ ak, kolsiyor nuk ak bi gunap kuyip yokiy maniy diy, baynat ak tawnimuñ. ³⁷ Pen niñim! Yip nind, Baybol buk ak tikiy angyak, ‘Nup bi timey monmon gip bap angningambay angyak.’ Minim angyiy tikayak kun ak, miñiy gining gisap angak.”

³⁸ Kun angek, angyak, “Biyomb. Baynat chin ominjal mindip angyak.”

Angey, “Mey ak angak.”

Jiysis Nup Ñangayning Geyak Niñiy, Nop Nup Angniñak

(Mat 26:36-46; Mak 14:32-42)

³⁹ Kun angyiy, mis amiy, Gor nup angninñing, per miñmon Oliyp dum amyinñipay ak amnakniñ, binuk gok kisen giyak. ⁴⁰ Dum kun ak amjakiy kuyip angak, “Gos timey apek timey ginimimb rek ayip ak, lotiw giyning mindenimimb angak.”

⁴¹ Kun angyiy, kuyip kirgiy, nuk keykey sinbindon amiy, kongim yimiy, Nop nup angninñiy angak, ⁴² “Bapiy. Gos yand niñbiyn ak, ñing silik kap yip ñining gispan ak ma ñinimin. Pen yand niñbiyn ar ak ma ginimin; gos nand key niñban ar ak nep ginimin angak.” ⁴³⁻⁴⁴ Kun angyiy, nup

miker yimb gek, Nop nup angnin mindaknin, wisimb ak likañ rek pungrik yowak. Kun gakin, enjol bap semb biyon nimb apiy, nup kilis ñak.

⁴⁵ Nop nup angninjiwi, amiy ninak: binuk gok miker gakin wisin kineyak. ⁴⁶ Ninij, kuyip angak, “Yenen wisin kinjipim? Gos timey apek, timey ginimimb rek ayip ak, tikjakiy, Bapiy nup angninying mindenimimb angak.”

Jiysis Nup Chichiy Diyak

(Mat 26:47-56; Mak 14:43-50; Jon 18:3-12)

⁴⁷ Jiysis minim kun ak anj mindaknin, binuk Jiwdas bi tiwin yomb bap ponind apchakiy, Jiysis nup kaykol giyn angek, ⁴⁸ Jiysis angak, “Jiwdas. Mey bi biy ñangim angy, yip kaykol gining gispan?”

⁴⁹ Kun angaknin, binuk gok gining geyak kun ak ninij angyak, “Biyomb. Kuyip baynat diy pinijun akan?” ⁵⁰ Kun angying, binuk bap baynat ak diy, bi Gor nup simbongep yomb yimb wonj giñemb anup, timund yipund kind ak, pisnep timbrik yokak.

⁵¹ Kun gek, Jiysis ninij angak, “Kun ma ginimimb! Mey tep angak.” Kun angy, timund ak tip gek yimñak.

⁵² Pen biyomb Gor nup simbongep gok, Gor angninep korip poliys gok, bi minim tungasikep gok nup ap, dining gey, kuyip angak, “Nimb baynat diy, kur diy dand opim ak: yip bi penpen ñangep bap rek ayek ninij, chichiy dining opim?” ⁵³ Nimb yip minek minek, Gor angninep korip ak minden, yip ma dipik! Pen miñiy Seytan, bi

kisyim kind okok ken mindip ak, ñin nuk ak mey; kun gispim angak.”

Piyta Jiysis Nup Ma Niñbiyn Angak
(*Mat 26:57-58, 69-75; Mak 14:53-54, 66-72; Jon 18:12-18, 25-27*)

⁵⁴ Nuk kun angakniñ, nup chichiy diy, dand bi Gor nup simbonjep yomb yimb korip ak amniyak.

Piyta pen kikisen amiy, ⁵⁵ mon dangiy mindeyak korip namb ak amiy, biynimb gunap yip jimñiy bising mindek. ⁵⁶ Bising mindakniñ, pañ korip kun ak wong giyinjip bap, nup niñdand aran apyan giyinj angak, “Bi biy kunep, Jiysis yip mindek angak.”

⁵⁷ Angek, Piyta angak, “Pañ. Bi kun ak yand ma niñbiyn angak!”

⁵⁸ Pen yep sikoy won bap mindiy, bi bap pen, ap nup niñiy angak, “Nand kunep Jiysis binuk bap angak.”

Angek Piyta, “Yand mer angak.”

⁵⁹ Pen kisen tapin won bap mindiy, bi bap pen apiy, kilis giy angak, “Bi biy Jiysis yip mindamb. Nuk kunep miñmon Galiyliy nimb angak.”

⁶⁰ Angek, Piyta angak, “Minim aspan ak yand ma niñbiyn angak.” Kun ang mindakniñ, day kakaruk angak. ⁶¹ Angek, Jiysis andikiy Piyta nup niñyinsek ayek, Piyta pen, Jiysis kun kun giningamban angak minim ak niñiy, ⁶² kuñam kinjik gek, mis amiy siy angak.

Jiysis Nup Angjiwiyng Pikiyng Giyak
(*Mat 26:67-68; Mak 14:65*)

63-64 Bi Jiysis nup di mindeyak gok, chech band ak di windin nup ak pik yiwgiy, nup anjjiwying, pikying angyak, “Nand bi key ninban ak, nip an piksap ak chinup angnan angyak.”⁶⁵ Pen minim timey kun ak rek, nup tapin kunaynep angyak.

*Nand Kiyŋ Yomb Key Yimb Ak Akan Angyak
(Mat 26:59-66; Mak 14:55-64; Jon 18:19-24)*

⁶⁶ Miñmon yowakniŋ, miytiyŋ gun angyi, Jiwda bi minim tungasikep gok, biyomb Gor nup simbongep gok, bi low tiysa gok ap nan-giy, Jiysis nup dand Jiwda kanjsol miytiyŋ kun ak amiy angyak,
⁶⁷ “Nand Jiwda Kiyŋ yomb key yimb per kond mindpun ak akan angyak.”

Angey, kuyip angak, “Yaw angen, ninind angyip angyi, ma ninningambim.”⁶⁸ Pen angninep yand mindip gok nimbip angninen, yip pen ma angningambim.⁶⁹ Pen miñiy, Bi bap Ñinuk am, Nop Biyomb tap yerip giyn angyi giningamb ak nup, ñin yipund kind ak mindeningamb angak.”

⁷⁰ Kun angek, bi kanjsol kun gok mangyisek nup angyak, “Nak key Gor Ñinuk?”

Angey angak, “Mey nimb key apim ak angak.”

⁷¹ Angek angyak, “Yenen, kor nup ak tapin angmindenjun? Nuk key tom giy, Gor Ñinuk mindpiyn angek ninbun angyak.”

23

*Biyomb Paylat Jiysis Kor Nup Ak Ninak
(Mat 27:1-2, 11-14; Mak 15:1-5; Jon 18:28-38)*

¹ Kun angyi, mangyisek tikjakiy, Jiysis nup dand gapman biyomb Paylat mindek ak amniyak.

² Dand amiy, nup kor gining, minim okok nimb okok nimb dand apiy angyak, “Chin piyow ninjy ninbun; bi biy biynimb chinup gok angip, ‘Biyomb yimb Siysa nup takes ma pikiy, gapman kay minim ak kunep ma ninnimimb angip.’ Pen minim bap angip, ‘Yand Krays, bi kiyn bap angip’ angyak.”

³ Angeyak, Paylat Jiysis nup angniny angak, “Nand Jiwda kay kiyn kiyk ak mindpan akan?”

“Angek angak, “Mey apan ak, angak.”

⁴ Angek, Paylat pen, bi Gor nup simbonjep yomb gok sek, biynimb yikop ap mindyak gok sek kuyip angak, “Yand ninbiyn; bi biy nup kor gep junj bap ma mindip angak.”

⁵ Kun angak ak pen, kiyk menj mingan dand araniy angyak, “Nuk gapman minim ma ninnimimb angiy, biynimb miñmon Jiwdiya okok mangyisek angñimb. Miñmon Galiyliy tikiy, angñi dap dap, miñiy Jerusalem biy wip angyak.”

Jiysis Nup Dand Herot Mindek Amniyak

⁶ Angeyak, Paylat kuyip angniny angak, “Bi kun biy Galiyliy nimb?” ⁷ Angek, yaw angey, biyomb Herot Galiyliy propens kond mindip ak, ap Jerusalem biy mindip rek, nup ker yoken kor biy ninnimun angiy, kuyip angek, dand mindek ak amniyak.

⁸ Herot, Jiysis tap giyingip ak per minim anep ninjy, minek akay rek, tap mageprek bap gek ninningayn angiy, gos ak ninmindyingip ak mey, ñin kun ak Jiysis nup dand apchakey ninjy, nuk miñmiñ yimb gak.

⁹ Pen Herot Jiysis nup minim kuñaynep yinggin wingin gek, Jiysis pen minim bap ma angak.

¹⁰ Pen bi Gor nup tap simbonjep yomb gok sek, bi low tiysa gok sek kilis giy, minim kuñaynep angyak. ¹¹ Herot, amiybi nuk gok yip, Jiysis nup gi timey giying, ñiñlon aying, gapman biyomb aypay chech tep bap yimñiy, tip ak Paylat mindek ak dand amniyak.

¹² Nind Herot yip, Paylat yip penpen angmindyngipiy ak pen; ñin kun ak minim anj jimñirik.

Paylat Jiysis Nup Ñanñimimb Angak
(*Mat 27:15-26; Mak 15:6-15; Jon 18:39-19:16*)

¹³ Pen Paylat, biyomb Gor nup tap simbonjep gok sek, bi minim tungasikep gok sek, biynimb yikop gok sek angek, ap nan-gey angak, ¹⁴ “Yip apim, ‘Bi biy, biynimb gok kuyip kun kun anjip apim’ ak pen, miñiy windin yirik ar nimbip biy kor gipiyn ak, minim kor ginimbik junj bap mindek, ma niñbiyn. ¹⁵ Herot kunep minim junj bap ma piyow niñiy mey; chinup ker tip ak angyokamb dand opay. Bi kun biy, tap timey bap gek rek, minim nimbip ak diy nup ñanñim. ¹⁶ Kun ak yikop pikiy, angyoken amnanj angak.”

[¹⁷ Jiwda ñin yomb kiyk “Pasopa” angyingipay ak apek, Paylat per kalambis bi kiyk bap yikop angyokyingip ak mey;] ¹⁸ ñin kun ak, kiyk mangyisek menj miñgan dand araniy angyak, “Bi kun ak ñanñay, Barabas nup angyokem chinup ker owanj angyak!” ¹⁹ Bi Barabas kun ak, dawin yomb namb ak, biynimb gunap diy penpen giy,

bi bap pisnep pikayak rek nup kor giy kalambis ayak.

²⁰ Pen Paylat tip ak, menḡ minḡan dand araniy kuyip anḡak, “Jiysis nup yikop anḡyoken amnan anḡak.”

²¹ Anḡek, kiyk menḡ minḡan dand araniy anḡyak, “Nup mon kiros bak biyon ñanḡbirik ayim anḡyak!” “Nup mon kiros bak biyon ñanḡbirik ayim anḡyak.”

²² Anḡeyak, Paylat tip ak kuyip anḡak, “Yenen? Bi kun biy, tap yerip timey giy? Nup ninen tap timey bap ma giy ak, ñanḡjun rek ma ayip. Kun ak nup yikop pikiy, anḡyoken amnan anḡak.”

²³ Anḡek, kiyk kilis yimb giyiḡ, Jiysis nup ñanḡbirik aynimimb anḡiy, anḡ gey gey, ²⁴ Paylat minim kuyip ak diy, ²⁵ bi timey biynimb kuḡay diy, penpen giy, bi bap nup pikayak anup kirgek amnakniḡ anḡak, “Jiysis nup ñanḡ aynimimb anḡak.”

*Jiysis Nup Mon Bak Biyon Ñanḡbirik Ayak
(Mat 27:32-44; Mak 15:21-32; Jon 19:17-27)*

²⁶⁻²⁷ Jiysis nup ñanḡniḡ dand sanḡdiyakniḡ, biynimb kuḡaynep kisen giy amniyak. Namb okok amyiḡ niḡyak; bi Saymon, miñmon Sayriyniy nimb ak, Jerusalem apek. Nup niḡiy, mon kiros di wanjrem ar nup ak ayñiyiḡ anḡyak, “Jiysis amjap ak kisen amnoḡ anḡey,” dand kisen gak.

Pen biynimb kuḡaynep ameyak namb kun ak, biyn ḡunap Jiysis nup simb niḡiy siy anḡey, ²⁸ nuk tuḡandikiy kuyip anḡak, “Nimb Jerusalem biyn! Yip giḡiḡ giḡap ak siy ma anḡnimimb. Nimbip

timey giy, ñapan nimbip gok timey giy giniᅅgamb ak, siy aᅅgnimimb! ²⁹ Kisen miker yomb asaw ak apek, aᅅgningambay, ‘Biyn ñapan ma tikpay gok sek, biyn ñapan tiy ma ñimbay gok sek tep, aᅅgningambay.’

³⁰ “Ñin kun ak, yenen mindiy kumjun aᅅgiy aᅅgningambay, ‘Miñmon yirik gok paᅅg apiy, chinup pikaypikop akaᅅ, konjiy diy chinup yiw gipkop ak, tep aᅅgningambay.’

³¹ “Yip mon kim tep, timey ma giniᅅgiy rek ak pen, timey giniᅅ gispay. Nimb mon milip rek wiᅅind amiy mindpim ak, nimbip niᅅind giniᅅgambay aᅅgak.”

³² Pen bi gapman low minim timbrikrik omiᅅal ak, mon kiros bak biyoneᅅ ñaᅅgbirik ayneᅅg, dand sesek amniyak. ³³ Dand miñmon Chip jun won apay ak amjakiy, bi gapman low timbrikrik omiᅅal ak pis pis ñaᅅgbirikiy, Jiysis nup namb biyaᅅ ñaᅅgbirikiyak. ³⁴ Nup kun giy, ñaᅅgbirik ayey, nuk Nop nup aᅅgak, “Bapiy. Yip gispay ak yerip gispun aᅅgiy, niᅅrep giy ma gispay. Kun ak kuyip niᅅiy kirginimin aᅅgak.”

Pen amiybi gok, Jiysis nup mon kiros bak biyoneᅅ ñaᅅgbirik ay, chech nup tuᅅgjiw ayey mindek gok, kiyk key sandiw gipay rek ak giyineᅅ diyak.

³⁵ Biynimb kuᅅaynep niᅅmindyakniᅅ, Jiwda biyomb gok, Jiysis nup paᅅj aᅅgiy aᅅgyak, “Nuk ‘Yand Jiwda Kiyᅅ yomb key yimb ak; Gor yip damb nuk yip mindpiyn aᅅgiy,’ biynimb gunap kumey gamb tikjakpay. Gip kun ak rek, nuk key kunep giy, kim amek niᅅun aᅅgyak.”

³⁶ Pen amiybi gok kunep nup panj angying, manj sinjak apiy, ñing silik ak ñiying angyak, ³⁷ “Nand Jiwda bi kiyn yomb kiyk mindpiyn apan ak, nand key giy kim amnoñ akan angyak!”

³⁸ Pen mon bonj band bap, Jiysis nup ñangrimbikyak mon kiros bak biyon, yimb tikay angyak, “Jiwda biynimb kiyn yomb kiyk ak angyak.”

³⁹ Bi low minim timbriker, mon kiros bak biyon ñangbirikyak ominal ak, bap Jiysis nup angak, “Nand Jiwda Kiyn yomb key yimb mindpan ak, nand key giy kim amiy, chirup kunep gey, kim amnur angak.”

⁴⁰ Angek, bi bap nup pen anj giy angak, “Chir miker dipur rek, nuk kunep dip ak, nand Gor nup ma pirikpan? ⁴¹ Chirminay timey gipur rek yiwur dispur, pen Jiysis tap bap ma giy, yikop nep yiwur disap angak.” ⁴² Kun angyi, Jiysis nup angak, “Kisen nand Biyomb Kiyn mindiy winingamban ñin ak, yip gosimb niñnimin angak.”

⁴³ Kun angek, Jiysis angak, “Nip niñind yimb aspiyn. Miñiy ñin biy, yand yip am tip tep ak mindeningambur angak.”

Jiysis Kumak

(Mat 27:45-56; Mak 15:33-41; Jon 19:28-30)

⁴⁴ Ñin kun ak, pumbnamb yomb yon won ak kisyim apiy, mind dand amiy pumb kuyim gak won ak, tip ak pen melik gak. ⁴⁵⁻⁴⁶ Pen Jiysis kunning angak, “Bapiy. Kawnan yand ak ñin ar nip ak aysiyn angyi,” kumakniñ, Gor angninep korip ñiluk miñgan sunrep yimb biyan, laplap di

kinjenrumb pil giyak ak, pungrik biyon biyan ay, mingan yikiy mindek.

⁴⁷ Pen amiybi kond mindep kiyk ak, Jiysis minim angyi kumak kun ak niñiy, Gor nup yimb ak dand aranying angak, “Niñind apay; bi tep yimb ak angak.”

⁴⁸ Biynimb ap mindeyak gok, tap gak kun ak niñiy, simb yimb gakniñ, andkind korip kiyk amniyak. ⁴⁹ Pen Jiysis bungyi nuk gok sek, biyn Galiyliy nimb wiyak gok sek kiyk keykey sinbindon mindiy, tap gak kun ak niñmindeyak.

Jiysis Nup Komyak

(Mat 27:57-61; Mak 15:42-47; Jon 19:38-42)

⁵⁰⁻⁵¹ Pen bi Jiwda minim tungasikep, Gor minim di tep yimb giyingip bap, miñmon Armatiya mindyngip. Yimb nuk ak Josep. Nuk bi minim tungasikep gunap, Jiysis nup ñang ayun angyi, gos niñyak rek ma niñak. Nuk Gor biynimb diy kond mindeningamb ñin ak, mañ mindip angyi, kond mindyngip.

⁵² Nuk Jiysis nup dam komning, Paylat mindek ak am angninek, yaw angek, ⁵³ bi gunap yip am Jiysis nup tungasik dand apyapiy, chech tund teprep yimb ak di kom kom giy, dam kamb mingan kisen nep kilukiy chip ma komyak mingan ak komyak. ⁵⁴ Pen Jiwda lotiw ñin ak, mañ gip angyi, Praydey dungep won ak, Jiysis nup kun giy dam komyak.

⁵⁵ Pen biyn tiwin, Jiysis yip Galiyliy nimb wiyak gok, Josep amnakniñ kisen amiy, Jiysis nup komyak tip ak niñrep giy, andkind korip amniyak. ⁵⁶ Amiy, wel kuy tep wak gunap, Jiysis

mumbwak nup ak ayñinjun angyiy, gay tep giyak. Minek kun anep dand ambiyap ak pen, Sarirey ñin ak, ñin yomb kiyk yikop mindep ak ninjiy mey, yikop mind mind kinyak.

24

Jiysis Tikjakak

(Mat 28:1-10; Mak 16:1-8; Jon 20:1-10)

¹ Minek Sandey miñmon kisen tikak won ak, biyn tiwin kun ak, wel kuy tep wak ak diy, Jiysis mumbwak nup ayñinjun angyiy, dand Jiysis nup komyak ak amniyak. ² Amiy niñyak: kamb kolim yomb chip kaw pil giyak won ak, milok am gol okok mindek. ³ Pen kiyk miñgan kun ak amiy niñyak: Jiysis ma mindek. ⁴ Yergip angyiy, angy mindyakniñ, bi chech tund ñiñakol yimrik omiñal ak, gol kun siñak jakiy minderik. ⁵ Kiyk ninjiy, jel pirikiy, kongim yimiy kuyangiyakniñ, bi omiñal kun ak angyrik, “Yenen bi kim mindip anup, chip kombay namb akniy piyow niñsipim? ⁶ Nuk biy ma mindip. Mindarik tikjakip. Pen nimb gos niñnimimb; Galiyliy mindiy, nimbip minim angyak ar ak. ⁷ Nimbip angyak, ‘Bi bab Ñinuk ak nup, di biynimb tap siy tap timey gipay ñin ar ak ayey, mon kiros bak biyoñ ñangrimbik ayey kumiy, minek omiñal nokom mindiy, tip tikjakningamb angyak’ angyrik.”

⁸ Kun angyrikniñ, gosimb kuyip ak pangyikek, Jiysis nind Galiyliy mindiy, minim angyak kun ak niñyak. ⁹ Ninjiy, tip ak andkind amiy, tap gek niñyak kun ak, Jiysis binuk onep angyip ak sek, biynimb nuk yikop gok sek kuyip angyñiyak.

¹⁰ Biyn tiwin, minim anğñiyak kun ak, Mariya miñmon Makdala nimb ak, Jowana ak, Jemis nonim Mariya ak, biyn yikop gunap sek.

¹¹ Pen kiyk kun giy anğñeyak, minim kun ak niñind apay anğiy ma niñyak; ñiñloñ ay aspay anğiy niñyak.

¹² Pen Piyta minim kun ak niñiy, puñgrikind yimb anğiy bindoñ amiy, komyak kamb miñgan ak sipsip niñak: Jiysis nup chech kom kom giyak band gok nep mindek. Niñiy, yergip anğiy, gospar yimb aying, tip ak andkind amnak.

*Bi Omiñal Miñmon Emeyas Amnirik Minim
(Mak 16:12-13)*

¹³ Ñin kun anep, bi omiñal miñmon sikoy Emeyas, yep Jerusalem mañ kun okok amnur anğiy amying; ¹⁴ tap yerip yerip gek niñrik minim ak kapkap angying amerik. ¹⁵ Amnirikniñ, Jiysis kund okok ken apiy, kiy yip yingong giy amnak. ¹⁶ Pen bi omiñal kun ak, Jiysis nup niñbirip ak pen, Gor gosimb kuyipmiñay ak gek sakiy ayek, Jiysis nup niñer, bi ak key rek ayak. ¹⁷ Nuk kuyipmiñay anğniñiy angak, “Minim gok yerip angying, anger asaw?” Kun angek, yimgeprek jak mindying, ¹⁸ numam Kiliyowpas angak, “Nand nep mey, miñiy ñin kaw biy, tap Jerusalem biy gisap ak ma niñban?”

¹⁹ Angek angak, “Tap kun ak yergek aspiyr angak.”

Angek angrik, “Bi Gor minim anğep Jiysis Nasaret nimb ak, minim anğ tep giying, tap mageprek gok giying gek; Gor nup tep giy, biyn-imb gok kuyip tep giy gak. ²⁰⁻²¹ Kun gek, gosimb

chin ninjiy angnuk; nuk bi chinup Yisrel biynimb diy, kond mind-tep giningamb anjiy ninjuk ak pen; biyomb Gor nup tap simbonjep gok sek, bi minim tungasikep gok sek minim anj nangi, di Rom gapman biyomb anup ñeyak, nuk amiybi nuk gok kuyip ñek, dam mon kiros bak biyon ñangrimik ayey kumak. Tap gak kun ak, ñin omiñal pandikak. ²² Miñiy sekemb won ak, biyn tiwin chin bap, am nup komyak kawrumb bindon ninjiy, ap chinup tap yerip yerip gip ak anjñey, ninjiy jiw dipun. ²³ Kiyk apay, chip par ak ma mindamb. Enjol omiñal ak apiy apiyr, ‘Nuk tikjakiy, kim mindip apiyr’ apay. ²⁴ Kun anjey, bi chin gunap kawrumb bindon amiy niñbay; biyn gok apay rek nep, mindamb anjrik.”

²⁵ Kiliyowpas kun anjek, Jiysis angak, “Nir-miñay gos tep ma niñbiyr. Bi Gor minim anjep gok minim anjyak ak, yenen niñind anjyak anjiy kasek ma niñbiyr. ²⁶ Pen Gor angak rek, Kiyñ yomb key yimb ak yiwur yomb diy kumiy, tik-jakiy mey, biynimb kuñaynep diy kond mindeningamb angak.” ²⁷ Kun anjiy, kuyipmiñay Mosis; bi kiyñ yomb key yimb ak nup, minim tikak ak sek, bi Gor minim anjep gunap, minim nup tilyak ak sek manjiysek anjñirep gak.

²⁸ Pen bi omiñal kun ak, miñmon amerik man kun siñak amjakiy, Jiysis kuyipmiñay tawsak ay, amning rek gek, ²⁹ kiykmiñay nup kilis giy anjrik, “Dunjep day biy aswun. Kisyim wining gisap nen, apey chirmiñay yip amnun anjrik.” Anjer, kiymiñay yip amnak.

³⁰ Korip am mindiy, tap ñiñning, nuk biret

ak diy, Gor nup tep angyi, tipang kuyipminay ñakni, ³¹ gosimb kuyipminay ak pangyikek, ak Jiysis nep angyi, angrikni, kapkap kurgak. ³² Kun gek, niñiy angrik, “Kinjeñnamb okok apyিং, minim gunap angniying, Baybol buk tikyak minim kiñi ak angniying gamb, mindmangyi chirup ak niñind yimb lingamb angrik.”

³³ Kun angyi, won kun ak nep, tip andkind Jerusalem amiy niñrik: Jiysis binuk onep angyi ak sek, buñgyi kiyk gunap sek ap nan-giy mindeyak.

³⁴ Amjakrikni, kuyipminay angyak, “Niñind yimb apun. Jiysis kumimb ak pen; tip ak tikjakiy, ap Saymon mindamb siñak misen gamb, niñimb angyak.”

³⁵ Angey, kiy pen angrik, “Chirminay kunep kinjeñnamb okok amambur, Jiysis chirup namb pikamb, dand korip chirminay ak amiy, tap ñiñning giy, nuk biret ak di Gor nup tep angamb, ak Jiysis nep angyi niñbur angrik.”

*Jiysis Binuk Gok Nup Misen Niñyak
(Mat 28:16-20; Mak 16:14-18; Jon 20:19-23)*

³⁶ Minim kun ak angrikni, Jiysis mindeyak namb ak misen giy angak, “Nimb mindpim?”

³⁷ Angek, kiyk chip kawnan angyi ³⁸ pirikeyak, kuyip angak, “Yenen, yip Jiysis angyi ma niñiy, gos kuñay niñsipim? ³⁹ Ñin tomb yip gok niñim. Yand Jiysis nep. Chip kawnan rek, mumbwak tiñiy sek ma mindembinip; yand yipul sek, tiñiy sek mindpiyn ak, yip diniñim angak.”

⁴⁰ Kun angying, ñin tomb nuk gok kuyip yomek niñiy, ⁴¹ kiyk miñmiñ giying, pen gospar aying, ak Jiysis nep akan angyi, gos kuñay niñeyak;

kuyip angak, “Tap ñiñemb nimb gunap mindip akan?” ⁴² Angek, nup piys dangiy ayak ak ñiy, ⁴³ niñmindyakniñ ñiñak.

⁴⁴ Pen Jiysis kuyip angak, “Nimb yip mindiy, yip gip ar ak, giniñgamb angyi nimbip angyiñiyngipiyn. Mosis low minim angyi tikak rek, bi Gor minim angep angyi tikyak rek, pen Baybol buk Sam ak minim angyi tikyak rek, yip yerer giniñgamb angyi, mañgyisek angyiñiyngipiyn angak.”

⁴⁵ Kun angyi, minim nind tikyak ak niñrep giyan angyi, gos tep yimb ak kuyip ñiy, ⁴⁶ angak, “Minim kun ak tikiy angyak, ‘Kiyñ yomb key yimb ak yiwur yomb diy kumek, komey, minek omiñal nokom mindiy, tip ak tikjakniñgamb. ⁴⁷ Tikjakiy mindeniñgamb rek, minim nup ak miñmon Jerusalem kiñiñ giy angyi, angy dand amiy, biynimb miñmon okok mañgyisek angyey amnakniñ, biynimb tap siy tap timey giniñgambay gok, yenen kun gipun angyi, nup chiñgyakniñ, gach kuyip ak wiykyokniñgamb angyak.’ ⁴⁸ Pen yip gak kun ak, windin nimb key niñbim. ⁴⁹ Pen Bapiy minim angyak rek, nimbip giniñgayn ak mey; dawin yomb Jerusalem biy mindiy, kond mindenimimb. Gor Kawnan ak, ap nimbip bak ayek, miñmon okok keykey amnimimb angak.”

Jiysis Semb Biyoñ Amnak
(*Mak 16:19-20; Ap 1:9-12*)

⁵⁰ Kun angyi, kuyip poñind Beteniy amiy, Gor kuyip kond minden angyi, ñin dand araniy, ⁵¹ Gor nup angyiñakniñ, nup dand aranjak semb biyoñ amnak. ⁵² Kun gek, kuyip tep gakniñ, yimb

nup ak dand aranying, andkind Jerusalem am-
niyak. ⁵³ Amiy, minek minek, Gor angnijep
korip mingan ak amiy, Gor nup yimb ak dand
aranyingipay.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 11 Nov 2022 from source files dated 9 Oct 2020

1491c109-3ee2-5565-9b83-06c480168547